

萬 有 文 庫

第二集七百種

王 雲 五 主 編

宋 文 鑑

(五)

呂 祖 謙 詮 次

商 務 印 書 館 發 行

宋 文 鑑

(五)

呂祖謙諡次

國學基本叢書

怪石

白雲庵

偶成

送呂晦叔赴河陽

贈司馬君實

題館壁

山堂偶書

冬至日遊吉祥寺

唐道人言天目山

陳季常所蓄朱陳村嫁娶圖

春日

贈劉景文

望湖樓醉書二首

望海樓晚景二首

書雙竹淇師房

王莽

黃庶

黃庶

程顥

程顥

程顥

劉攽

唐詢

蘇軾

蘇軾

蘇軾

蘇軾

蘇軾

蘇軾

蘇軾

蘇軾

蘇軾

金橙徑

霜筠亭

中秋月

梅花二首

南堂

書李世南所畫秋景

題澄邁驛通潮

歸計

姑熟

靜居

虞姬墓

秋祀高祿

題陽關圖

題李伯時畫嚴子陵釣灘

北窗

和謝公定河朔漫成

蘇軾

蘇軾

蘇軾

蘇軾

蘇軾

蘇軾

蘇軾

沈括

沈括

李宗易

蘇轍

蘇轍

黃庭堅

黃庭堅

黃庭堅

黃庭堅

梅福隱居

黃庭堅

次韻子瞻延英入侍

黃庭堅

戲題小雀捕飛蟲畫扇

黃庭堅

竹枝歌二首

黃庭堅

答聞善二首

黃庭堅

病起荆江亭卽事

黃庭堅

臺下

沈遼

宿濟州西門外旅館

晁端友

召試學士院

王欽臣

題淺沙泉

黃履

次韻答學者

陳師道

寄都下故人示王子安

陳師道

絕句

陳師道

贈吳氏兄弟

陳師道

絕句

陳師道

經筵大雪不能講二首

呂希哲

曾點

題宣州後堂壁

桓武公

絕句

漫成

北郊

送劉戶曹

題驛舍

送呂子進

守關

題李世南畫扇

自歎

感古二首

途中

張辟疆

春日村居

宋文鑑

卷第二十八

呂大鈞

張耒

張耒

張耒

張耒

呂大臨

呂大臨

盧秉

張舉

劉季孫

蔡肇

任伯雨

任伯雨

張公庠

劉跂

崔鷗

讀漢書

垂虹亭

題泗濱南山石壁曰第一山

杜牧

墨子

見降羌感事

暮雨

雨中漫成

村老

自齊山借舟泛湖還家

茅塘馬上

天人

羲軒堯舜雖難復。湯武桓文尙可循。事既不同時又異。也由天道也由人。

禁煙留題錦嶺山下

春花開百萬般。東風近日惡摧殘。可憐桃李性溫厚。吹盡都無一句言。

懶起

鮑欽止

米黻

米黻

田晝

田晝

晁詠之

謝邁

謝邁

馬存

曹緯

賀鑄

邵雍

邵雍

邵雍

半記不記夢覺後。似愁無愁情倦時。擁衾側臥未忺起。簾外落花撩亂飛。
送蘇脩撰赴闕四首

秦弊于今未息肩。高蕭從此法相沿。生無定業田疆壤。赤子存亡任自然。
道大寧容小不同。顛愚何敢與機通。井疆師律三王事。請議成功器業中。
闔關天機未始休。衿衣胼足兩何求。巍巍只爲蒼生事。彼美何嘗與九州。
出異歸同禹與顏。未分黃閣與青山。事機爽忽秋毫上。聊驗天心語默間。
別館中諸公

九天宮殿鬱嵒嶷。碧瓦參差逼絳霄。藜藿野心雖萬里。不無忠戀向清朝。
聖心

聖心難用淺心求。聖學須專禮法脩。千五百年無孔子。盡因通變老優游。
老大

老大心思久退消。倒巾終日面峒嶷。六年無限詩書樂。一種難忘是本朝。
有喪

有喪不勉道終非。少爲親嫌老爲衰。舉世只知口考妣。功總不見我心悲。
土牀

土牀煙足袖衾暖。瓦釜泉乾豆粥新。萬事不思温飽外。漫然清世一閑人。

張載

張載

張載

張載

張載

張載

芭蕉

芭蕉心盡展新枝。新卷新心暗已隨。願學新心養新德。旋隨新葉起新知。

貝母

貝母階前蔓百尋。雙桐盤遶葉森森。剛強願我蹉跎甚。時欲低柔警寸心。

題解詩後

置心平易始通詩。逆志從容自解頤。文害可嗟高叟固。十年聊用勉經師。

怪石

山鬼水怪着薜荔。天祿辟邪眠莓苔。鉤簾坐對心語口。曾見漢唐池館來。

白雲庵

白雲無種滿地生。有時出山爲雨露。老僧惆悵望雲歸。盡日庵前自來去。

偶成

雲淡風輕近午天。望花隨柳過前川。旁人不識予心樂。將謂偷閑學少年。

送呂晦叔赴河陽

曉日都門颭旆旌。晚風饒吹入三城。知公再爲蒼生起。不是尋常刺史行。

贈司馬君實

二龍閑臥洛波清。今日都門獨餞行。願得賢人均出處。始知深意在蒼生。

張載

張載

張載

黃庶

黃庶

程顥

程顥

程顥

題館壁

壁門金闕倚天開。五見宮花落古槐。明日扁舟江海去。卻從雲氣望蓬萊。

山堂偶書

在處煙雲早晚生。自疑呼吸氣皆靈。十年夢寐江山裏。今見江山入戶庭。

冬至日遊吉祥寺

井底微陽回未回。蕭蕭寒雨濕枯荑。何人更似蘇夫子。不是花時獨肯來。

唐道人言天目山上俯視雷雨。每大雷電但聞雲中如嬰兒聲。殊不聞雷震也。

已外浮名更外身。區區雷電若爲神。山頭只作嬰兒看。無限人間失箸人。

陳季常所蓄朱陳村嫁娶圖二首

何年顧陸丹青手。畫作朱陳嫁娶圖。聞道一村唯兩姓。不將門戶買崔盧。

我是朱陳舊史君。勸耕曾入杏花村。而今風物那堪畫。縣吏催錢夜打門。

朱陳村在徐州蕭縣

春日

鳴鳩乳燕寂無聲。日射西牕潑眼明。午醉醒來無一事。只將春睡賞春情。

贈劉景文

荷盡已無擎雨蓋。菊殘猶有傲霜枝。一年好處君須記。最是橙黃橘綠時。

劉放

唐詢

蘇軾

蘇軾

蘇軾

蘇軾

蘇軾

望湖樓醉書二首

黑雲翻墨未遮山，白雨跳珠亂入船。
卷地風來忽吹散，望湖樓下水如天。
放生魚鼈逐人來，無主荷花到處開。
水枕能令山俯仰，風舡解與月徘徊。

望海樓晚景二首

橫風吹雨入樓斜，壯觀應須好句誇。
雨過湖平江海碧，電光時掣紫金蛇。
青山斷處塔層層，隔岸人家喚欲膺。
江上秋風晚來急，爲傳鐘鼓到西興。

書雙竹湛師房

暮鼓朝鍾自擊撞，閉門孤枕對殘釭。
白灰旋撥通紅火，臥聽蕭蕭雪打窗。

王莽

漢家殊未識經綸，入手功名事事□。
□□□□夜井，千金購得解飛人。

金橙徑

金橙縱復里人知，不見鱸魚價自低。
須是松江煙雨裏，小舡燒薤擣香齏。

霜筠亭

解籜新篁不自持，嬋娟已有歲寒姿。
要看凜凜霜前意，須待秋風粉落時。

中秋月

暮雲收盡溢清寒，銀漢無聲轉玉盤。
此生此夜不長好，明月明年何處看。

蘇軾

蘇軾

蘇軾

蘇軾

蘇軾

蘇軾

蘇軾

梅花二首

春來幽谷水潺潺。的皪梅花草棘間。一夜東風吹石裂。半隨飛雪度關山。何人把酒慰深幽。開自無聊落更愁。幸有清溪三百曲。不辭相送到黃州。

南堂

埽地燒香閉閣眠。簾紋如水帳如煙。客來夢覺知何處。掛起西牕浪接天。

書李世南所畫秋景

人間斤斧日創痍。誰見龍蛇百尺姿。不是溪山曾獨往。何人解作掛猿枝。

題澄邁驛通潮閣

餘生欲老海南村。帝遣巫陽招我魂。杳杳天低鶻沒處。青山一髮是中原。

歸計

住山人少說山多。空只年年憶薜蘿。不是自心應不信。眼前歸計又蹉跎。

姑熟

新晴渡口百花香。石子池頭鴨弄黃。捲幔夕陽留不住。好風將雨過梅塘。

靜居

大都心足身還足。祇恐身閑心未閑。但得心閑隨處樂。不須朝市與雲山。

虞姬墓

蘇轍

蘇軾

蘇軾

蘇軾

蘇軾

沈括

沈括

李宗易

布叛增亡國已空。摧殘羽翮自令窮。艱難獨與虞姬共。誰使西來敵沛公。

秋祀高禩

乾德年中初一新。頽垣破瓦委荆榛。興亡舉墜干戈際。閒暇方知國有人。

題陽關圖

斷腸聲裏無形影。畫出無聲亦斷腸。想得陽關更西路。北風低草見牛羊。

題李伯時畫嚴子陵釣灘

平生久要劉文叔。不肯爲渠作三公。能令漢家重九鼎。桐江波上一絲風。

北窗

生物趨功日夜流。園林才夏麥先秋。綠陰黃鳥北窗簾。付與來禽安石榴。

和謝公定河朔漫成

漢時水占十萬頃。官寺民居皆濁河。豈必九渠忘故道。直緣穿鑿用工多。

梅福隱居

吳門不作南昌尉。上疏歸來朝市空。笑拂巖花問塵世。故人子是國師公。

次韻子瞻延英入侍

延和西路古槐陰。不隔朝宗夙夜心。公有胸中五色線。平生補袞用功深。

戲題小雀捕飛蟲畫扇

黃庭堅

蘇轍

黃庭堅

黃庭堅

黃庭堅

黃庭堅

黃庭堅

黃庭堅

小蟲心在一啄間。得失與世同輕重。丹青妙處不可傳。輪扁斲輪如此用。
竹枝歌二首

竹竿坡面蛇倒退。摩圍山要胡孫愁。杜鵑無血可續淚。何日金雞赦九州。
命輕人鮮甕頭船。日瘦鬼門關外天。北人墮淚南人笑。青壁無梯聞杜鵑。

答聞善二首

公口醉面桃花。紅人百忤之無愠容。莘老夜闌傾數斗。焚香默坐日生東。
陶令舍中有名酒。無夕不爲父老傾。四坐歡欣觀酒德。一燈明暗又詩成。

病起荆江亭卽事

成王小心似文武。周召何妨略不同。不須要出我門下。實用人材卽至公。
臺下

石梅落落欲黃時。細雨濛濛暗不開。數日不行臺下路。不知江水過山來。

宿濟州西門外旅館

寒林殘日欲棲鳥。壁裏青燈乍有無。小雨愔愔人假寐。臥聽疲馬齧殘芻。

召試學士院

翠木陰陰白玉堂。長年來此試文章。日斜奏罷長楊賦。閑拂塵埃看畫墻。

題淺沙泉

黃庭堅

黃庭堅

黃庭堅

沈遼

晁端友

王欽臣

黃履

欄低沙淺一泓寒。雨不增深旱不乾。要識有源爲可取。餘波更向大江看。

次韻答學者

陳師道

大阿無前鋒不缺。鋌刀不堪供一切。至柔繞指剛則折。善而藏之光奪月。

寄都下故人示王子安

陳師道

湖海相忘日自踈。經年不作一行書。世間惟有韓康伯。肯爲淵明住歲餘。

絕句

陳師道

里中餽杏得嘗新。馬上逢花始見春。勤苦著書如作吏。世間枉是最閑人。

贈吳氏兄弟

陳師道

得失媿妍只自知。略容千載有心期。恨君不識金華伯。何處如今更有詩。

絕句

陳師道

書當快意讀易盡。客有可人招不來。世事相違每如此。好懷百歲幾回開。

經筵大雪不能講二首

呂希哲

水晶宮殿玉花零。點綴宮槐臥素屏。特勅下簾延墨客。不因風雪廢談經。強記師承道古先。無窮新意出陳編。一言有補天顏動。全勝三軍賀凱旋。

曾點

呂大鈞

函丈從容問且酬。展才無不至諸侯。可憐曾點推鳴瑟。獨對春風詠不休。

題宣州後堂壁

過雨山亭暑氣微。老人猶未試生衣。滿園閑綠無人到。春日南風燕子飛。

桓武公

北征談笑縛姚公。靜掃諸陵見洛嵩。不用登高笑夷甫。正緣此輩使君雄。

絕句

風掉浮煙匝地回。雨將濃翠撲山來。晚涼樓角三吹罷。夕照江天萬里開。

漫成

閉門春風作往還。誰家有花堪醉眠。柳腰榆莢爭入眼。江梅一枝遠若天。

北郊

村口磽田久廢耕。試投嘉穀望秋成。天時地力難料。萬粒須期一粒生。

送劉戶曹

學如元凱方成癖。文似相如反類俳。獨立孔門無一事。唯傳顏氏得心齋。

題驛舍

青山白髮病參軍。旋糶黃糧買酒尊。但得有錢留客醉。也勝騎馬傍人門。

送呂子進

離鷄雲鵬各有程。匆匆送別未忘情。恨君不在蓬籠底。共聽蕭蕭夜雨聲。

張耒

張耒

張耒

張耒

呂大臨

呂大臨

盧秉

張舉

守關

劉季孫

晨雞三叫未開關。留滯行人更解鞍。卻上月明高處立。曉風吹面作清寒。

題李世南畫扇

蔡肇

野水潺潺平落澗。秋風瑟瑟細吹林。逢人抱甕知村近。隔塢聞鍾覺寺深。

自歎

任伯雨

當年言路亦逡巡。白簡青蒲十一人。半斥炎荒半除籍。而今無一預朝紳。

感古二首

任伯雨

一言借諭資鍾會。意在張華亦已深。大抵知言由養氣。可憐晉武有蓬心。指鹿姦謀豈偶然。都緣人事不由天。要知左右皆言馬。只爲當時殺正先。

途中

張公庠

一年春事又成空。擁鼻微吟半醉中。夾路桃花風雨遇。馬蹄無處避殘紅。

張辟疆

劉跂

老畫駸駸不可攀。風流依約片言還。小兒若悟他年事。肯復生心涕淚間。

春日村居

崔鷗

春草門前已沒靴。更無人過野人家。離離細竹時聞雨。淡淡疏簾不隔花。

讀漢書

鮑欽止

漢公事業比阿衡。純用詩書致太平。它日何人頌功德。至今嘲笑亦諸生。
垂虹亭

斷雲一葉洞庭帆。玉破鱸魚霜破柑。好作新詩繼桑苧。垂虹秋色滿東南。

題泗濱南山石壁曰第一山

京洛風沙千里還。船頭出汴翠屏間。莫論衡霍撞_平星斗。且是東南第一山。

杜牧

弟病兄孤失所依。當時書語最堪悲。豈圖乞得南州後。卻恨尋芳去較遲。

墨子

末學紛紛自有師。能言兼愛我猶疑。定知已駕雲梯後。卻悔初心泣染絲。

見降羌感事

沙場尺箠致羌渾。玉陛朝趨雨露恩。自笑百年家鳳闕。一生腸斷國西門。

暮雨

晚雨牆東暗綠槐。清陰庭院鎖莓苔。委堦紅藥將春去。貼水青荷與夏來。

雨中謾成

東風渾作勒花寒。寂寞林塘不受看。玉板鶴翎俱未識。梨梢空有淚闌干。

村老

米芾
米芾
田晝
田晝
晁詠之
謝邁
謝邁
馬存

肉死皮乾垂鬢絲。尋暄扶杖向東籬。文王沒後無人問。直至而今大半飢。

自齊山借舟泛湖還家

曹 緯

十里平湖漫不流。晚風吹浪打行舟。定知歸得侵燈火。家在菰蒲最盡頭。

茅塘馬上

賀 鑄

壯圖忽忽負當年。回羨農兒過我賢。水落陂塘秋日薄。仰眠牛背看青天。

宋文鑑卷第二十九

詩

雜體

星名

二十八宿歌贈无咎

人名

和蕭十六

郡名

郡名詩呈呂元鈞

藥名

登湖州銷暑樓

荊州卽事五首

建除

重贈徐天隱

八音

黃庭堅

孔平仲

孔平仲

陳亞

黃庭堅

黃庭堅

八首歌答黃魯直

晁補之

四聲

還鄉展省道中作四聲詩寄豫章僚友

孔平仲

藏頭

寄賈宣州

孔平仲

呈章子平

孔平仲

離合

藥名離合四時四首

孔平仲

回紋

泊鴈

王安石

一字至十字

詠竹

文 同

兩頭織織

兩頭織織二首

張舜民

五雜組

五雜組四首

孔平仲

了語不了語

了語

不了語

難易言

難易言二首

聯句

劍聯句

風琴聯句

悲二子聯句

地動聯句

集句

送吳顯道

戲贈湛源

與北山道人

示蔡天啓

烝然來思

孔平仲

孔平仲

蘇舜欽

王安石

王安石

王安石

王安石

王安石

集杜句寄孔元忠

孔平仲

星名

二十八宿歌贈无咎

黃庭堅

虎剝文章犀解角。食未下亢奇禍作。藥材根。氏羅斲。蜜蜂奪房抱。饑渴有心無。心材慧死。人言不如龜。曳尾衛平。哆口無南箕。斗柄指日。江使噫。狐腋牛衣同一燠。高丘無女甘獨宿。虛名挽人受實禍。累棊既危安處我。室中凝塵散髮坐。四壁蟲蟲見天下。奎蹄曲隈取脂澤。婁豬艾緞彼何擇。傾腸倒胃得相知。貫日食昂終不疑。古來畢命黃金臺。佩君一言等芻蕘。月沒參橫惜相遠。秋風金井梧桐落。故人過半在鬼錄。柳枝贈君當馬策。歲晏星回觀盛德。張弓射雉武且力。白鷗之翼沒江波。抽絃去軫君謂何。

人名

和蕭十六

孔平仲

式微子歎歸期滯。踈鍾皓月僧窻睡。滿郭丹楓已送秋。李白桃紅春又至。綠楊朱戶鎖娉婷。燕趙壹笑誰相視。紅顏回眄能溺人。有若大川無際涘。吾曹操行薄雲天。去險就平當擇地。嚴君平昔教諸子。肯向贛江爲此事。勿捐仁義縱歡娛。力與主張興廢墜。不才驅使酬杜詩。搦管能令言鄙志。

郡名

郡名詩呈呂元鈞

孔平仲

相人觀久遠。要且視資質。酒酸本多甘。絹敗爲少密。公家渭川後。端亮氣不屈。播移雖裔土。寧安如舊幕。

優游歸孔聖。坎壈笑趙壹。儻來等榮辱。所遇順勞佚。道閣接談賓。文房散書帙。當其泰定時。海宇更無物。耳目并已忘。何心蘄冕黻。忽聞韶曲奏。更覺巴音失。溫純比金玉。清越勝琴瑟。似追少陵步。真得建安骨。從今益淬厲。及此舒長日。唱酬安敢同心欽。但齋栗。

藥名

登湖州銷暑樓

陳亞

重樓肆登賞。豈羨石爲廊。風月前湖近。軒窻半夏涼。罨青識漁浦。芝紫認仙鄉。却恐當歸闕。襟靈爲別傷。

荊州卽事五首

黃庭堅

四海無遠志。一溪甘遂心。牽牛避洗耳。臥著桂枝陰。前湖後湖水。初夏半夏涼。夜闌鄉夢破。一鴈度衡陽。垂空青幕六。一一排風開。石友常思我。預知子能來。幽澗泉石綠。閉門聞啄木。運柴胡奴歸。車前挂生鹿。雨如覆盆來。平地沒牛膝。回望無夷陵。天南星斗濕。

建除

重贈徐天隱

黃庭堅

建極臨萬邦。稽古陛下聖。除書日日下。有耳家相慶。滿意見升平。父老扶杖聽。平生以傳聞。似仁祖德性。定鼎百世長。囊弓四夷靜。執事當在朝。官冷殊未稱。破帽風欹欹。簡易不騎乘。危顛相扶持。泉石共嘲詠。

成樂澗阿中。傲世似未敬。收潦下秋船。期公拜嘉命。開元正觀事。身得見全盛。閉門長蓬蒿。或許老夫病。

八音

八音歌答黃魯直

晁補之

金蘭況同心。莫樂新相知。石田羅清霜。念此百草腓。絲看煮繭吐。士聽憤悱語。竹馬非妙齡。美人恐遲暮。匏繫魯東家。今君尙天涯。土膏待陽燁。氣至如咄嗟。革薄不可廓。士迫下流惡。木無松栢心。蝸處螻蟻託。

四聲

還鄉展省道中作四聲詩寄豫章僚友

孔平仲

蕭灘波滌浚。巴丘山崔嵬。江天如相迎。風吹浮雲開。思鄉人皆然。惟予頻歸來。松楸彌青鮮。春容生泉臺。久雨水隄長。決澇似海廣。葦底解小艇。曉起蕩兩槳。早飯野篠下。鳥語靜愈響。有酒我不飲。引領但子想。四際又暮夜。意詣尙未到。繫纜坐樹蔭。嘒嘒厭聚噪。徑步氣向暝。岸嘯韻自報。內顧自慰幸。比歲屢拜掃。執熱逼入伏。一葉益局促。日落月欲出。豁若脫桎梏。木色鬱碧幄。竹節削綠玉。赤脚踏白石。宿泊得沐浴。

藏頭

寄賈宣州

孔平仲

高會當年喜得曹。日陪宴衍自忘勞。力回天地君應憊。心狹乾坤我尙豪。豕亥論書非素學。子孫干祿有東臯。十年求友相知寡。分付長松蔭短蒿。

呈章子平

孔平仲

王駱聲華星斗傍。方州投老憩甘棠。木逃剪伐枝長碧。石耐鑄磨性有常。巾褚藏經勤問學。子孫傳業富文章。十年留落歸何暮。日聽除書侍玉皇。

離合

藥名離合四時四首

孔平仲

草滿南園綠。青青復間紅。花開不擇地。錦繡逕相通。
漿寒飲一石。蜜液和巖桂。心渴望天南。星河粲垂地。
參旗挂綵木。通夕涼如水。銀漢耿半天。河橋暝烟紫。
雪片擁頰垣。衣裘冷如甲。香膠不滿榼。藤枕欹殘臆。

回紋

泊鴈

王安石

泊鴈鳴深渚。收霞落晚川。柝隨風斂陣。樓映月低弦。漠漠汀帆轉。幽幽岸火然。壑危通細路。溝曲繞平田。
一字至十字

詠竹

文同

竹。竹森寒潔綠。湘江濱。渭水曲。帷幔翠錦。戈矛蒼玉。心虛異衆草。節勁踰凡木。化龍杖入仙。呼鳳律鳴神。谷月娥巾。帳靜苒苒。風女笙竽。清簌簌。林間飲酒。碎影搖罇。石上圍碁。輕陰覆局。屈大夫逐去。徒悅椒蘭。陶先生歸來。但尋松菊。若論檀欒之操。無敵於君。欲圖瀟洒之姿。莫賢於僕。

兩頭織織

兩頭織織二首

兩頭織織女梭。半白半黑。右軍鷺。脰脰膊膊。石子坡。磊磊落落。大風歌。
兩頭織織蠶綰絲。半白半黑。蠅蠹之。脰脰膊膊。母赴兒。磊磊落落。忠臣詞。

張舜民

五雜組

五雜組四首

五雜組。垂衣裳。往復來。就桀湯。不獲已。剪夏商。
五雜組。花木春。往復來。江湖人。不獲已。議和親。
五雜組。錦繡段。往復來。隨陽鴈。不獲已。猶仕宦。
五雜組。朝霞明。往復來。車馬行。不獲已。方用兵。

孔平仲

了語不了語

了語效晉顧愷之殷仲堪

公餽欲成忽覆鼎。銀餅汲絕遠沉井。乳虎咆哮落深窞。青萍一揮斷人頸。

孔平仲

不了語效唐雍裕

無言以手尋珮環。寒暑迭運彫朱顏。八駿踏地幾時徧。六龍駕日何年閑。

孔平仲

難易言

難易言二首效章應物

蘇舜欽

擬把鉞刀伐丹桂。欲坐簪井攀青天。排羅嬰兒拒九虎。未若以道干貴權。地上拾芥亦細碎。掌裏數文猶苦辛。脫使擲丸下峻阪。未若以財而發身。

聯句

劍聯句范仲淹歐陽脩滕宗諒

聖人作神兵。以定天下厄。范蚩尤發靈機。干將構雄績。歐橐籥天地開。鑪冶陰陽關。滕南帝輸火精。西皇降金液。歐炎炎崑崗燄。洶洶洪河孽。范雷霆助意氣。日月淪精魄。滕神氣不在天。錯落就三尺。歐直淬臨溪泉。橫磨太行石。歐雄雌威並立。晝夜光相射。范提攜風雲生。指顧烟霞寂。滕堅剛正人心。耿介志士跡。歐初疑成夏鼎。魑魅世所識。滕又若引吳刀。犀象謂無隔。范截波虬尾滑。脫浪鯨牙直。歐頑水挂陰雷。皎月乘孤隙。歐河角起彗氣。雲罅露秋碧。范曉鐔星斗爛。夜匣飛龍宅。范舞酣霰雪回。彈俊球琳擊。滕鮮搖雪水光。膩亂湘山色。滕青蛟渴雨瘦。素虺蟠霜瘠。歐清敲鏘以鳴。寒姿堅且澤。范鬼類喪影響。佞黨摧肝膈。歐一旦會神武。四海屠兇逆。范周王奉天討。商郊千里赤。歐楚子揚軍聲。秦師萬首白。范祥輝冠吳楚。殺氣橫燕易。范與君斬鼉足。八極停震虢。歐與君荆鵬翼。三辰增煥赫。范莫使化猿翁。辱我爲幻惑。范莫使暴虎人。屈我執仇敵。滕尊嚴侯冠冕。左右舞干戚。歐功成不可留。延平空霹靂。范

風琴聯句謝濤希深梅堯臣聖俞

竅竹漏天風。張絃擬嶧桐。佳名從此得。妙響未曾窮。希深夜靜危臺上。人閑皎月中。依依聽不足。秋露蒲

蘭叢 聖俞

悲二子聯句 蘇舜元才翁蘇舜欽子美二子謂穆修凌孟陽

有客自遠方。來以二子說。穆子疾病初。家事巨細缺。鄰人苦其求。才翁 醫師久已決。案盃小大空。布被旁

午裂。餘喘尚能鼓。子美 老憤知已結。目淒望洋泓。髡斷反喟苗。憂酸繫餘生。才翁 嗚呼留永訣。語妻後日

計。書策未可徹。教子立世資。子美 圓曲勿自悅。吾屬何流離。衆人方草竊。凌子久道路。才翁 十口著羈縲。

恰旅重江間。正值大饑節。既無裹飯交。子美 疾走繼麤糲。又無執漿人。及時沃枯渴。惜哉殞天命。才翁 痛

焉在親經。帝胡生爾身。世復稱其傑。胷伏氣萬丈。子美 腸貯怨百折。艱難泊風波。憔悴墮霜雪。久僕勤龍

鍾。才翁 弱女癡躑躅。文隨寒餓空。道與烟焰滅。魂兮竟何歸。子美 去矣不得別。長府豈無財。莫濟醫藥切。

太倉豈無粟。才翁 莫解腹腸熱。天子聖在上海內。清欲澈。伊人胡不官。子美 既死安得活。朝青與暮紫。神

喜天不軋。昂車與怒馬。才翁 門滿道不絕。之子苟間廁。斯民乃貪饗。高亢世弗親。子美 方嚴鬼所掣。敢言

才足珍。寧免否來齧。思潛淚輒抽。才翁 慘舊面成羞。舉目此牢落。側身今鄙媠。箴言耳空虛。子美 險論口

脆。斃作詩告石梁。聊以慰寒骨。才翁

地動聯句 蘇舜元才翁蘇舜欽子美元舜字

大荒孟冬月。才翁 未旬高春時。日腹昏盲俛。子美 風口鳴嗚咿。萬靈困陰戚。才翁 百植嗟陽衰。濃寒有勝

氣。子美 大凍無收期。六指忽搖拽。才翁 羣蹠初奔馳。九銅落蟾吻。子美 始異張渾儀。列宿犯天紀。才翁 預

驗漢志辭。民薨函鼓舞。子美 禁堞彊崩離。坐駭市聲死。才翁 立怖人足跡。垣途重車債。子美 急傳壯馬歎。

陵阜動撫手。叔才礪塊當揚箕。停汚有亂浪。子美僵木無靜枝。衆喙不暇息。叔才沓嶂驚欲飛。踊塔撼鐸碎。子美安流蕩舟疲。倒壺喪午漏。叔才顛巢駭眠鷗。居人眩眸子。子美行客勞憫兒。南北頓儵忽。叔才西東播戎夷。四鎮一毛重。子美百川寸涔微。斗藪不知大。叔才軒軒主者誰。共工豈復愁。子美富媪安得爲。寧無折軸患。叔才頓易崩山悲。衆蟄不安土。子美羣毛難麗皮。驚者去靡所。叔才仆或如見擠。轟雷下簷瓦。子美決玉傾倉粢。雙顛太室吻。叔才四躍宸口螭。萬宇變旋室。子美百城如轉機。念此大當患。叔才必由政瘕疵。勝社勇厥氣。子美孤陽病其威。傳是下乘上。叔才亦曰尊屈卑。夫惟至靜者。子美猶不可保之。況乃易動物。叔才何以能自持。高者恐顛墜。子美下者嘗鎮綏。天戒豈得慢。叔才肉食宜自思。變省孽可息。子美損降禍可遠。願進小臣語。叔才兼爲丹宸規。偉哉聰明主。子美勿遺地動詩。叔才

集句

送吳顯道

王安石

五湖大浪如銀山。問君西遊何當還。以手撫膺坐長歎。空手無金行路難。丈夫意有在。吾徒且加餐。屏風九疊雲錦張。千峯如連環。上有橫河斷海之浮雲。可望不可攀。飛空結樓臺。動影裊窈冲融間。沛然乘天遊。下看塵世悲人寰。泊舟潯陽郭。去去翔寥廓。君今幸未成老翁。衰老不復如今樂。

戲贈湛源

王安石

恰有三百青銅錢。憑君爲筭小行年。坐中亦有江南客。自斷此生休問天。

與北山道人

王安石

可惜昂藏一丈夫。生來不讀半行書。子雲識字終投閣。幸是元無免破除。

示蔡天啓

王安石

身着青衫騎白馬。日馳三百尙嫌遲。心源落落堪爲將。却是君王未備知。

烝然來思

王安石

烝然來思。送程公也。公來以薨麋饋我。我飲餞之。率西水滸。故作是詩。

念我獨兮。亦莫我顧。烝然來思。程伯休父。我有旨酒。爾殽伊脯。酌言醻之。式歌且舞。不留不處。適彼樂土。言秣其馬。率西水滸。有客宿宿。于時語語。山有橋松。江有渚。式遄其歸。不我與作。此好歌。倡予和女。

集杜詩句寄孫元忠

孔平仲

君不見瀟湘之山。衡山高。八月初。高風怒號。草木黃落。龍正蟄。哀鴻獨叫。求其曹。男兒生無所成。頭皓白。漂零已是滄浪客。呼兒覓紙一題詩。此心炯炯君應識。

宋文鑑卷第三十

騷如騷者亦附

山中之樂

逐伯強文

屈原嘏辭

釋謀

寄蔡氏女子

九誦

上清辭

黃泥坂詞

南山之田

我思古人

山中辭

江上辭

放言

宋文鑑

卷第三十

歐陽脩

劉敞

劉敞

王安石

王安石

鮮于侁

蘇軾

蘇軾

王令

王令

王令

王令

狄遵度

幽命

沈括

題禹廟壁

劉彝

詆風穴

劉放

弔王右軍宅辭

錢公輔

解雨送神曲

李常

超然臺辭

文同

濂溪詩

黃庭堅

明月篇贈張文潛

黃庭堅

秋風三疊寄秦少游

邢居實

華清宮詞五首

田晝

山中之樂

歐陽脩

佛者惠勤。餘杭人也。少去父母。長無妻子。以衣食于佛之徒。往來京師二十年。其人聰明材智。亦嘗學問于賢士大夫。今其南歸。遂將窮極吳越甌閩江湖海上之諸山。以肆其所適。予嘉其嘗有聞於吾人也。於其行也。爲作山中之樂三章。極道山林間事。以動蕩其心意。而卒反之。正其辭曰。

江上山兮。海上峯。藹青蒼兮。杳巘叢。霞飛霧散兮。邈乎青空。天鏡鬼削兮。壁立於鴻蒙。崖懸磴絕兮。險且

窮穿雲渡水兮。忽得路而不知其深之幾重。中有平田廣谷兮。與世隔絕。猶有太古之遺風。泉甘土肥兮。鳥獸雖雝。其人麋鹿兮。既壽而豐。不知人間之幾時兮。但見草木華落爲春冬。嗟世之人兮。曷不歸來乎。山中山中之樂不可見。今子其往兮。誰逢。

其一

丹莖翠蔓兮。巖壑玲瓏。水聲聒聒兮。花氣濛濛。石巉巖兮。橫路風颯颯兮。吹松雲冥冥兮。雨霏霏。白猿夜嘯兮。青楓朝日出兮。林間澗谷紛兮。青紅千林靜兮。秋月百草香兮。春風嗟世之人兮。曷不歸來乎。山中山中之樂不可得。今子其往兮。誰從。

其二

梯崖架險兮。佛廟仙宮。耀空山兮。鬱穹隆。彼之人兮。固亦目明而耳聰。寵辱不干其慮兮。仁義不被其躬。蔭長松之蒼蔚兮。藉纖草之丰茸。苟其中以自足兮。忘其服胡而顛童。自古智能魁傑之士兮。固亦絕世而逃蹤。惜天材之甚良兮。而自棄於無庸。嗟彼之人兮。胡爲老乎山中。山中之樂不可久。遲子之返兮。誰同。

其三

逐伯強文

劉敞

寶元二年。予羈旅淮南。醫來言曰。今茲歲多疾疫。予因作文以逐伯強。伯強厲也。能爲疫者。故逐之。

皇皇上天兮。后土浩浩。厥生孔繁兮。其施甚溥。陶陶仲夏兮。草木蕃靡。鳥獸孳息兮。我民樂胥。我民孔靈兮。上帝是仁。天子聖兮。百工日新。上無秕政兮。下無悖人。鄰里其集兮。樂哉欣欣。伯強何爲兮。孰畀以政。反世五福兮。持極以令。我民不怡兮。既爽其盛。白黑眩瞖兮。孰察其正。謂壽反天兮。謂康反病。仁義無益兮。苟且爲幸。嗟爾伯強兮。其獨何心。絕世和氣兮。俾民不任。上天孔神兮。大德曰生。天不可長罔兮。民不可久侵。天誅誠加兮。安所避。雷公驅兮。風伯逝。嗟爾伯強兮。何所詣。南有蠻兮。爲寇爲逋。西羌戎兮。恃艱自虞。天子孔仁兮。靡焉畢屠。伯強往兮。代天伐誅。嗟中國兮。不可久留。子不去兮。顛倒思予。

屈原嘏辭

劉敞

梅聖俞在江南。作文祝于屈原。譏原好競渡。使民習尙之。因以鬪傷溺死。一歲不爲。輒降疾殃。失愛民之道。其意誠善也。然競渡非屈原意。民言不競渡。則歲輒惡者。訛也。故爲原作嘏辭以報祝。明聖俞禁競渡得神意。

維時仲夏。吉日維午。神歆旣詞。錫辭以嘏。曰。朕之初生。皇揆予度。嘉朕以名。終身是守。抑豈不淑。不幸逢遇。離愍被憂。天不可訴。宗國爲墟。寧取自賊。朕爲忍生。豈不永年。悄悄荆人。是拯是憐。赴水蹈波。疚不廢旃。旣招朕魂。巫祝背先。豈朕是私。將德是傳。淪胥及溺。初亦不悛。其後風靡。民益輕死。匪朕之心。是豈爲義。婦弔其夫。母傷其子。人訊其端。指予以詈。予亦念之。其本有自。昔朕婞直。不爲衆下。世子尙之。謂予好怒。昔朕不容。自投于江。世子尙之。謂予弃躬。旣習而鬪。旣遠益繆。被朕僞名。汙朕以咎。朕生不時。亂世是遘。民之秉彝。嘉是直道。從仁於井。朕亦不取。汝禁其俗。幸懷朕忠。好競以誣。一何不聰。我實鬼神。民焉是

主其祀其禱予之所厚予懼天明焉事戲豫予憫橫流焉事競渡予懷堯舜焉事狎侮汝維賢人曾不予怒徇俗雷同譏予以好履常徇直切諫盡節人神所扶未必皆福去邪卽正何以有罰曾非予懷可禁其爲母使佞臣指予以戒錫爾多福畀爾龐眉使爾忠言于君畢宜

釋謀

王安石

雲冥冥兮蔽日風浩浩兮吹沙出予馳兮不得塊獨處兮咨嗟嗟天地兮無窮暑與寒兮相客以短褐兮憂親孰知予兮孔棘維抱關兮擊柝乃予仕兮所宜祿可辭兮尙冒養孰割兮方虧豈吾事兮固拙寧我辰兮獨悖信物默兮有制尙可侔兮內外

寄蔡氏女子

王安石

建業東郭望城西嶽千嶂承宇百泉遶雷青遙遙兮纒屬綠宛宛兮橫逗積李兮縞夜崇桃兮炫晝蘭馥兮衆植竹娟兮常茂柳青綿兮含姿松偃蹇兮獻秀鳥跂兮下上魚跳兮左右顧我兮適我有班兮伏獸感時物兮念汝遲汝歸兮攜幼

九誦

鮮于侁

堯祠

車麟麟兮廟壘鼓坎坎兮祠下竽瑟兮並奏潔時羞兮虔祠事瑤華爲饌兮沆瀣爲漿象籩玉豆兮金鼎輝煌海珍野蔌兮雜錯而致誠神之來兮風雨蕭蕭前驅千畢兮上有招搖羽林爲衛兮虹霓爲旗鳳凰左右兮擾伏蛟螭神之降兮金輿靈欣欣兮臍蠶德難名兮覆燾千萬年兮不忘

舜祠

道歷山兮透蛇。思古人兮感歎。並儲胥兮肅止。仰曾雲兮晡曉。獸何鳴兮林中。鳥何悲兮山上。木何爲兮不剪。草何爲兮茂暢。帝之神兮在天。帝之德兮在人。物具兮四海。心精兮一純。采秀實兮山間。摘其毛兮澗底。玉醴湛兮瓊茅。肴脩雜兮蘭茝。樂備兮九奏。鳳舞兮儀韶。人駿奔兮如在。君卒享兮神交。

周公

噫嗟兮文公。歸然兮祕宇。悵王室兮多難。獨勤勞兮左右。四國流言兮。冲人不知。東征問罪兮。惛惛不歸。大電以風兮。天威震驚。弁啓金滕兮。袞衣有光。公之心兮。大成文武。公之子兮。建侯啓土。山川兮附庸。奄鼻繹兮龜蒙。萬子孫兮承祀。億兆人兮仰止。惟夫子之嘆嗟兮。不復見於寤寐。何莽新之假攝兮。文姦言而欺一世。造作詭故而戕劉兮。亦亟殄宗而絕嗣。公之聖而德協天兮。何妄人之輒自擬。俾其顛而不終兮。天實表公衷而警後。肅進拜於廟堂兮。宜奉時之牲酒。鼓鍾兮在宮。琴瑟兮在堂。神之格兮樂享。民欣欣兮不忘。

孔子

曲阜兮遺墟。先師兮闕里。神髣髴兮如在。涕潺湲兮不已。窮天地兮一人。揭日月而照臨。生無萬乘之位兮。三千之徒。心服而四來。嗟愚陋之不明兮。乃商賜之爲疑。羌紛紛其妄作兮。悖道違義而弗自知。顧六藝之折衷兮。取捨縱橫而協于道。後世苟輕肆於胷臆兮。必遽貽於詬病。三綱立而五教明兮。實治世之宏矩。履厚地而戴高天兮。胡一日之可捨。宜萬齡之廟貌兮。春秋不乏其時祀。合仁義以爲冠兮。結忠信

而爲佩。集道德以爲裳兮。服文章而爲帶。列籩豆爲左右兮。蘋藻牲牢而潔肥。酌玉醴以爲酒兮。錯瓊瑤而爲粢。升堂而北面兮。望冕旒之巍巍。惟神明之降鑒兮。洞精神其來歆。

嶽神

雲蒼蔚兮山之巔。瞻嶽靈兮望青天。嶄巖嶮峯兮。磅礴無垠。嶓嶓嶽勃兮。寧一以爲仁。草木雜而羅生兮。人不可名。鳥獸蕃而走集兮。虞不能知。因高錯事兮。道此躋陞。登岱勒成兮。胡爲而七十二君。齊余心兮。不外。高余冠兮甚偉。擷芳杜兮爲衣。掇紫芝兮作佩。栢實兮松華。石髓兮蘭英。蕙肴陳兮玉案。明水湛兮清尊。誠拳拳兮不解。寐接神兮。恍若有言。嵩高峻極兮。生甫與申。周道將明兮。宣以中興。水旱不常兮。蟲螟以災。稼穡卒荒兮。民生流離。勞來安集兮。之子之功。祐此下民兮。寧遺神羞。

河伯

清秋方初兮。霖雨降而無時。舊坊弗治兮。河水泛濫而爲災。滂汨沸渭兮。澎湃奔波而濡來。崩騰覆溺兮。夫豈河伯之不仁。汗漫千里兮。蕩然室閭。毫稚驚號兮。丘冢爲家。蛟螭憤怒兮。魚鼈縱橫。鼉鼉馳驚兮。鳧鷖飛翔。皇天無親兮。視聽以民。五序參差兮。咎極以滋。聖惟唐堯兮。固遭橫流。臣有舜禹兮。輿心所依。禦災拯溺兮。九敍可歌。四凶逐去兮。二八以陞。天地平成兮。海隅蒙福。白馬玉璧兮。非神之欲。

箕子

偉夫子之正諒兮。適遭世以離尤。悼祖宗之累積兮。大命顛而逢憂。忠良屏遠兮。讒諛寢昌。神龜在塗兮。虺蟒升堂。紫鸞斂置兮。鳩羽飛揚。騶虞潛遜兮。豺虎縱橫。江籬鉏割兮。鈎吻日滋。芳荃不御兮。蔓草難圖。

比于剖心兮。夫子佯狂。蒙難以正兮。大明其傷。靈脩不察兮。國以云亡。舊邦維新兮。武功以成。囚奴釋辱兮。作賓於王。九疇演繹兮。大法以彰。五事欽明兮。君道日隆。彝倫攸敘兮。庶政其凝。朝鮮分封兮。夷貊化行。傳國中山兮。蕃子以孫。廟貌有嚴兮。祀典攸存。歲時奉事兮。斯千萬年。

微子

肇公孫之璇源兮。玄鳥降而生商。並禹稷之聖賢兮。實惟桓撥之王。歷媯妣之世數兮。道日躋於武湯。始伐罪於仇餉兮。人怨咨而徯來。顧寬仁之宜民兮。天俾式於九圍。諒除殘而代虐兮。猶云德之有愬。賴燕翼於孫謀兮。治克舉於三宗。老成不怨於不以兮。隱處不傷於厄窮。世四十有六而下衰兮。豈天命之將墜。實遭家之不嗣兮。顧麗色之惟微。念社稷之顛傾兮。七廟無所憑依。帝眷在於有周兮。抱祭器而焉歸。雖白馬之見廟兮。聊血食於商丘。偉夫子一言兮。誠有取於三仁。

雙廟

旄頭光芒兮。戎馬馳。海水沸蕩兮。鯨鯢飛。煙塵蔽日兮。殺氣昏。金鼓轟天兮。山岳奔。小國不守兮。大國顛傾。王侯戮辱兮。蛇豕肆行。二公仗義兮。捍賊濰陽。析骸易子兮。併力小城。勢窮力殫兮。外無救兵。亡身殉國兮。寧屈虎狼。仰天視日兮。氣以揚揚。衣纓不絕兮。貌如平生。旅遊馳驅兮。歷此舊都。致詞雙廟兮。涕泗不收。惟忠與孝兮。死義爲尤。遭世擾攘兮。適履其憂。訂謀顛置兮。邊將怙功。尾大權移兮。三鎮握兵。忠賢在野兮。讒邪肆意。女謁內用兮。戚臣外圯。紀綱日紊兮。典刑日弛。胎甌階亂兮。誰執其咎。義士沒身兮。沈寃莫置。猗歟二公兮。行人歔歔。

君胡爲乎山之幽。顧宮殿兮久淹留。又曷爲一朝去此而不顧兮。悲此空山之人也。來不可得而知兮。去固不可得而訊也。君之來兮。天門空。從千騎兮。駕飛龍。隸星辰兮。役太歲。儼晝降兮。雷隆隆。朝發軫兮。帝庭夕弭節兮。山宮壙有妖兮。虐下土。精爲星兮。氣爲虹。愛流血之滂沛兮。又嗜瘡癘與螟蟲。嘯盲風而涕淫雨兮。時又吐旱火之烟融。銜帝命以下討兮。建千仞之脩鋒。乘飛霆而追逸景兮。歛瘡掃滅而無蹤。忽崩播其來會兮。走海岳之神公。龍車獸鬼不知其數兮。旗纛掩靄而冥蒙。漸俯偃以放進兮。鏘劍佩之相擊。司殺生之必信兮。知上帝之不汝容。旣約束以反職兮。退戰慄而愈恭。澤充塞於四海兮。獨淡然其無功。君之去兮。天門開。款閭闔兮。朝玉臺。羣僊迎兮。塞雲漢。儼前導兮。紛後陪。歷玉階兮。帝迎勞。君良苦兮。馬虺隤。閔人世兮。迫隘。陳下士兮。帝所哀。返瓊宮之嵯峨兮。役萬靈之喧呖。默清淨以無爲兮。時節狩於斗魁。詣通明而獻黜陟兮。軼蕩蕩其無回。忽表裏之煥霍兮。光下燭於九陔。時遊目以下覽兮。五岳爲豆。四溟爲杯。俯故宮之千柱兮。若毫端之集埃。來非以爲樂兮。去非以爲悲。謂神君之旣返兮。曾顏咫尺之不違。陞祕殿以內悸兮。魂凜凜而上馳。忽寤寐以有得兮。沐浴而獻辭。是邪非邪。臣不可得而知也。

黃泥坂辭

蘇軾

出臨臯而東驚兮。並蕞祠而北轉。走雪堂之坡陁兮。歷黃泥之長坂。大江洶以左繚兮。渺雲濤之舒卷。草木層累而右附兮。蔚柯丘之葱蒨。余旦往而夕還兮。步徙倚而盤桓。雖信美不可居兮。苟娛余於一盼。余幼好此奇服兮。襲前人之詭幻。老更變而自哂兮。悟驚俗之來患。釋寶璐而被繪絮兮。雜市人而無辨。路

悠悠其莫往來兮。守一席而窮年。時游步而遠覽兮。路窮盡而旋反。朝嬉黃泥之白雲兮。莫宿雪堂之青烟。喜魚鳥之莫余驚兮。幸樵蘇之我媿。初被酒以行歌兮。忽放杖而醉偃。草爲茵而塊爲枕兮。穆華堂之清晏。紛墜露之溼衣兮。升素月之團團。感父老之呼覺兮。恐牛羊之子踐。於是蹶然而起。起而歌曰。月明兮。星稀。迎余往兮。餞余歸。歲旣晏兮。草木腓。歸來歸來兮。黃泥不可以久嬉。

南山之田

王令

南山之田兮。誰爲而蕪。南山之人兮。誰教墮。且來者何爲兮。徑者誰趾。草漫靡兮。不種何自。始吾往兮。無耜。吾將歸兮。客我止。要以田兮。寄於治。我耕淺兮。穀不遂。耕之深兮。石撓吾耒。吾耒撓兮。嗟耕難。雨專水兮。日專旱。借不然兮。穎以秀。螟懸心兮。騰開口。我雖力兮。功何有。雖然不可以已兮。寧時我違。而我不時負。

我思古人

王令

我所思兮。忽古今之異時。生茲世以爲期。欲勿思而柰何。獨斯人之弗見。故永懷而自歌。樂吾行之舒舒。忽忘世之汲汲。睇萬里以自驚兮。豈寧俯以效拾。載重道遠兮。予欲行而誰與。累九鼎以自重兮。固廷之不舉。矯身以爲衡兮。權世之重輕。廣道以爲路兮。聽人之來去。

山中辭

王令

山中兮。何遊登。彼山兮。樂夫高。弃吾馬兮。取步降。吾車兮。足兩屨。石當道兮。行旁。木礙上兮。下俯。曾蹈險之非艱。聊憑高而下顧。何所視之乃牛。而獨見之如鼠。彼侏侏者。出其下兮。曾其身之非僂。于嗟徂兮。離

妻之死則已古。不較其爲短長兮。何獨計其高下。山之高兮。崔嵬。山之路兮。百折而千回。趨前行而就挽。笑顧後使推之。彼遊者誰兮。何以子之車來。

江上辭

王令

江之水兮東流。沂湍流兮寄吾舟。舟無桡兮載函重。風乘波兮棹人用。濟不濟兮柰何。橫中流兮涕滂沱。來何爲兮不待。今雖嗟兮安悔。舟方乘兮人不吾以。覆且溺兮我同人死。江之水兮東流。濟欲濟兮何由。水浸浸兮灘露。暮濤下兮夜潦收。舟不行兮推之於陸。力不足兮汗顏。行無由兮塗足。時不逝兮柰何。歸日暮兮塗遠。風高兮水波。行躊躇兮竚望。聊逍遙兮永歌。江之水兮東流。淞湍流兮望歸舟。舟來歸兮何時。步芳洲兮濯足。陟南山兮采薇。江風波兮日暮。望夫人兮未來。江之水兮東流。淞湍流兮望歸舟。風滔滔兮浪波若丘。嗟往者兮未還。惜行人兮將去。去何道兮歸何時。執子手兮牽子衣。行何如兮來復濟。豈無兮它時。

放言

狄遵度

愒兮忽長。不樂兮安極。眺平野兮千里。坐空館兮四壁。對寒日兮蒼莽。披勁風兮悽慄。鳥悲鳴兮羣喪。草離披兮路塞。嗚呼。物之生天地間。雖大小參差不齊。然其材亦各有所適。草木不以微而廢其用。陵岳不以大而專其職。獨人事豈不然。亦由茲而可識。性之稟既有賢愚之異。位之設亦有貴賤之隔。使大小各得盡其材。譬一體之和。懌及年歲之未暮兮。思欲竭其所得。曷獨求己之爲兮。顧泯然者可惻。古之聖賢。固權瘁而不敢暇兮。畏天命之誅殛。天之賦已以是材兮。敢不奉而驚惕。嗚呼。而今而後。用與不用。吾將

繫之於天在己之有固斯須而不敢斃。

幽命

沈括

山木嘯兮雲幽幽。秣我歸馬兮無爲久留。江颺翔兮雨漫漫。回予車兮水漸臆。仲何爲兮中野。澹將洋兮疎駕。目逝兮形留。鬱逍遙兮日下。瀉慕兮流觀。撫節兮浩望。駟黃辰兮靡騁。旋吾轡兮焉往。不我虛兮斯辰。思何爲兮執掌。

題禹廟壁

劉彝

皇祐二年秋。予自閩由太末登天台。川陸間行。至于郡。凡數千里。觀山澤之可樹殖者。或荒瀦焉。田畝之可畎澮者。或漫滅焉。自剡而西。遇雨數日。農田甚豐。垂稷而遭霖潦之害。春夏斯民飢孳。瘠未起者。重困是水。予心哀焉。嗚呼。宜樹殖而荒瀦。凍餒之源也。宜畎澮而漫滅。水旱之道也。天地非不生且育。然而吾民重罹飢困。贊乎化育之道。未至焉耳。夜過鑑湖。人指南山而告曰。禹廟也。予具冠帶瞻望。內起恭肅。不覺感歎泣下。旣而欲誌其事。厥明次于會稽之門。遂寫屋壁。其歌曰。地生財兮天生時。聖賢之贊育兮咸適其宜。畎澮距川兮川距海。水旱罔至兮民無凍飢。畝田是起兮帝載以熙。萬世永賴兮胡不踐履而行之。嗚呼禹乎。誰知予心之增悲。

詆風穴

劉攽

背崧右洛兮維汝泱泱。左界韓鄭兮前關魯陽。陵丘曼延兮土膏脈良。生植遂茂兮厥天且長。咨飄風兮胡猥而狂。乘冬肆威兮怒號以常。通晝亘夕兮日月奪光。宇宙昏惑兮顛倒玄黃。折枝排根兮松桂毀傷。

衝空動榷兮。披戶登堂。獸亡其曹兮。鴻鵠失翔。問誰尸之兮。底此不祥。曰茲穴之詭異兮。竊神之機。幽嶮窮奇兮。狹中不夷。鼓舞蜚廉兮。招搖南箕。平居無事兮。淫樂而爾爲。歷九州而遐觀兮。孰樂土其若此。獨蠻夷之僻陋兮。乃自古記之矣。邈炎洲之荒忽兮。汨大海其千里。上霧下潦兮。墊隘瘴癘。魍魅羣遊兮。樂人之死。蓄爲颶風兮。瘠毒疵癘。扶濤駕山兮。舟航糜毀。歷日旋時兮。然後得已。西極曠蕩兮。陰積無垠。流沙不波兮。瀚海無泉。五穀不生兮。蓬棘藜藿。熱風之來兮。天地翳昏。觸肌爲瘡兮。四肢若燔。亦幸有老駝之先知兮。嗚呼而告言歸。命野獸兮。厘焉得存。彼鬼方之幽昧兮。固宜以然。慨土中之與鄰。不避不偏。胡宄神之忍兮。固蔽以頑。用夏變夷兮。至于髦蠻。外百里而不同兮。茲邑獨爲匪民。帝之高居兮。臨照在下。虎豹服仁兮。九關莫阻。巫咸上勸兮。帝命斯許。巨靈夸娥兮。幹其絕膂。拔山投石兮。北海之渚。大野夷爽兮。八風攸敍。號令專一兮。莫予敢侮。蒙常聖時兮。維民所取。宄神雖悔兮。夫孰閔汝。

弔王右軍宅辭

錢公輔

晉王右軍宅于越之蕺山。爲浮圖而繪像存焉。好事者猶能指墨池鵝池之遺迹。而表識其上。予嘗恨東南山之佳水之勝。多奪於浮圖氏。而衣冠隱淪。無一人得之者。旣過右軍宅。擲文以弔之。曰。晉去今兮。千齡未餘。彼山峨兮。晉賢人之故居。故居泯其幾時兮。今變化於浮圖。嗚呼傷哉。絕雲巍崗。葱蔥蒼蒼。竹茂草美。烟高氣長。古松蒼兮。虬盤怪石。呀兮。虎驤前稽。嶺之橫峙兮。下鑑水之輝光。遠市井之喧畢兮。據城壘之低昂。春可遊而縱望兮。夏可息而淒涼。秋可登而感槩兮。冬可處而樂康。無一時之不得宜兮。環一目而周四方。眞孤高之所廬兮。非醜族之能當。生宜形體之放浪兮。死宜魂魄之棲藏。嗚呼。

傷哉。彼靈何之兮。默不聞一怪與一祥。果無知兮。徒結塞予之中腸。果有知兮。奚坐視緇徒之賊戕。將後葉之湮淪兮。無能振其祖芳。抑亂離之荐遭兮。百易主而百亡。吾固弗得而知兮。茲涕泗而徜徉。嗟道之衰兮。異類蠹侵而日昌。嗟越之雄兮。豈微一丈夫之勇剛。如可贖兮。雖萬金可捐。萬室可償。胡恬夷而莫醜兮。往往助資其棟梁。聊捐文於山之側兮。將鑿石乎洲之堂。嗟嗟。越人窮千萬春兮。宜吾文之弗忘。

解雨送神曲

李常

怒風兮揚塵。日爍石兮將焚。水泉竭兮厚地裂。嘉穀棄兮孰彜且耘。神龍兮靈壑。挹清波兮幽潰。鳴鼉鼓兮舞神覲。庶下鑿兮霈祥氛。
觸石兮山巔。倏四驚兮天邊。驚霆怒兮電熾。翻河漢兮繩懸。黍離離兮發嘉穗。壠高下兮水潺湲。謹吾人兮拜祝。請奉事兮無有窮年。
肅旂旆兮先驅。咽簫笳兮擁歸輿。椒醕甘兮牲幣潔。如肸鬻兮爲之踟躕。瞻前山兮嗟峨。指去路兮縈紆。神德大兮報無以稱。徒感涕兮長吁。

超然臺詞

文同

方仲春之盎盎兮。覽草木之菲菲。胡怫鬱於余懷兮。悵獨處而無依。陟危譙以騁望兮。丘阜摧萎而參差。窮莽蒼以極視兮。但浮陽之輝輝。忽揚颺以晦沫兮。灑氣靈於四垂。躡余之所行兮。溷溷其安之。蛻余神以遐驚兮。控次寥而上馳。闢曖曖以涉瀕洞兮。揮霓旌而掉雲旗。擺長彗以夭矯兮。從宛虹之委蛇。曳采旒以役朱鳳兮。駕瓊輶而驅翠螭。涉橫潢以出沒兮。歷大隴而蔽虧。狝萬里以一息兮。俯九州而下窺。有

美一人兮在東方。去日久兮不能忘。凜而潔兮岌而長。服忠信兮被文章。中繳繳兮外琅琅。蘭爲襟兮桂爲裳。儼若植兮奉璋璋。戢光耀兮祕芬芳。賈世用兮斯卷藏。遊物外兮肆猖狂。余將從之兮遙相望。回羊角兮指龍肱。轉嶠夷兮蹴扶桑。筇參山兮聊徜徉。下超然兮拜其旁。顧有問兮言非常。忽掉頭兮告以祥。使余脫亂天之罔兮。解逆物之韁。已而釋然兮。出有累之場。余復僊僊兮。來歸故鄉。

濂溪詩

黃庭堅

春陵周茂叔。人品甚高。胸中灑落。如光風霽月。好讀書。雅意林壑。初不爲人窘束。世故權輿。仕籍不卑。小官。職思其憂。論法常欲與民決訟。得情而不喜。其爲少吏。在江湖郡縣。蓋十五年。所至輒可傳任。司理參軍。運使。以權利變具獄。茂叔爭之不能。投告身欲去。使者斂手聽之。趙公悅道。號稱好賢。人有惡茂叔者。趙公以使者臨之甚威。茂叔處之超然。其後迺寤曰。周茂叔。天下士也。薦之於朝。論之於士大夫。終其身。其爲使者。進退官吏。得罪者。自以不寃。中歲乞身。老於潁城。有水發源於蓮花峯下。潔清紺寒。下合於潁江。茂叔濯纓而樂之。築屋於其上。用其平生所安樂。媿水而成。名曰濂溪。與之游者曰溪名未足以對茂叔之美。雖然。茂叔短於取名。而惠於求志。薄於徼福。而厚於得民。非於奉身。而燕及瑩。陋於希世。而尙友千古。聞茂叔之餘風。猶足以律貪。則此溪之水。配茂叔以永久。所得多矣。茂叔諱惇。實避厚陵。奉朝請名。改惇頤。二子壽。皆好學承家。求余作濂溪詩。思詠潛德。茂叔雖仕宦三十年。而平生之志。終在丘壑。故余詩詞不及世故。猶髣髴其音塵。

溪毛秀兮水清。可飯羹兮濯纓。不漁民利兮。又何有於名。絃琴兮觴酒。寫溪聲兮。延五老以爲壽。蟬蛻塵

埃兮玉雪自清。聽潺湲兮鑒澄明。激貪兮敦薄。非青蘋白鷗兮。誰與同樂。

津有舟兮蕩有蓮。勝日兮與客就。聞擊音兮。不知何處散髮醉。高荷爲蓋兮。倚芙蓉以當妓。霜清水寒兮。舟著平沙。八方同宇兮。雲月爲家。懷連城兮。珮明月。魚鳥親人兮。野老同社而爭席。白雲蒙頭兮。與南山爲伍。非夫人攘臂兮。誰余敢侮。

明月篇贈張文潛

黃庭堅

天地具美兮。生此明月。陞白虹兮。貫朝日。工師告余曰。斯不可以爲佩。棄捐櫝中兮。三歲不會。霜露下兮。百草休。抱此耿耿兮。與日星遊。山中兮。招招耕而食兮。無卹。榛艾藜藿前。吾牛兮。痕不可更扶。淺耕兮。病歲。深耕兮。石嬰。耜登山兮。臨川。雉得意兮。魚樂。小風兮。吹波。從其友兮。尾尾。日下兮。川逝。射雉兮。喪余一矢。佳人兮。潔齊。悵何所兮。行媒。南山有葛兮。葛有本。我羞餽兮。以君之鉏來。

秋風三疊寄秦少游

邢居實

秋風夕起兮。白露爲霜。草木憔悴兮。竊獨悲此衆芳。明月皎皎兮。照空房。晝日苦短兮。夜未央。有美一人兮。天一方。欲往從之兮。路渺茫。登山無車兮。涉水無航。願言思子兮。使我心傷。

秋風淅淅兮。雲溟溟。鳴臯晝號兮。蟋蟀夜鳴。歲月徂邁兮。忽如流星。少壯幾時兮。老冉冉其相。仍展轉反側兮。從夜達明。悵獨處此兮。誰適爲情。長歌激烈兮。涕泣交零。願言思子兮。使我心悵。

秋風浩蕩兮。天宇高。羣山逶迤兮。溪谷寂寥。登高望遠兮。不自聊。駕言適野兮。誰與遊遨。空原無人兮。四顧蕭條。猿狖與伍兮。麋鹿爲曹。浮雲千里兮。歸路遙。願言思子兮。使我心勞。

華清宮詞五首

田 晝

帝將汰兮般樂。睠名山兮華薄。羌誰爲兮雲中。眇宮殿兮戍削。飛檐兮轍轍。繡栢兮錯稅。颺壁門兮鈿砌。承桂柱兮璇跋。梅有壇兮椒有苑。燠芳蓮兮水澹澹。睇組岫兮晃朗。建明珠兮直上。彤樓兮綠閣。瑤壇兮羽幄。犬羊兮西清。鹿得名兮山客。殷復殷兮夷城。駕繚復繚兮女墻下。儼龍旌兮鳳蓋。悅而明兮忽而曖。與女獵兮河曲。金爲羈兮玉爲勒。與女席兮天涯。霓爲裳兮羽爲衣。望夫君兮余思。樂不極兮。告我以不歸。悵千秋兮若此。時不可兮屢得。

有美一人兮心所歆。被姣服兮躡纖英。朝與出遊兮夜忘歸。山之樊兮羅百司。鉤膺兮陸續。五貴般兮相屬。沫驪駒兮驚寶軸。諸娣從之兮。兩大國。犀屏兮象筵。墮珥兮委鈿。捐珠璣兮霧散。衰蘭氣兮宛延。霞冠兮翠珮。粲巾幘兮雲之際。合衆豔兮儵爚。轉清臚兮流涕。歛音兮眇眇。芳塵兮縹縹。騁祕樂兮天中。播鐘虞兮夾陳。龜盤兮羯鼓。塤篪高張兮。紛絲絲而來下。奄四海兮黷侈。君之心兮未已。邑里移兮朝會遷。光歲蕤兮列貂蟬。顧文葆兮最鳳。悄不愕兮不言。障王座兮金雞。錫之帶兮十圍。夫人自秉兮美質。蹇何爲兮爾疑。

浴芳華兮瑤池。待夫人兮未來。忽中變兮偃蹇。拓九關兮洞開。鬱勃兮駸駸。策駁駁兮奔螭。摧鉦鼓兮蔽野。戈鋌動兮拂霓。操吾矛兮反吾逐。兵接腋兮車接轂。帝順動兮將焉薄。屠雲駒兮徹豐屋。龍轡兮華輶。和鑾兮啾啾。擁周衛兮失次。旂旗紛兮九旂。臣鄰兮嬪御。任攘兮載路。鈿扇兮榆翟。魚須笏兮赤纒。烏膽駕君兮透遲。憑余怒兮不夷。跪美人兮道曲。悵羽袖兮職禩。朝弛鞅兮山阿。夕流憇兮江澗。折瓊枝兮蕙

蔭將以遺兮無所。歌汾篇兮悲秋。風邑邑兮余愁。敘與爾兮目結。心騷屑兮顧懷。

天兵合兮響羣兇。銷氛沴兮奏膚公。皇穆穆兮來歸。蓋將款兮層宮。秋風兮颼颼。紅實兮離離。泯無人兮跡絕。敞紫殿兮金扉。霜霑庭兮月侵墀。蹇累思兮失玻璃。槍石溜兮激激。濯芳葩兮儼如昔。錦鳧兮繡鴛。思柔匹兮妍媸。溟海阻兮太息。魂之來兮秋之夕。涕滢滢兮增悲。敕所思兮爲余繫之。解幃袂兮玉體。謂芬馨兮可佩。捉而衽兮原中。遺而履兮行路。覽故處兮猶疑。徒丹楹兮延佇。

秣余馬兮脂余車。歲二月兮西南徂。登朝元兮聘望。興廢忽兮愁予。龍垌兮麀麀。清川兮瀾瀾。浮綠樹兮中天。非雲非煙兮眇如薺。蔚豐壤兮氣冲融。疇隴靜兮芳卉明。灼衮服兮雅豔。發組繪兮鮮榮。祥光兮繞繚紅霓。迴氛兮海收潦。軼咳語兮曾穹。薄飛鸞兮下眺。撫華清之巨麗兮。孰轉踵而失之。望秦陵之坡陀兮。羗鬱鬱而蔽之。驪之山兮畢之原。丘壘壘兮草芊芊。諒前世兮俱盡。余又悲兮有唐。

宋文鑑卷第三十一

幸西京詔

祖宗升配詔

賜中書門下詔

皇太后還政議合行典禮詔

通商茶法詔

求直言詔

賜中書門下置寶文閣學士待制詔

禁內降詔

立皇子詔

爲雨災許言時政闕失詔

封太祖皇帝後詔

皇太后付中書門下還政書

太皇太后賜門下詔

太皇太后賜門下詔

盧多遜

宋 綬

歐陽修

歐陽修

歐陽修

韓 維

張方平

胡 宿

王 珪

王 珪

王 珪

蘇 軾

蘇 軾

蘇 軾

合祭天地詔

范祖禹

元符日食求言詔

曾肇

賜夏國主詔

韓琦

賜觀文殿學士禮部尚書王舉正不允詔

歐陽修

賜夏國主詔

歐陽修

賜南平王李德政日曆詔

宋祁

賜判永興軍韓琦再乞相州不允詔

王安石

賜守司徒檢校太師兼侍中韓琦詔

王安石

賜富弼乞判汝州允詔

王安石

賜知亳州歐陽修乞致仕不允詔二道

王安石

賜答曾公亮詔

王安石

賜特放知潭州燕度待罪詔

王安石

賜宰臣韓琦不赴文德殿立班待罪不允詔

王珪

賜河陽三城節度使兼侍中曾公亮乞免冊禮允詔

王珪

賜判亳州富弼乞罷使相不允詔

王珪

賜吳奎免愆命不允詔

王珪

戒諭夏國主詔

王珪

賜宰臣韓琦請郡不允詔附卷末

呂公著

賜王廣淵張洸獎諭詔

元絳

賜新除落致仕依前光祿大夫范鎮赴闕詔

蘇軾

賜尚書刑部侍郎范百祿乞外任不允詔

蘇軾

沿路賜奉安神宗皇帝御容禮儀使呂大防銀合茶藥詔

蘇軾

賜阿里骨詔

蘇軾

賜正議大夫知鄧州蔡確乞量移弟碩允詔

蘇軾

賜端明殿學士銀青光祿大夫致仕范鎮獎諭詔

蘇軾

賜觀文殿大學士集禧觀使蘇頌乞致仕不允詔

范祖禹

賜新除觀文殿大學士中太一宮使范純仁令赴闕供職詔

曾肇

幸西京詔

盧多遜

定鼎洛邑。我之西都。燔柴泰壇。國之大事。況削平江表。底定南方。惟率土之混同。自上天之鑒祐。內慙涼德。感是洪休。得不罄以恭虔。申其告謝。瞻惟京而西顧。兆陽位於南郊。豆籩陳有楚之儀。黍稷奉惟馨之薦。朕今暫幸西京。取四月內選日。有事於圓丘。宜令有司。各揚其職。禮容儀衛。典故在焉。祇事肅成。無或煩擾。諸道州府。不得以進奉為名。輒有率斂。凡在中外。當體予懷。

祖宗升配詔

宋 綬

朕聞王者奉宗廟貴功德。禮天祀地。則有侑神作主之尊。審諦合食。則有百世不遷之重。朕以寡薄。獲承天序。實賴先烈。汜臻治平。懼不能揚祖宗之休。丕顯懿鑠。夙夜惟念。弗遑寧居。恭以太祖皇帝。奮淳耀之精。輯樂推之運。屬五代澆季。中華剖裂。英威一震。罔不率俾。夷僭黜暴。皇綱再張。革其桀驚。納諸軌度。規摹闕遠。詒萬世法。太宗皇帝。躬盛聖之資。乃膺繼體。及來閩粵。復汾晉。方夏一統。尉候萬里。興文教。拔羣材。思皇政經。憂勞庶務。惠澤漸漬。浹人骨髓。真宗皇帝。欽明孝熙。恢纘鴻緒。勤儉以率下。哀矜以謹刑。撫和二邊。兵不復用。民靡知役。物遂其生。因時昭泰。憲章考古。登封巡祭。聲明焯耀。享國多載。仁恩溥博。昔商周之際。則長發大禘。嚴父配天。逮於漢氏。亦能尊二宗。立廟樂。朕甚慕之。肆我藝祖之受天命。建大業。可謂有功矣。二聖繼統。重雍累洽。可謂有德矣。其令禮官稽按典籍。辨崇配之序。定二祧之位。中書門下審加詳閱。稱朕意焉。

賜中書門下詔

歐陽修

朕纘承丕基。撫有方夏。謂教之不可以家至而行之。每務於身先。惟是儉勤。敢忘勉勵。期與羣庶。臻于富康。而人殆久安。驕於佚欲。物豐太盛。耗以浮虛。苟奉養以自私。忘僭奢之爲戾。士民交黷。貴賤靡分。惟其彊力之能。無復等威之制。考於著令。雖有舊章。顧在攸司。鮮聞用法。民遂安於常習。弊罔革以滋深。紀綱旣紊於度程。風俗以至於流蕩。俾朕有欲治之意。不能副余之誠心。而民多自陷之愚。未免煩余之訓導。夫令信由於貴始。下化先於上行。眷予一二之臣。其率庶工而警職。俾爾多方之衆。勿踰常憲。一作法以干

刑庶漸革於侈風。以共趨於治路。凡居室之制。器用之度。冠服之章。妾媵之數。其令中外臣庶。遵守前後條詔。如有違犯。仰御史臺及開封府。糾察聞奏。其諸路州軍。卽委轉運使提點刑獄臣寮。及逐處長吏施行。布告中外。咸使聞知。

皇太后還政議合行典禮詔

歐陽修

朕頃以嗣承大統。方執初喪。過自摧傷。遂嬰疾恙。皇太后尊居母道。時遭家難。閱余哀荒。俯徇誠請。勉同聽覽。用適權宜。賴保護之勤。劬獲清明。而康復。恭惟坤德之至靜。實厭事機之久煩。殆此彌年。荐承諄誨。顧寔繁於庶政。難重浼於睿慈。然而方國多虞。則共濟天下之務。惟時無事。亦宜享天下之安。先民有言。無德不報。雖日以三牲之養。未足盡於予心。而刑于四海之風。必務先於孝治。惟是事親之禮。蓋存有國之規。當極尊崇。以稱朕意。應合行儀範等事。令中書門下。樞密院。參議以聞。

通商茶法詔

歐陽修

古者山澤之利。與民共之。故民足於下。而君裕於上。國家無事。刑罰以清。自唐末流。始有茶禁。上下規利。垂二百年。如聞比來。爲患益甚。民被誅求之困。日惟咨嗟。官受濫惡之入。歲以陳積。私藏盜販。犯者實繁。嚴刑峻誅。情所不忍。使田閭不安其業。商賈不通于行。嗚呼。若茲是於江湖間。幅員數千里。爲陷窳以害吾民也。朕心惻然。念此久矣。間遣使者往就問之。而皆謹然。願弛權法。歲入之課。以時上官。一二近臣。件析其狀。朕嘉覽于再。猶若慊然。又於歲輸裁減其數。使得饒阜。以相爲生。剗去禁條。俾通商賈。歷世之弊。一旦以除。著爲經常。弗復更制。損上益下。以休吾民。尙慮喜於立異之人。緣而爲姦之黨。安陳奏議以惑

官司必實明刑。用戒狂謬。布告遐邇。體朕意焉。

求直言詔

韓維

朕涉道日淺。矧于致治。政失厥中。以干陰陽之和。乃自冬迄春。旱暵爲虐。四海之內。被災者廣。間詔有司。損常膳。避正殿。冀以塞責消變。勞日滋久。未蒙休應。嗷嗷下民。大命近止。中夜以興。震悸靡寧。永惟其咎。未知攸出。意者。朕之聽納。不得於理歟。獄訟非其情歟。賦斂失其節歟。忠謀讜言。鬱於上聞。而阿諛壅蔽。以成其私者衆歟。何嘉氣之久不效也。應中外文武臣寮。並許實封。直言朝政闕失。朕將親覽。考求其當。以輔政理。三事大夫。其務悉心交做。成朕志焉。

賜中書門下置寶文閣學士待制詔

張方平

昔我藝祖。神武不殺。誕昌寶祚。太宗修文德。以光大業。真宗崇儒術。以承休命。仁宗善繼謨烈。化成治定。咸有述作。煥于簡編。河漢昭回。奎壁相照。迺規層構。遂在西清。憲上帝藏書之府。章累朝稽古之盛。並揭嘉名。以登峻望。俾服凝嚴之職。因爲咨訪之地。誠聖哲之遠業。熙洽之高致也。仁祖升遐。先皇纂御。首命近列。論次遺文。鈿軸寶函。未終繙錄。白雲紫氣。遽復上賓。今告畢功。甫將安奉。大訓九歌之重。垂世共長。廣內祕室之藏。貽謀無極。祇循故事。遙成先志。寶文閣宜置學士直學士待制。著于令。

禁內降詔

胡宿

朕紹承駿烈。祇服先猷。蹈道以臨庶邦。慎憲而持大柄。馭之于奪。正以賞刑。悉任至公。靡容紊法。比有儉幸。肆興妄圖。或違理覬恩。或負罪希貸。率求內出。間亦奉行。蠹政虧風。莫斯爲甚。雖屢頒於詔約。曾未絕

於私祈兼慮臣庶之家。近貴之列。交通請託。巧詐營爲。陰致貨賂。密輸珍玩。蚤緣結納。侵撓權綱。方務澄清。當嚴禁詰。儻復違犯。斷在必行。重念成湯以六事責躬。女謁包苴之先戒。管氏以四維正國。禮義廉恥之具張。矧宗祀之涓成。屬祥釐之均被。嘉與中外。緇此非衰。勉于自新。以降至治。今後應內降指揮。特與恩澤。及原減罪犯者。並仰中書樞密院。并所承受官司。具前後詔條執奏。不得施行。及臣庶家。如有潛行貨賄。結託貴近者。並令御史諫官覺察論奏。咨爾丞弼。體朕意焉。

立皇子詔

王珪

人道親親。王者之所先務也。蓋二帝之隆。治繇茲出。朕甚慕之。右衛大將軍岳州團練使英宗御諱皇兄濮安懿王子。猶朕之子也。少鞠于宮中。而聰知仁賢。見于夙成。日者選於宗子。近籍命以治宗正之事。使使者數至其第。迺崇執謙退。久不受命。朕默然有嘉焉。朕蒙先帝遺德。奉承聖業。罔敢失墜。夫立愛之道。自親者始。固可以厚天下之風。而上以嚴夫宗廟也。其以英宗御諱爲皇子。

爲雨災許言時政闕失詔

王珪

蓋聞古之聖賢在位。陰陽和。風雨時。日月光。星辰靜。黎民阜蕃。以底休平。朕甚慕之。朕猥以眇身。託于王公之上。夙夜以思。惟懼不能以承先帝鴻業。而比年以來。水潦爲沴。迺八月庚寅大雨。京師室廬墊傷。被溺者衆。大田之稼。害于有秋。竊迹災變之來。曾不虛發。豈朕之不敏於德。而不明於政歟。將天下刑獄滯。冤賦繇煩苦。民有愁歎。亡聊之聲。以奸其順氣歟。不然。則何天戒之甚著也。今飭躬焦思。欲銷復大異。而未聞在位者之忠言。進祈自新。厥路何繇焉。應中外臣寮。並許上實封言時政闕失。及當世之利病。可以

佐元元者。悉心以陳。毋有所諱。執政大臣。皆朕之股肱。其協德交修。以輔朕之不逮。

封太祖皇帝後詔

王珪

昔我藝祖皇帝之興。以天發之期。兵未始一血刃。而卒再造區夏。其大謀盛烈。被諸萬世而莫高焉。朕奉承聖緒。夙夜不敢康。乃顧後之子孫。寢微弗顯。而有司未嘗議封爵之文。豈朕所以尊大統。推親親之意哉。且積厚者其流遠。施大者其報豐。宜令中書門下。考大宗之籍。以屬近而行尊者一人。裂土地而王之。使常從獻于郊廟。世世勿復絕。

皇太后付中書門下還政書

王珪

日者昊天不弔。先帝上賓。遽揚末命之言。方結未亡之痛。而皇帝踐祚之始。銜哀過情。忽傳詔於外廷。請預聞於庶政。載念承邦之重。累申還辟之文。皇衷未回。羣聽猶鬱。顧人子之誠。雖至。然國家之事。靡安。況日聽治朝。躬發神明之斷。出馳禁蹕。衆聞輿馬之音。百姓莫不交欣。三靈以之薦祉。吾嘗視前史之戒。思絜聖之圖。將退飭於母儀。庸進彊於君德。從容房闈。不亦美歟。昨權同聽政事。候皇帝康復。日如舊。去歲兩曾降手書還政。輔臣等並於皇帝御前納下。今來聖躬已安好。其軍國事更不同處分。故茲示諭。宜體至懷。

太皇太后賜門下詔

蘇軾

皇帝嗣位于茲四年。華夷來同。天地並應。而皇太妃以恭儉之德。鞠育之恩。雖典冊以時奉行。而情文疑有未稱。皇帝以祖考之奉。尊無二上。而吾惟春秋之義。母以子貴。其推天下之養。以慰人子之心。宜下禮

部太常寺討尋。如於典故。有褒崇未盡事件。令子細開具聞奏。

太皇太后賜門下詔

蘇軾

官冗之患。所從來尙矣。流弊之極。實萃于今。以闕計員。至相倍蓰。上有久間失職之吏。則下有受害無告之民。故命大臣。考求其本。苟非裁損入流之數。無以澄清取士之源。吾今自以眇身。率先天下。永惟臨御之始。嘗敕有司。蔭補私親。舊無定限。自惟薄德。敢配前人。已詔家庭之恩。止從母后之比。今當又損以示必行。夫以先帝顧託之深。天下責望之重。苟有利於社稷。吾無愛於髮膚。矧此恩私。實同毫末。忠義之士。當識此誠。各忘內顧之心。共成節約之制。今後每遇聖節大禮生辰。合得親屬恩澤。並四分減一。皇太后皇太妃準此。

合祭天地詔

范祖禹

朕聞五帝不相沿樂。三王不相襲禮。世有損益。因時制宜。惟我祖宗。嚴奉郊廟。當遣官攝事。皆考合於前文。唯奠玉親祠。自裁成於大禮。每以三歲對越二儀。成秩百神。大賚四海。迄先帝元豐之末。講方丘特祭之儀。蓋將補一代之闕容。振百王之墜典。朕惟菲德。嗣守丕基。列聖已行。謹當遵奉。先朝未舉。懼不克堪。是以昔歲仲冬。竭誠大祀。神祇饗答。祖考燕寧。前詔有司。載加集議。猶欲咨度諸儒之論。稽參六藝之文。然理既無疑。則事無可議。斷自朕志。協于僉言。祇率舊章。永爲成式。今後南郊合祭天地。依元祐七年例施行。仍罷禮部集官詳議。

元符日食求言詔

曾肇

朕以眇身始承天序。任大責重。罔知攸濟。永惟四海之遠。萬幾之煩。豈予一人所能徧察。必賴百辟卿士。下及庶民。敷奏以言。輔予不逮。矧太史前告。天將動威。日有食之。期在正月。變異甚鉅。殆不虛生。夙夜以思。未燭厥理。將以彌綸初政。消弭天菑。非藥石之規。孰開朕聽。況今周行之內。人有所懷。芻蕘之中。言亦可採。凡朕躬之闕失。若左右之忠邪。政令之否臧。風俗之媿惡。朝廷之德澤。有不下究。閭閻之疾苦。有不上聞。咸聽直言。毋有忌諱。朕方開讜正之路。消壅蔽之風。其於鯁論嘉謀。唯恐不聞。聞而行之。唯恐不及。其言可用。朕則有賞。言而失中。朕不加罪。朕言惟信。非事空文。尙悉乃心。毋悼後害。應中外臣僚。以至民庶。各許實封言事。在京於合屬處投進。在外許於所在州軍附遞。以聞。布告邇遐。咸知朕意。

賜夏國主詔

韓琦

昨以夏國累年以來。數興兵甲。侵犯疆陲。驚擾人民。誘迫熟戶。去秋乃復直叩大順。圍迫城寨。焚燒村落。抗敵官軍。邊奏屢聞。人情共憤。羣臣皆謂夏國已違誓詔。請行拒絕。先皇帝務存含恕。且詰端由。庶觀逆順之情。以決衆多之論。逮此遜章之稟命。已悲仙馭之上賓。朕纂極云初。包荒在念。仰循先志。俯諒乃誠。旣自省於前辜。復願堅於永好。苟奏封所敍。忠信無渝。則恩禮所加。歲時如舊。安民保福。不亦休哉。

賜觀文殿學士禮部尙書王舉正乞致仕不允詔

歐陽修

夫朝廷之廣大。賢雋之衆多。必有皤然耆壽之臣。以當上所優禮之異。或事思所訪。則有老成。俾時之式。瞻以爲人望。故禮雖七十。猶有不得謝者焉。卿懿文高行。有君子之風。清節令聞。爲當世所重。閱書祕殿。日侍清閑。進讀經筵。坐論道德。固非有官司之責。筋力之勞。宜思少安。副我眷待。

賜夏國主詔

歐陽修

朕嗣守不圖。日新庶政。方推大信。以協萬邦。思與藩屏之臣。永遵帶礪之約。矧勤王而述職。固奕世以推誠。而近年以來。將命之使。或不體朝廷之意。罔循規矩之常。多於臨時。率爾改作。既官司之有守。致事體以難從。且下脩奉上之儀。本期效順。而君有錫臣之寵。所以隆恩。豈宜一介於其間。輒以多端而生事。在國家之撫御。固廓爾以無疑。想忠孝之傾輸。亦豈欲其如此。故特申於旨諭。諒深認於眷懷。今後所遣使人。更宜精擇。不令妄舉。以紊彝章。所有押賜押伴使臣等。亦已嚴行戒勵。苟有違越。必寘典刑。載惟信誓之文。炳若丹青之著。事皆可守。言貴弗違。毋開間隙之萌。庶敦悠久之好。

賜南平王李德政曆日詔

宋 祁

頽曆之義。以初爲常。俾一天下之歸。用謹人時之授。以卿列壤南裔。率職本朝。宣我恩化。慰彼黎庶。每屬歲元之會。必榮廟朔之藏。朕亦推處禴祥。裁輔舒慘。申命太史。分次左方。宜案象以奉行。表布和之胥泊。特茲馳錫。勿怠欽承。

賜判永興軍韓琦再乞相州不允詔

王安石

卿當國家之多難。任社稷之至憂。實能忠勤。以濟勳績。方均逸豫。適此外虞。煩我元功。良非得已。亦惟體國義不辭勞。今雖尙謀經武之時。非有蒐兵伐罪之事。坐臨諸帥。固可優游。何必舊邦。乃能休養。勉綏居息。以副倚毗。

賜守司徒檢校太師兼侍中韓琦詔

王安石

便道之鎮朝廷。故常來朝京師。朕意所欲使事曲折。既當聞知。忠言嘉謨。又所飢渴。雖知勤勤。可不勉哉。

賜富弼乞判汝州允詔

王安石

此飭使人具宣至意。就令賜告。冀遂寧瘳。卿嚴祇朕命。不敢違息。顧念吏卒。閱其久留。觸熱載馳。用忘勤。勤恭以事上。卿實有之仁及賤微。又能如此。忠誠所惻。豈獨朕心。從容小邦。姑以養福。勉綏吉祿。毋恤後艱。

賜知亳州歐陽修乞致仕不允詔二道

王安石

股肱名臣。與國同體。禮當得謝。朕尙難之。況年非告老之時。而勳在受遺之籍。不留屏輔。人謂斯何。姑體至懷。少安厥位。

卿勳德之舊。簡在帝心。從容一州。足以休養。而抗奏至於四五。必以田里爲歸。豈朕視遇故老。有不足於禮乎。何其求去之果也。欲喻至意。莫知所言。惟能勉留。實副勤佇。

賜答曾公亮詔

王安石

嘗裁變異。以戒人君。推之股肱。朕所不敢。元勳舊德。實賴交脩。譴告之來。必緣象類。明諭朕志。使當天心。庶幾君臣。並受遐福。不務出此。而果於辭權。是惟保身。豈曰謀國。

賜特放知潭州燕度待罪詔

王安石

卿受命方隅。助宣德化。姦兇弗率。乃觸大誅。引慝自歸。謂當譴黜。萬方有罪。責在朕躬。雖爾長民。豈專任此。

賜宰臣韓琦不赴文德殿立班待罪不允詔

王珪

天子之御正朝久而未講宰相之班百辟後亦從墜。搢臺簡之忽陳。規邦彝之浸略。蓋延英賜對。每險中。是之咨。故宣政留班。不及大昕之謁。矧在職之匪懈。奚引愆而靡寧。宜斥細嫌。用綏素曷。

賜河陽三城節度使兼侍中曾公亮乞免册禮允詔

王珪

天子臨軒拜三公。其禮舊矣。今朕以上公之秩。加于元臣。方戒有司。卜日而册授之。乃援比固辭。不能爲。朕引絀廷下。吁其禮何時而可復邪。雖用勉從。則匪朕心之懌。

賜判亳州富弼乞罷使相不允詔

王珪

朕初臨丕基。首撰大吏。方勞精而共務。忽引疾以屢辭。去雖險於歲年。念不舍於朝夕。適覽奏函之藪。又將使衰之還。且重祿所以賦上賢。樂郡所以優舊德。宜收曲慮。終保高名。

賜吳奎免恩命不允詔

王珪

天子惟君萬邦。建時百辟。以祇迪于乃事。矧曰左右之臣。以朝夕承義。乃辟。予敢有弗欽。爾克懋。乃猷。茲庸命爾圖厥政。爾乃陳所以固辭。朕命者三。朕思有虞之世。羣臣皆讓。亦莫安厥位。終敕之曰。俞。汝往哉。爾弗遯聞于前人。其率時訓。惟厥中。嗚呼。慎爾止。毋倚乃身。乃罔弗孚于休。

戒諭夏國主詔

王珪

維乃祖考。克有西土。世爲漢藩輔。今爾弗蹈于前烈。迺竊署重爵。以使奉幣於朝。方邊吏拒還。乃復稽留。境上不及廷見之朝。洎朕親搢貢函。而僭我王命。實如所聞。朕疑風俗荒遠。未達朝廷之儀。雖然。棄信慢。

常誼不可長。其務思先世之約。以保綏于斯民。毋忽是圖。以奸我有邦之罰。今後所差使人。卽不得僭儼。

賜王廣淵張詵獎諭詔

元絳

洮岷之役。師旅載興。維予信臣。一迺忠力。百爾調發。並濟厥須。告凱奏功。實繫飲助。特加褒寵。有腆分頒。宜體眷懷。益圖來效。

賜新除落致仕依前光祿大夫范鎮赴闕詔

蘇軾

夫有德君子。以精神折衝。譬之麟鳳。能服猛鷲。朕虛懷前席。以致諸老。非敢必以事諉也。苟得黃髮之叟。皤然在位。則朝廷尊嚴。姦宄消伏。卿雖篤老。乃心王室。毋憚數舍之勞。以副中外之望。

賜尙書刑部侍郎范百祿乞外任不允詔

蘇軾

成王命君陳。商民在辟。予曰辟爾。惟勿辟。予曰宥爾。惟勿宥。惟厥中。古之有司。與天子相可。否蓋如此。而況公卿之間。議有異同。而不盡其說哉。例在中書。與在有司。固宜審處。歸于至當。而卿遽欲以此去位。非古之道也。其益修厥官。以稱朕意。

沿路賜奉安神宗皇帝御容禮儀使呂大防銀合茶藥詔

蘇軾

於赫神考。如日在天。雖光明無所不臨。而躔次必有所舍。肆予命爾。祇奉此行。禮既告成。勤亦良至。感慕之外。嘉歎不忘。

賜阿里骨詔

蘇軾

惟爾祖先。世篤忠孝。本與夏賊。日尋干戈。亦惟恃我朝廷爵秩之隆。用能保爾子孫黎民之衆。肆朕命爾。

嗣長乃師而承襲以來。強曾外擅。爾弗能禁。恣其所爲。遂據洮城。以犯王略。陰連夏賊。約日盜邊。朕愍屬羌之無辜。出偏師而問罪。元惡俘獲。餘黨散亡。山後底平。河南綏服。朕惟率酋豪而捍疆場。乃爾世功。叛君父而從仇讎。豈其本意。庶能改過。未忍加兵。果因物以貢誠。願洗心而效順。爾旣知悔。朕復何求。已指揮熙河路。更不出兵。及除已招納到部族外。住罷招納。依舊許般次往來買賣。及上京進奉。爾宜約束種類。共保邊陲。期寵祿於有終。知大恩之難再。勿使來款。復爲虛言。

賜正議大夫知鄧州蔡確乞量移弟碩允詔

蘇軾

以義責備。春秋有失教之譏。以情內恕。詩人有將母之念。碩之得罪。事在有司。難以貴近之親。而廢朝廷之典。及觀來請。有槩予心。重違兄弟急難之詞。以傷人子奉養之意。

賜端明殿學士銀青光祿大夫致仕范鎮獎諭詔

蘇軾

朕惟春秋之後。禮樂先亡。秦漢以來。詔武僅在。散樂工於河海之上。往而不還。聘先生於齊魯之間。有莫能致。魏晉以下。曹鄴無譏。豈徒鄭衛之音。已雜華戎之器。間有作者。猶存典刑。然銖黍之一差。或宮商之易位。惟我四朝之老。獨知五降之非。審聲知音。以律生尺。覽詩書之來上。閱篋簞之在廷。君臣同觀。父老太息。方詔學士大夫論其法。工師有司考其聲。上追先帝移風易俗之心。下慰老臣愛君憂國之志。究觀所作。嘉歎不忘。

賜觀文殿大學士集禧觀使蘇頌乞致仕不允詔

范祖禹

祖宗以來。貴德尚齒。鼎槐之老。莫不眷留。班于大廷。表儀百辟。卿向繇省轄。進洩宰司。深執勞謙。懇求去

位。置使祠館。勉徇雅懷。已退處於丘園。尙何殊於田里。矧卿筋力克壯。聰明不衰。中外所瞻。足以重國體。茲至意無或費辭。

賜新除觀文殿大學士中太一宮使范純仁令赴闕供職詔

曾肇

卿三朝元老。四海具瞻。出處爲邦國之重輕。用舍繫仁賢之消長。久置散地。宜還本朝。俾陟降於殿帷。仍總司於琳館。豈惟尊德尙齒。昭示寵優。庶幾鯁論嘉謨。日聞忠告。昔周公已老。猶在京師。留侯雖病。不去漢室。眷惟舊弼。異世同心。聞命疾馳。副朕所望。

賜宰臣韓琦請郡不允詔

呂公著

夫忘身徇國者。前志之所高。送往事君者。人臣之所勉。顧惟寡昧。矧在亮陰。永言負荷之艱。實賴股肱之助。薦披來奏。頗異予聞。謂已事於山園。必聽辭於機柄。雖未代或爾。在本朝則無。唯天聖之初。馮拯去位。非緣使領而獲罷。蓋以疾疢之匪任。卿體力素強。望實兼劭。所宜遺履謙之近節。懋經國之遠圖。深體至懷。勉綏厥位。

宋文鑑卷第三十二

勅

頒貢舉條制勅

賜右屯衛大將軍叔詔獎諭勅

賜陝西西路沿邊經略招討都部署司勅

罷諸路同提點刑獄使臣置轉運判官勅

復天下州縣官職田勅

條制資廩勅

皇族出官勅

赦文

建隆登極赦文

嘉祐明堂赦文

治平立皇太子赦文

熙寧七年南郊赦文

元豐立皇太子赦文

歐陽修

歐陽修

宋 祁

劉 敞

張方平

張方平

蘇 頌

王 珪

王 珪

元 絳

鄧潤甫

冊

乾德上尊號冊文

范質

封祀玉牒文

尊皇太后冊文

歐陽修

皇后冊文

王安石

仁宗皇帝加上徽號冊文

王珪

立夏國主冊文

王珪

皇后冊文

李清臣

仁宗皇帝哀冊文

韓琦

宣仁聖烈皇后哀冊文

畢仲游

欽聖憲肅皇后哀冊文

李清臣

勅

頒貢舉條制勅

歐陽修

夫儒者通天地人之理。而兼明古今治亂之源。可謂博矣。然學者不得聘其說。而有司務先聲病章句。以牽拘之。吾豪雋奇偉之士。何以奮焉。有純明朴茂之美。而無敦學養成之法。飭身勵節者。使與不肖之人。雜而並進。則夫懿德敏行之賢。何以見焉。此士人之甚弊。而學者自以為患。議者屢以為言。朕慎於改更。

比令詳酌。仍詔宰府加之參定。皆以謂本學校以教之。然後可求其行實。先策論。則辨理者得盡其說。簡程式。則閱博者可見其材。至於經術之家。稍增新制。兼行舊式。以勉中人。其煩法細文。一皆罷去。明其賞罰。俾各勸焉。如此則待士之意周。取人之道廣。夫遇人以薄者。不可責其厚。今朕建學興善。以尊大夫之行。而更制革弊。以盡學者之材。予於教育之方。勤亦至矣。有司其務嚴訓道。精察舉。以稱朕意。學者其思進德脩業。以無失其時。凡所科條。可爲永制。

賜右屯衛大將軍叔韶獎諭勅

歐陽修

朕固嘉汝嚮學勵善。蔚然而有文。與夫習富貴之驕。而樂狗馬之翫者異矣。然夫學者。所以知君臣父子之禮。出可以施於國。入可以施於家。汝其慎擇厥師。講救其闕。使言行無過。以自遠於悔。尤夫能異於衆人。誠爲有立。必至乎君子。然後大成。汝其勉之。無或中止。

賜陝西西路沿邊經略招討都部署司勅

宋 祁

朕卹軍旅之苦。寵邊陲之良。事從優寬。情無遴愛。至於常愆細過。並許功除。煩文苛法。罕由吏議。昨滕宗諒。張亢。並緣事任。合給公用庫錢。俾其宴享賓僚。犒飫軍伍。而乃用度無藝。簿領失防。陽託貿營。潛有牟入。攸司言上。遣使卽推。如聞逮繫。頗多鞠劾。彌廣本其冗費。寧足深誅。已罷案窮。悉令原貸。其滕宗諒等。止免一官。量降差遣。雖屈吾法。期慰士心。且夫盡用市租。美推趙將。來從我取。誼表漢臣。每慕前風。思全大體。尙慮諸道帥守。便以茲事爲懲。或損狹餼。牽或裁量藥餌。苟存畏避。謂免譏彈。胡益至公。亦非朕意。但當循經費之式。去自潤之私。取仰於官。均惠於衆。由茲底績。夫何間然。安節坦懷。毋或疑憚。

罷諸路同提點刑獄使臣置轉運判官劾

劉敞

國家兼覆寓內疆理天下分州立邑十有八路惟吏之不平民之失職政之頗類獄之糾紛未能獨察也故設糾虔之司使奉欽恤之寄專屬朝案貳以武吏誠欲審疑察枉釋冤決滯納民於不冤流化於無訟而武吏或起世家或由軍功文墨期會未必深究監司背項適增其繁夫非其習而望其效違其方而冀其功不亦難乎其罷諸路同提點刑獄使臣令樞密院勘會已及二年者即令赴闕未及二年者與就移合入差遣及於河北河東陝西緣邊兵馬多處相度添置路分都監以次補用庶幾人盡所長官不虛受夫轉運使之任所寄耳目治財賦集事功也江南東西荆湖南北廣南東西福建益梓利夔等十一路此其去京師遠者萬里近者數千里或跨帶山海崎嶇蠻夷而皆一員主之處則無與參慮出則無與僂力設有緩急之警調輸之煩機會一失民受其弊甚非豫慮先事之策其各增置轉運判官一員以三年爲一任選差第二任以上知州資序人候一任滿日與提點刑獄差遣初入知州及第二任通判資序人候滿兩任日與提點刑獄差遣若居部無狀墮職敗事亦重行其罰蓋士常患任之不當其材無以見長用之不久其任無以就功今朕別異文武使得自試選擢賢能使得次進吾於士大夫可謂無負矣其各竭力悉心勉成功名布告中外咸諭朕意

復天下州縣官職田勅

張方平

昔在先帝詔復公田合王制班祿之差得聖人養賢之義載原深旨本自愛民比者搢紳之間屢陳利害之意以謂郡縣受地有無不齊銓審除員權利爲倖辯競以之傷俗因緣至于害人故嘗命官斷以定數

誠足釐於浮弊。然未安於予懷。禮不云乎。厚祿以勸羣臣。則下之報禮重。凡厥文武。仕于朝廷。雖廉素者。惟士之常。而富貴者。人之所欲。其全寬大之體。自有公平之制。所宜給其所未給。均其所未均。約爲等差。槩令增足。使事父母者。得以致其養。畜妻子者。得以致其樂。冠昏喪祭。有所奉。慶恤饋問。有所施。不牽私室之憂。必專公家之慮。則六計可以弊羣吏之治。四方可以期衆職之修。儻自犯于有司。亦何追於彝憲。上廣先朝之惠。示不敢渝。下俾諸臣之言。審茲自定。惟爾中外。體予所存。

條制資廕勅

張方平

周禮大司樂掌學政。以六藝教郡國子。漢制光祿勳典任籍。以四行察三署郎。茲其官材本於世胄。然當辨論。必屬俊良。今廕法之所原。古典刑之是憲。惟因循之日久。寢滋蔓而倖多。敝生作法之涼。濫起推恩之過。且賞延于世。諒非及於疎宗。官惟其人。顧何取乎髻稚。暨階仕進之路。復無誨育之科。室不茨墉。田不疆畝。處不裕立身之道。出不閑從政之方。略觀貴途。良鮮舊族。此則上因朝廷法制之不立。下自父兄訓義之不孚。故俾宰司詳爲定令。使夫冢嗣先錄。以篤爲後之體。支子限年。以明入官之重。設考藝之格。激之向學。立保行之條。勉令率履。前史不云爵祿者。天下之砥石。人君所以礪世磨鈍。茲實用焉。庶乎位有稱職之才。朝多濟世之美。非惟爲國造士。是乃爲臣立家。咨爾具僚。知朕此指。

皇族出官勅

蘇頌

自我祖宗太上御諱敍邦族。大則疏封於爵土。次則通籍於閨臺。普集京師。參奉朝請。然而世緒寢遠。皇枝益蕃。屬有親疎。則恩有隆殺。才有賢否。則祿有重輕。今而一貫於周行。是亦奚分於流別。雖睦婣之道。誠廣。

而德施之義未周。故廷臣數言。宰司繼請。謂宜定正。限以等彝。朕惟親戚之間。經史有訓。漢唐之世。典故具存。或以九族辨尊卑。或以五宗紀遠近。或聽推恩而分子弟。或許自試而效才能。或宗子之賢。得從科舉。或諸王之女。自主昏姻。盡前世之所行。顧當今之未備。況我朝制作。動法先王。豈宗室等衰。反無定著。因俾羣公之合議。將爲一代之通規。載攬奏封具陳條目。以謂祖宗昭穆。宜從世世之封。王公子孫。抑有親親之義。若乃服屬之既竭。泊于才藝之並優。在隨器以甄揚。使當官而勉懋。至於任子之令。通昏之儀。凡曰有司之常。一用外官之法。僉言既允。朕意何疑。告於將來。遂頒明命。噫。自義率祖。既殊升降之文。因時制宜。斯盡變通之利。咨爾宗盟之衆。固多博識之倫。奉承新書。當體朕意。

赦文

建隆登極赦文

五運推移。上帝於焉睠命。三靈改卜。王者所以膺圖。朕起自側微。備嘗艱苦。當周邦草昧。從二帝以徂征。洎虞舜陟方。翊嗣君爲纂位。但罄一心而事上。敢期百姓之與能。屬以北虜侵疆。邊民罹苦。朕長驅禁旅。往殄胡塵。鼓旗纔出於國門。將校共推於天命。迫迴京闕。欣戴眇躬。幼主以曆數有歸。尋行禪讓。兆民不可以無主。萬機不可以曠時。勉徇羣心。已登大寶。昔湯武革命。發大號以順人。唐漢開基。因始封而建國。宜國號大宋。改周顯德七年爲建隆元年。乘時撫運。既叶於謳謠。及物推恩。宜周於華夏。可大赦天下。於戲。革故鼎新。景命初隆。於王室。告災肆赦。鴻恩普洽。於民心。更賴將相王公。協謀同力。共裨寡昧。以致升平。凡爾萬方。咸知朕意。

嘉祐明堂赦文

王珪

朕承三聖之基。履四海之貴。深惟持國之日久。益念爲君之道難。有臨聽之塵。庶以圖天下之佚。無奉養之靡。庶以資天下之豐。兢兢萬務之維微。勉勉前事之所戒。倚以左右。輔弼之正。予敢有弗欽。事于上下。神祇之明。予敢有弗肅。屬九穀登富。三辰昭華。象來桂海之祥。塵絕玉關之警。有邦之應。於朕豈功。恭念爲天子者。必修報本之禮。爲人之子者。必懷追養之慕。重循菲德。屢緝曠文。頃按明堂之圖。古如路寢之制。載經斯室。載度斯筵。直大火之駢芒。乘季秋之肅氣。物無上帝之稱。非躬祠不足昭虔。聖維文考之尊。非嚴配不足盡孝。於時備法物之駕。服大冕之章。格靈貺於真庭。款清德於太宇。還祇宗祀之舉。具飭純誠之將。迺神光陸離。燭于薦鬯之夕。喜氣休晏。被于燎柴之時。亶丕事之繼成。敢蕃釐之專鄉。宜孚廷渙。以契天心。可大赦天下。於戲。承神之胙。旣均輝耀之微。盪俗之瑕。復若風霆之布。蓋禮鉅則澤之博。孝至則勸以遐。尙賴秉文之英。經武之傑。厲同寅於王室。壯大治於邦圖。共荷無疆之休。亦膺無窮之聞。

治平立皇太子赦文

王珪

王者承天立極。莫不思長世之圖。爲國建儲。所以正萬邦之本。故朕親先父子。而天下不以爲愛。命發朝廷。而天下不以爲私。粵予上嗣之良。稟自日躋之聖。出而就傅。寢窮學肆之聞。入則承顏。勤至寢門之問。比疏榮於王社。益侈德於天枝。顧荷丕基之艱。猶虛正體之貳。矧漢文命嫡。著於卽祚之初年。且夏后立子。期以傳家於萬世。維羣元之所後。維大器之所承。式符少海之祥。宜踐東朝之位。肆顯冊之丕發。嘉僉

言之大同。爰契歡心。用覃曠澤。可大赦天下。於戲。文昭武穆。夙詒燕後之謀。震長離明。本有承華之象。蓋義重虛先者。禮必亟舉。慶施虛上。則惠必遐流。咨爾庶方。當體朕意。

熙寧七年南郊大赦

元絳

王者欽崇神天。嚴奉宗祏。就郊以饗。所以詔天下之恭。假廟而烝。所以教天下之孝。洪惟五聖之烈。誕輯百王之文。肆予冲人。昭事上帝。載念物無以稱。維一誠可以展大報之儀。祭不欲煩。維三歲可以述躬行之典。協會康年之順。道迎至日之長。是用朝薦殊庭。裸將太室。乃進登於陽時。以裒對於皇穹。合祛柔祗。陟配文祖。祝燧告絜。贊犧尙純。六樂變音。舞奏而諸物至。二精揚燎。煙升而萬靈交。方丕事之獲成。敢蕃禋之專嚮。宜敷大號。以賚多邦。可大赦天下。於戲。意盡精禮。既秩宗祈之舉。政施惠術。亶昭慶宥之行。維時黎元。綏我德澤。尙賴謨明四近。忠藎羣材。儀圖新美之功。勸相隆乎之運。同底于治。永孚厥休。

元豐立皇太子赦文

鄧潤甫

父子一體也。惟立長。可以圖萬世之安。國家大器也。惟建儲。可以係四海之望。位序蚤定。而人莫不以爲悅。典禮亟崇。而衆罔敢以爲私。永惟上嗣之賢。寔有妙齡之譽。入而視膳。孝友見於夙成。出則好書。聰哲繇於自得。粵紹休於正統。猶虛位於東朝。迺考著龜之占。迺稽方冊之實。載涓吉日。肇闢青宮。周家先親。不敢忘廟社之重。夏后與子。蓋以順天人之心。宜覃曠恩。徧暨羣品。可大赦天下。於戲。離明震長。繇帝緒於億年。解吉渙亨。灑天仁於萬物。蓋禮之所行者大。則澤之所流者深。咨爾多方。體朕至意。

維乾德元年歲次癸亥十一月己酉朔十六日甲子攝太尉守司徒兼侍中蕭國公臣質守司空平章事臣溥尚書右僕射平章事臣仁浦及内外文武臣寮馬步諸軍將校藩郡守臣四夷君長緇黃耆艾等七千五百人謹再拜稽首上言曰惟天爲大惟堯則之又曰舜有天下無爲而理是以古之言道德者莫先於二帝一則曰聰明文思一則曰溫恭潛哲英聲茂實意無欲而自彰景福鴻休心無求而自至巍巍蕩蕩無得而言伏惟皇帝陛下高明博厚宣慈惠和純粹之德全孝友之行著惟精惟一知微知章向者龍尚處於潛淵日未離於陽谷歷試之際志在扶危險阻艱難何往不濟躍馬蹈高平之陣麾戈佐淮甸之征喋血鏖兵一月三捷勞旋飲至論功莫二洎乎天監厥德用集大命人祇叶應風雨咸若鼎運初建國步猶梗始則李筠犯順長戟指闕并人連禍寇我北鄙於是有太行之行重進怙亂棄德崇姦幅員千里生民被毒於是有廣陵之役千乘萬騎如霆如雷詢彼仇方震疊區宇翠華宵至堅城旦下連平二孽有同符契累朝已來出師誅暴未有若茲之奇速也頃者華風不競中國政微五嶺三江置諸度外殊文異軌六紀于茲肇啓聖謀驅攘寇亂荆湖底定南土晏然燕薊之戎汾晉之孽燕巢幕上朝不謀夕邊事少間理道無壅嚴恭寅畏一日萬幾勤於己而泰於人儉於躬而豐於物明四目而高視達四聰而遠聽不侮鰥寡恤天窮也信及豚魚遂物性也惜力念耕耘之苦推食閔介冑之勞法家之流旣峻且密乃詔大理重正刑名俾盡哀矜務從寬簡減盜竊之罪緩鹽麴之禁好生之德通於神明若乃味爽丕顯坐而待旦商湯之戒慎也側身損己長轡遠馭漢文之化導也循名責實信賞必罰建武之法制也果敢決斷從

善如流。貞觀之風烈也。帝王之道。於茲備矣。太平之業。於茲成矣。於是祇見清廟。致其孝享。圓丘展禮。對越上玄。一獻而天帝降祉。再獻而神人以和三獻。而萬祿攸報。祥風拂袂。休氣繞壇。熙熙怡怡。羣心胥悅。國家大慶。衆庶共之。肆赦覃恩。俾民更始。與天合道。謂之應天。大無不覆。謂之廣遠。無不至。謂之運博。施濟衆。謂之仁智。周萬物。謂之聖化。成天下。謂之文保。大定功。謂之武其德。無際。謂之至德。臣等不勝大願。謹奉玉冊玉寶。上尊號曰。應天廣運仁聖文武至德皇帝。伏惟垂日月之明。監億兆之情。凝旒端委。昭受鴻名。如山嶽之固。如松柏之貞。乾健不息。品物咸亨。承天之祐。萬壽千齡。

封祀玉牒文

維大中祥符元年。歲次戊申。十月戊子朔。二十四日辛亥。有宋嗣天子臣。敢昭告于昊天上帝。啓運大同。惟宋受命。太祖開階。功成治定。太宗膺圖。重熙累盛。粵以冲人。丕承列聖。寅恭奉天。憂勞聽政。一紀于茲。四隩來暨。玄貺殊尤。禎符章示。儲慶發祥。清淨可致。時和年豐。羣生成遂。爰荷顧懷。敢忘繼志。僉議大封。聿伸昭事。躬陟喬嶽。對越上玄。率禮祗肅。備物吉蠲。以仁守位。以孝奉先。祈福逮下。侑神昭德。惠綏黎元。懋建皇極。天祿無疆。靈休允迪。萬乘其昌。永保純錫。

尊皇太后册文

歐陽修

維治平二年。歲次乙巳。十一月丁巳朔。十有六日壬申。嗣皇帝英宗廟諱謹稽首再拜言曰。臣聞昔者明王之以孝治天下者。非家至而日見也。蓋有要道焉。推所以行於己者。爲天下率。盡所以奉其親者。爲天下先。而四海靡然而承風矣。洪惟有宋受命造邦。百年四聖。而小子獲承之。以繼我仁孝之遺。休餘烈。方與

羣公卿士。夙夜以思。勉其不逮。庶幾如我仁考付畀之意。以申罔極欲報之心。此固慄慄祇懼。不敢違寧者也。顧惟眇末之質。提攜鞠育。慈仁咻煦。至于有成。自我聖母。嗣位之始。哀迷在疚。而憂艱難。一日萬務。協和綏靖。保祐扶持。功施邦家。亦惟我聖母。永惟至恩大德。無物可稱。是以稽參典禮。率籲羣心。合志一辭。懇懇惓惓。不勝大願。謹遣攝太尉具官韓琦。司徒具官胡宿。奉玉册金寶。上尊號曰皇太后。恭惟皇太后聖善明哲。柔閑靜專。粵自正位中宮。內助先帝。陰禮修而教行。儉德著而下化。遂及萬國。先於正家。逮夫玉几受遺。遭時多難。勉徇勤請。權同聽決。而明識遠慮。動懷謙畏。深鑒漢家母后之失。訖不踐於外朝。及歸政冲人。合於易之進退。不失其正之聖。是惟全節鉅美。固已超出前古。而垂法後世。宜乎盛烈播于聲詩。尊名光於典册。惟末小子。獲奉溫清。嗚呼。殫九州之富以爲養。未足盡於孝心。享萬壽之福而無疆。期永承於慈訓。臣誠懼誠抃。稽首再拜。謹言。

皇后册文

王安石

維熙寧二年歲次己酉。四月丁酉朔二十六日壬戌。皇帝若曰。自昔有天下。必擇建厥配。以承宗廟。以御家邦。肆朕受命。奉循前烈。考慎典册。以祈協于神民。咨爾向氏。懿柔淑恭。舊有顯聞。肇功唯祖。弼亮帝室。流德之澤。覃延後嗣。是產碩媛。比賢姜任。越朕初載。來嬪蕃邸。盟饋在中。率禮無違。以至嗣服。祇承內事。齋明夙夜。罔有曠失。宜崇位號。表正宮庭。今遣攝太尉。推忠協謀。同德佐理功臣。樞密使光祿大夫。檢校太傅行尚書刑部侍郎。上柱國。東平郡開國公。食邑五千戶。食實封一千戶。呂公弼。攝司徒。朝散大夫。右諫議大夫。參知政事。護軍。太原郡開國侯。食邑一千一百戶。賜紫金魚袋。王珪。持節册命爾爲皇后。夫惟

興王。釐厥士女。咸自內始。達于四海。朕克勤人。用弗怠。朕克儉人。用弗奢。朕克正人。用無敢側頗僻。爾勤相朕。乃濟登茲。於戲。匪初惟艱。惟慎厥終。爾忱念茲。朕以永享天祿。爾亦豫有無疆之福。豈不臧哉。

仁宗皇帝加上徽號册文

王珪

維元豐六年歲次癸亥十一月壬寅朔二日癸卯。孝孫嗣皇帝臣謹再拜稽首言曰。臣伏觀古先格王。莫不大名發於前。而大惠昭於後。其法皆本於至公。而不可易。至後世。臣子又欲盡報上之道。以謂君德甚盛。其言不足以包衆美。於是。有至郊加誅之文。夫欲推事存之禮。述追遠之志。則奉素享之榮號。益新紀之鴻烈。謀羣公。請太室。洋洋庠際。天接地。而震顯之。不亦當靈心。而傳古誼乎。恭惟仁宗神文聖武明孝皇帝。躬清明之資。賦神睿之略。乾行施之不息。仁性根於自然。時乘六飛。端御大器。知窮八荒。而不見其迹。澤及萬彙。而不居其功。爾乃簡拔峻賢。放遠邪佞。宥恕刑獄。懷保鰥寡。賞不徇所私。罰必當于理。興農桑之本務。緝禮樂之墜文。有慘怛好生之心。吏或誤入重辟。必終身見斥。有寬裕從諫之度。言者屢進。狂直必曲。意見容。念兵革之傷夷。則不殺而服。念稼穡之勤勞。則罔寧于逸。矧履天下之尊。而持之以抑畏。饗天下之富。而寶之以儉素。輿馬不聞於游盤。鍾鼓不涉於間燕。宮室亡奢靡之飾。器服亡瓌奇之玩。加以夙夜齊栗。事天之誠。盡霜露忱惕。念親之感。深方朝廷之久安。迺大革因循。而聖政又新。爲社稷之重計。迺前定禍亂。而皇嗣蚤立。故四十二年。仁恩川流。涵濡熏烝。格于上下。日月華風。雨均四時。和百穀。蕃北有獷狽。而不能驕。西有點羌。而不能軼。蟲魚遂性。自安川藪之游。男女潔誠。更趨耕織之樂。固有幽遐荒昧之俗。不約而子來。奇偉倜儻之瑞。不期而特見者矣。丕赫哉。憲度鴻明。聲文沛施。自載籍之傳。蓋未

有休功盛業。可加于茲也。重循涼菲。永念猷訓。今將款清廟。陟紫壇。遂受厚福。以浸黎元。宜於此時。臨彤庭。發玉版。上不敢墮祖宗之典。下不敢虧神民之費。如堯如舜。如禹如湯。豈不高一世之聞。而流萬世之聲哉。爰飭上儀。載揚景鑠。謹遣銀青光祿大夫守尚書左僕射兼門下侍郎上柱國太原郡開國公食邑七千六百戶食實封二千五百戶王珪。奉玉冊玉寶。加上徽號。曰仁宗。體天法道。極功全德。神文聖武。濬哲明孝皇帝。恭惟明德在天。臨受徽稱。維億萬年。永錫嘉祉。謹言。

立夏國主冊文

王珪

維熙寧二年歲次己酉三月戊辰朔十四日辛巳皇帝若曰於戲昔堯合萬邦而民風和周建列土而王業楸若古申命蓋國家之成法也咨爾秉常迪性純壹飭躬靖虔生稟山川之靈舊傳弓鉞之賜撫有西夏尊于本朝知事君必盡其節知守國當保其衆乃內發誠素外孚誓言質之天地而不欺要之日月而不昧朕用稽酌故典表顯徽實錫爾以茅土之封不爲不寵加爾以車服之數不爲不榮涓辰旣良備物旣渥誕舉丕冊以華一方今遣朝奉郎守尚書司封郎中上輕車都尉賜紫金魚袋劉航文思副使銀青光祿大夫檢校太子賓客兼御史大夫騎都尉彭城縣開國伯食邑七百戶劉愆持節冊命爾爲夏國主爲宋藩輔夫履謙順者靡不膺長福懷驕肆者靡不蹈後虞率身和民時乃之績往欽哉祇予一人之彝訓可不慎歟

皇后冊文

李清臣

皇帝若曰天相予祖宗茲歷世寧康朕旣敬紹丕緒罔作麗觀底信內外惟法惟式勩以正邦今左右弼

臣禮儀正貳暨族老宗婦各虔厥事咸鋪繹舊聞明敷于位曰乾施坤承日照月儷四時不忒萬物用成
盍稽則象詢考卜筮若時元吉正名錫服俾長首六宮以母天下予惟國有故常是何敢弗率咨爾王氏
乃祖忠勞王家書于太史子孫公侯出入藩服惟功澤逮茲是生碩媛淑嫕溫恭備有嘉德聘歸王邸入
承事皇姑靡不若禮上天右序予家蚤育元子慶在宗廟惠賚于四方乃以某年某月某日遣攝太尉具
官某攝司徒具官某賜爾皇后之寶方寸有半文盞螭紐授之玉册厥簡五十命爾翟衣笄纒博髻黼領
大帶以朝暨歲時將祀于東西宮金輿朱蓋武賁禁衛步障行導是惟顯哉爾其克后職思后道履中體
順茲日饗多福集大祐于厥躬其尙飲助予治昭聞于無窮於戲懋戒之哉

仁宗皇帝哀册文

韓琦

維嘉祐八年歲次癸卯三月癸卯朔二十九日辛未仁宗神文武明孝皇帝崩于福寧殿旋殯于殿之
西階粵十月戊辰朔六日癸酉遷座于永昭陵禮也龍馭賓天珠襦留殯萬方之軌同臻七月之期茲近
法仗已嚴靈輜未進風雲慘鬱以生悲臣妾涕號而思殉孝子嗣皇帝臣英宗廟諱接統承堯念親晞舜徘徊
象物驚禁從以如存摧慕仙游致哀誠兮必盡繫臨奠以長辭蓋終天之永恨乃命弼臣以文傳信其詞
曰惟宋受命與天無疆藝祖以武底寧四方神宗以文萬邦一王真廟紹隆赫然其光逮夫仁宗益熾而
昌厥生之初上帝惟祐天日之表振古未覩色出圭璋步嚴龍虎其俾真人來綏下土元良之建七鬯是
主寢門之間協若文武嗣訓之循纂承丕緒左右獻言以蒙自處大運歸乾獨化陶甄進良黜姦始章聖
權其仁如天其度如淵其仁伊何得之自然草秀而苗蟲飛而翾尙不忍傷況吾民焉惠澤之霈滂洋幅

員物無不滋。四十二年。猶如天兮。化功則全。其度伊何。汪然莫際。巨細必容。默分誠僞。臣在言職。不知諱忌。時肆詆訐。衆嫉狂易。聖心怡然。曰此忠義。是也。吾從過焉。何戾。猶如淵兮。是能致治。明慎庶獄。極于哀矜。惟法所在。未嘗妄刑。郡邑之吏。責之詳平。一失入罪。無階顯榮。尊爲天子。以儉爲貴。崇尚清虛。屏斥紛麗。向緣不懌。輔臣入視。殿幄蕭然。茵衾故敝。率用繒素。了無文綺。衆目驚嗟。上曰。何喟。吾之受用。素止如是。此民膏血。烏敢妄費。恭事天地。孝承祖宗。九見圓丘。再祇合宮。大禱于廟。親藉于東。服器精備。粢盛潔豐。小次不御。秉圭顯顛。何必戶曉。民胥偃風。取士之路。務存至公。十二臨軒。策之必躬。雋髦盡得。巖穴幾空。有將有相。曰功曰庸。眇視三代。吾其比崇。北胡之強。西夏之獯。時欲眺梁。恣其貪嗜。吾以威懷。折其凶銳。兩皆搖尾。從我羈餌。百蠻梯航。琛賫日至。禮樂具修。于戈不試。夫惟立嗣。天下之基。前世令王。或牽以私。事不前定。濱于亂危。我出獨斷。挺然不疑。求賢于宗。唯聖是知。神器之重。其傳有歸。廟社以安。生靈以嬉。迹其大公。堯舜之爲。昔在人上。必有偏好。或樂馳逐。或喜征討。或務宴游。或專營造。或邇聲色。或泥丹竈。棊弈之工。擊拂之妙。有一于此。下從而效。噫。吾仁宗。澹無所樂。曰吾好者。在勤政道。日必旰食。惟先之紹。間時弄翰。或隸或草。望帝之揮。千奇萬巧。去冬之暮。清燕之間。再闢天閣。詔呼從官。親作飛白。侍臣縱觀。心合造化。生成筆端。書幅踰百。大均寵頒。退坐羣玉。行觴盡歡。嗚呼哀哉。賜墨尙濕。宸章未刊。植壁斯虔。遽有金滕之禱。綴衣遂徹。俄承玉几之言。嗚呼哀哉。大變之來。天傾地裂。四海之慟。風號雨血。兆民震駭。其無生。百辟冤乎。而僅絕。乘雲之游兮。汗漫而自高。持顛之慕兮。僵仆而徒切。因疑前會之非常。似與羣臣之敍訣。嗚呼哀哉。候律云凜。諏辰協元。嚴歷路以方駕。視羽幢兮始前。池竹搖雉。車旗飾鸞。背朱雀

之通達。指青龍之吉山。關路長兮去復去。宮車晚兮還不還。痛徹六宮兮莫如逝。淚灑重瞳兮胡可攀。嗚呼哀哉。寒日晝昏。愁陰夜積。卷晴霓於丹旆。蕩霜波於素帟。悲笳互咽。六州之奏。悵悵。駿嶽前瞻。萬歲之聲。何聞。大隧一扃。幽堂永寂。人間之恨。空長。帝所之歡。豈極。嗚呼哀哉。秦漢而下。御邦子民。亶越三紀。纔聞數君。其間治亂以相駁。否亨之不醇。如仁宗享國之久。而始終太平兮。彼安敢望吾之清塵。生而無窮者。厚載健而不息者。高旻惟至仁。盛德與高厚之俱兮。萬世巍然而不泯。嗚呼哀哉。

宣仁聖烈皇后哀册文代宰相

畢仲游

維大宋元祐八年歲次壬申九月三日癸酉。大行皇太后崩于壽康殿。旋殯于崇政殿之西階。粵明年正月。遷祔座于永厚陵。禮也。葺殿帟空。袒庭燎晦。雲似卻而復凝。月雖輝而如慘。孝孫嗣皇帝哲宗。臣廟諱臨遣奠。以興哀。瞻振容而永慕。鳳吟管以何悲。龍挾輻而若駐。羽衛羅闕。神儀布路。爰制近司。紀陳聖度。其詞曰。

皇矣大宋。寶命自天。重明累聖。跨成軼宣。正后在中。契于坤乾。較任比姒。亦逾于前。有系自姜。源深積厚。功熙我朝。方虎是偶。奄韓宅魯。益昌厥後。月瑞日符。是興太母。於鑠太母。躬義率仁。居靜猶地。含和如春。正素自稟。聰明夙聞。作合英祖。齊昇並曜。受養神考。陰功善教。體道不違。惟德是傲。元豐末命。帝命惟辟。聽斷勉同。以補天隙。擁佑神孫。立民之極。恭以勵人。儉惟化俗。衣有大練。盜無片玉。房闈不出。四海在目。信義由中。九夷思服。如鑑不塵。如璞不緇。三事大夫。正直是咨。宗藩外戚。滲漉惠慈。人爵王官。雖卑不私。廟謁靡行。外朝靡踐。池籩靡臨。惟正是勉。服御靡更。惟惡是善。庸爾萬方。爲則爲典。左右皇躬。□□□□。

動有壇宇。居由範防。造次于是。寢隆且昌。如天清明。霽日之光。治化方成。憂勞亦至。外若平居。中潛遘厲。坤軸軋以夜摧。月輪翮而曉墜。守大化之靡怛。尙斯民之爲意。嗚呼哀哉。珠箔低垂兮。雲霧猶隔。薰帳髣髴兮。爐煙未銷。想仙馭以何適。謝人寰而已遙。萬乘號慟。哀纏九霄。千官鎬素。雨泣東朝。嗚呼哀哉。人與神兮。變何速。秋復春兮。時以徂。犧罇盈兮。未忘於平昔。池綉動兮。難留於須臾。翼八翼以爲衛。陳六衣而汜塗。嗚呼哀哉。野蒼茫兮。人漸遠。仗徘徊兮。天欲晚。遡洛澗兮。嗟備物之如在。逾鞏岸兮。知神遊之不返。山川已兆於真宅。松柏猶凝於故苑。嗚呼哀哉。玉晦龍蟄。金藏鑑昏。泉關掩夜。宮闈泣晨。車軌同兮。雖來於萬國。寶座閉兮。惟朝於百神。魚惟炬以非日。鴈長飛而不春。嗚呼哀哉。成內則於三朝。貽素風於千祀。致理之勤兮。今已往。大道之公兮。古如此。何遠其家以爲國。而憂其民之猶子。宜大書而作冊。俾永光於宋史。嗚呼哀哉。

欽聖憲肅皇后哀冊文

李清臣

粵建中靖國元年辛巳歲正月壬戌朔十三日甲戌。大行皇太后崩于慈德殿。二月壬辰朔十一日壬寅。殯于西階。以三月壬戌朔八日己巳。戒百官請命於太廟。諡曰欽聖憲肅皇后。太史筮之。將以五月辛酉朔六日丙寅遷座于永裕陵。禮也。哀子嗣皇帝徽宗廟諱極。永感之懷。寫無窮之慕。躬薦泂酌。奉寧輶馭。痛三牲之養。忽至於遺奠。悲萬壽之祝。俄成於晞露。馨歆如在。聲容不返。畢銅史之餘滴。動金商之清挽。暑令忽其成。凄薰風颯其變。慘像設既嚴。物儀具有。惟是冊書。用傳不朽。宮臣承詔。式虔事守。紀漸寓哀。貽之永久。其詞曰。

我宋隆康。恩漸動植。遠惟暨邇。生成滋息。趨走賢智。修官懋職。遐及四裔。左衽重譯。維相向公。梁棟宗祏。逮女曾孫。迨家瑞國。蚤歸王藩。旋被綸翟。至性溫溫。令儀翼翼。道意禮學。生知自得。慶壽寶慈。問安昕夕。執養寒暑。端莊不易。內輔神宗。贊助陪益。凡厥見聞。舒徐啓迪。十有九年。晏粲椒掖。萬邦託慈。六宮仰式。約省外氏。湯沐脂澤。斯世丕平。陰與多績。比懿夏商。塗山簡狄。姜嫄太姒。聯袂並烏。元符三祀。歲執徐直。正月己卯。變同割毒。巍巍哲宗。武威文德。夫何弗祐。忽遭寇窳。上嗣考廟。將決大策。于時弼臣。或藏邪慝。輒進異論。欲倒白黑。賴我聖母。沉潛剛克。折之陛前。氣殫語塞。庭羅犀渠。門屯闐戟。龍德利見。寰宇慶懌。一指顧間。長寧社稷。譬如媧皇。神工妙力。鍊石補天。斷鼈立極。冲融宇宙。混漾澡滌。靡賢不登。靡冤不釋。臣嘗侍對。與閣訓敕。曰我皇帝。聖材天錫。子道勤愷。政事祇惕。治本亂原。講磨紬繹。惠心溥博。物理研覈。帝堪多難。子復明辟。何俟祔饗。始還禁闕。幸濟初艱。後罔餘責。重下教告。亟就安適。帝拔以留。懇款襞積。數請弗回。推璽卻籍。義盡今茲。事高往昔。在漢馬鄧。固多慚色。其於邦民。憂不離臆。動履仁儉。示先壺則。服無珠璣。器無瑤碧。禁戒彫繪。棄捐組織。言祖經墳。智該儒墨。諸書過眼。疑微洞析。兢兢瞿瞿。殆忘寢食。涼暄密移。疹氣侵蝕。皇帝聖孝。啓處在側。藥審刀圭。術窮鍼石。檜襁山川。猶期千億。丹劑雖靈。冥算終厄。佛供晝昏。喪氛夜赤。祲象告凶。軒星示坼。數圯坤元。景淪望魄。五十八載。馳光度隙。嗚呼哀哉。梓匠奏工。嬪娥罷飾。帳殿先途。殯堂撤席。縞士鼎鼎。絳旌奕奕。左背城闕。右徑阡陌。穀騎趨趨。綈車咿噫。簫笳悲吟。鹵簿哆赫。萬類奪輝。四民聚戚。御服苴麻。皇情纒棘。嗚呼哀哉。霧雨故宮。莓苔舊城。鳳輓蕭森。獸扉虛寂。輦路鑑奩。孰非陳迹。引望山園。涕濡竹栢。惟有徽音。長留寶冊。嗚呼哀哉。

宋文鑑卷第三十三

御札

大慶殿恭謝御札

熙寧元年南郊御札

熙寧四年大饗明堂御札

批答

賜除宰臣文彥博讓恩命批答

賜新除宰臣富弼讓恩命不允批答

賜宰臣富弼乞退不允批答

再賜宰臣富弼乞退不允批答

賜宰臣富弼乞解機政不允批答

賜宰臣文彥博乞解重任不允批答

賜樞密使宋庠讓恩命不允批答

賜杜衍讓恩命不允批答

賜賈昌朝讓恩命不允批答

歐陽修

王珪

元絳

歐陽修

歐陽修

歐陽修

歐陽修

歐陽修

歐陽修

歐陽修

宋祁

宋祁

再賜杜衍讓恩命不允批答

宋 祁

賜陳執中韓琦讓恩命不允批答

宋 祁

賜皇弟允迪讓恩命不允批答

宋 祁

賜皇長子淮陽郡王免恩命不允批答

王 珪

賜皇伯祖承亮改封秦國公免恩命不允批答

王 珪

賜宰臣韓琦已下乞立壽聖節宜允批答

王 珪

賜宰臣韓琦已下上尊號不允批答

王 珪

賜韓琦免恩命不允批答

王 珪

賜宰臣曾公亮免恩命不允批答

王 珪

賜韓琦免明堂恩命不允批答

王 珪

賜郝質免恩命不允批答

王 珪

賜宰臣富弼乞退不允批答

王 珪

賜歐陽修乞退不允批答

王 珪

賜宰臣韓絳免恩命不允批答

元 絳

賜宰臣韓絳已下上尊號不允批答

元 絳

賜皇伯宗諤免恩命不允批答

元 絳

賜陳升之免恩命不允批答

元絳

賜宰臣王安石已下乞御正殿復常膳不允批答

元絳

賜劉摯辭免恩命不允批答

蘇軾

賜太師文彥博乞致仕不允批答

蘇軾

再賜太師文彥博乞致仕不允批答

蘇軾

賜宰臣呂公著乞外任不允批答

蘇軾

賜宰臣呂公著乞致仕不允批答

蘇軾

賜司空呂公著免恩命不允批答

蘇軾

賜右僕射范純仁免恩命不允批答

蘇軾

賜門下侍郎孫固乞致仕不許批答

蘇軾

賜劉昌祚免恩命不許批答

蘇軾

御札

大慶殿恭謝御札

歐陽修

勅內外文武臣寮等。執珪璧以事神。嚴祖宗而配帝。雖有國之常典。亦因時而制宜。朕承三聖之不基。撫萬邦之有衆。儉于己使天下之民豐。勞于心致天下之民佚。罔敢怠忽。庶幾治平。而首春以來。偶爽調適。賴三靈敷祐。百福來臻。順以節宣。獲茲康裕。加以邊隅不聳。風雨以時。雖庶物之咸和。顧眇躬而增惕。是

用稽先朝之成憲。詢故實於有司。卽廣殿之翼嚴。擇靈辰之良吉。式伸昭謝。以格純休。宜示先期。故茲誕告。朕取今年九月內。於大慶殿行恭謝之禮。其今年冬至親祀南郊。卽宜權罷。所有合行諸般恩賞。並特就恭謝禮畢。一依南郊例施行。至日朕親御宣德門宣制。仍令所司詳定儀注。以聞。務遵典禮。勿俾煩勞。咨爾多方。咸體予意。故茲札示。想宜知悉。

熙寧元年南郊御札

王珪

有天下者。莫重上神之報。爲人子者。莫嚴宗廟之承。率躬三歲之祠。常候一陽之應。緬慕先聖。光施沖人。載循禋類之期。適在諒陰之際。大懼不能備飭儀物。奉將粢盛。於是刺六經之文。傳博士之議。皆以謂喪。有以權而順變。祭無以卑而廢尊。矧稽參西漢之彝。沿用景德之制。顧予涼菲。賴帝況臨。遂卜天正之辰。往脩郊見之禮。方且進祈茂祉。以大庇黎元。昭格至精。以終圖熙事。庶幾能饗。其敢憚勤。朕以今年十一月十八日。有事于南郊。咨爾攸司。各揚厥職。諸道州府。不得以進奉爲名。輒行科率。其百司除事神之物。並宜一切仍舊外。餘應干供奉所須。務令淳約。以稱朕不忘孝思之義。

熙寧四年大饗明堂御札

元絳

勅內外文武臣寮等。朕荷二儀之休。履四海之富。經庶政之至治。秩將禮之彌文。欽惟五聖之謨。常躬三載之祀。自纘隆於大業。已肆類於圓丘。興言總章。未詔嘉饗。維仁祖之武。宜謹於遵修。維文考之尊。宜嚴於陟配。況萬寶時懋。三光仰澄。官師協恭。方夏底定。是用稽仍路寢之制。涓選肅霜之辰。上以裒對天明。展昭事之重。下以救厲民志。示追養之勤。特戒先期。以孚大號。朕取今年季秋擇日。有事于明堂。其今年

冬至更不行南郊之禮。所有合行諸般恩賞。並特就祀明堂禮畢。一依南郊例施行。至日朕親御宣德門。宣制咨爾攸司。各揚厥職。諸道州府。不得以進奉爲名。輒行科率。務循典故。無致煩勞。

批答

賜除宰臣文彥博讓恩命批答

歐陽修

省表具之。朕躬儉約。以先人而生民。未足憂勤。以勵政。而百職多隳。豈布德之不明。抑任人之弗至。是以齋居正慮。先志後占。鑒屢易以爲煩。念難知之可慎。永惟商周之所記。至以夢卜而求賢。孰若用搢紳之公言。從中外之人望。卿以舊哲。比嘗相予。惟字量能寬。以服人。惟純誠故久而益信。勳德兼著。可以重朝廷。忠信不回。可以臨大事。夫謀於其始而旣審。則果於必用而不疑。汝其欽哉。朕命無易。所讓宜不允。仍斷來章。

賜新除宰臣富弼讓恩命不允批答

歐陽修

卿有憂國愛君之心。而忠以忘其己。有經邦濟時之學。而用未究其能。夫畜久而積厚。則施之不窮。慮深而計熟。則謀無不獲。茲朕所以虛心仄席。有望於卿也。矧卿正直不回。庸邪素忌。小人所異。君子所同。是以在外十年。而左右之譽不及。履躬一德。而搢紳之望愈隆。朕內決於心。外詢于衆。敢謂有得。卿其何辭。

賜宰臣富弼乞退不允批答

歐陽修

朕眷惟宰輔之司。實繫朝廷之重。職或非稱。勢因易搖。比以連年。厭於屢易。戒用人之不審。致厥位之靡安。故於圖任之初。尤極精求之意。而議者謂卿有天下之譽。慶朕得非常之才。豈惟斷不惑於予心。固以

慰久鬱之人望。則朕之用卿者至矣。卿之自待者如何。而方沃嘉猷。遽形退讓。駭無因而及此。曾莫諭於乃誠。豈廊廟之崇責重者。其憂難任。而富貴之至位高。則其慮易危邪。朕嘗歷考往昔之人。其於進退之際。過計而圖全者。未必無患。忘身而徇國者。固多令名。惟爾之明。必知所擇。宜少安於職業。用深體於倚毗。

再賜宰臣富弼乞退不允批答

歐陽修

夫知人之明。可謂難矣。而任賢之術。茲豈易哉。若乃聽之不聰。信之不篤。施設之方未盡。弗極其材。遲速之效有時。莫能少待。則被其任者。實亦艱歟。卿以純一忠亮之誠。蘊宏深遠大之業。朕虛己以聽。推心仰成。至於一二之臣。是惟同德。下逮衆多之論。曾靡聞然。方將甄敍賢愚。修明法度。務究本根。而更治不速。歲月之近。期於有成。茲乃予意。奈何中道而將止。夫亦奚託以爲辭。矧上下旣交。寧有不通之志。而君臣相遇。豈爲易得之時。當體余懷。勉安厥位。

賜宰臣富弼乞解機務不允批答

歐陽修

夫宰相之事。非可以歲月考。而一二數也。其在朝廷。選賢任能。而各得其職。下俾民俗。遷善遠罪。而不知其然。至於法度修。紀綱正。然後相與慎守。而安行之。以臻于治。此朕所以虛心一意。日有望於卿者也。今事有緒。而卿辭焉。豈朕德之不明。將顧時之不可。中道而止。夫何謂哉。俾予獲用材不盡之譏。而卿涉苟安自便之計。予所不取。卿其勉焉。

賜宰臣文彥博乞解重任不允批答

歐陽修

夫知其人之爲賢。任則勿貳。事其君而有道。去不可輕。此古之臣主之明。舉措必慎。所以收功於一時。而垂法於後世也。卿夙有時望。爲予柄臣。自復秉於國鈞。僅三周於歲序。若乃進退賢否。誅賞罪功。每於聽納之間。敢忘虛己。顧彼搢紳之論。曾靡異辭。方期有成。以副予意。而乃過形謙損。思避台衡。豈寡德弗明於用才而不盡。將多言害正。致厥位之難安。苟異於斯。夫何引讓。矧卿忠信之節。足以叶予之一心。材謀之優。可以斷予之大事。茲所東注。寧煩諭言。

賜樞密使宋庠讓恩命不允批答

歐陽修

朕以因時致享。克展於孝思。已祭受釐。大均於慶澤。乃眷耆明之哲。實予體貌之臣。肅臨事之有容。旣交神而蒙貺。宜推異數。以示眷懷。雖嘉好謙。曷止成命。

賜杜衍讓恩命不允批答

宋 祁

比虛右弼。以須峻望。卿清約忠壯。華皓一節。出入諷議。靡事不爲。挺然公實。見於有政。朕志先定。成命惟行。況萬幾處。可百職脩理。朕所倚辦。卿宜知之。遽閱讓函。猥徇謙槩。且誕告羣方。不容顯辭。久曠台路。便廢攜遜。欽服寵章。

賜賈昌朝讓恩命不允批答

宋 祁

卿曩侍經筵。已知國器。歷守京邑。則風績早樹。進領邦憲。則威名流聞。揚休山立。自處中道。朕以爲履正識敏。材任輔佐。引與機政。參貳台司。曾是踰年。休有成效。觀行則懿。俾謀則臧。斷自予志。冠升樞省。誕告百執。初無異言。猥露奏封。深存攜遜。況訓諭已熟。典命難淹。速卽欽膺。以光朝舉。

再賜杜衍讓恩命不允批答

宋 祁

向以戎醜尙桀師伍留屯公私乏匱不可貲省又官濫於外吏欺於中苛察過當浮競成俗濟水無益治絲愈棼圖所振整未知厥序以卿久在樞禁習總事經年耆識茂盡悴事國是用選自予志對秉台衡藉敏材以康調發之難褒介節以懲進取之弊朕旣寡德方茲仰成尺奏薦聞能讓猶固已嘗批喻宜體眷求毋煩費詞早膺寵典

賜陳執中韓琦讓恩命不允批答

宋 祁

朕比執珪幣祇事神祇至誠所向鴻釐如答是以推衍天祉沛流茂恩徧錄侍祠之勞悉從進律之典卿卓有成效協於僉言而臨榮引讓稽恩未拜閱露章而旣熟非公論之所期便可欽膺卽廢謙執

賜皇弟允迪讓恩命不允批答

宋 祁

朕光宗嫌名陸懿親差次寵典年長者崇爵屬近者尙恩眷爾忠賢用加節制公言斯協朝渙旣頒何執常謙欲遂素守道風雖亮允令難稽往哉惟諧毋或煩請

賜皇長子淮陽郡王免恩命不允批答

王 珪

昔我祖宗誕受天命厥惟艱哉克正皇猷丕懋乃績以遺我子孫無疆之休今朕纂厥服惟稽古建爾元子于有邦乃季秋辛亥羣公庶尹罔不祇朕言于廷爾乃陳德弗及期畀于一二弟兄之賢我聞曰立愛惟親立敬惟長其敢示天下以私乎汝惟往哉尙迪時命無違

賜皇伯祖承亮改封秦國公免恩命不允批答

王 珪

夫咸藩之建王室是毗古者皆世襲其封近代或別予之邑既非祖烈之服又失廟祠之傳故朕推近屬之長賢脩先王之舊履以天子孫不絕之序以均宗社無窮之休適鑑露章過形冲節宜體親親之意庸光繼繼之圖

賜宰臣韓琦已下乞立壽聖節宜允批答

王珪

赤制告圖肇承題序青煒動陸俯協誕期卿等過稽舊章列上芳牘緣華封之素祝建壽聖之嘉名竊惟受天元符撫國休運百辟稱觴而在席四夷奉幣而在廷敢以菲懷仰于輿望

賜宰臣韓琦等上尊號不允批答

王珪

朕獲承大統三載于茲蒙天之休海內清靜方將飭齊輅潔純犧以祇見天地宗廟之靈乃敢昭發丕冊揚徽垂鴻以自施康尊榮者哉不圖執事之臣列上表功之號且臨政之日淺未有盛烈之章況事神之意恭豈在彌文之飾適增予媿難徇所陳

賜宰臣韓琦免恩命不允批答

王珪

夫王者壹天下之仕宰相遂萬物之宜故君臣同德而教化成朝廷上賢則分職治肆朕承邦之久得卿共政之均且國用失浮規節財力之匪易吏塗過冗甄序名品之爲難歷勤勞之百爲蹈夷險之一致向屬冢卿之缺適登台席之元稽卜神謀孚言朝聽維百辟之是式維兆民之是瞻奚與曲讓之辭殊闕大公之舉慊然衆志鬱于予聞蓋德盛而位隆者望雖與歸然任劇而責至則事當隨決思體睠毗之異祈收攜固之情往代天工毋留邦渙

賜宰臣曾公亮免恩命不允批答

王珪

夫天文中階之象。色正則二氣鈞。國柄三事之司。體公則萬化緝。朕何嘗不寤寐邦傑。彌綸政機。光宗嫌名以美風俗之原。以甄序官師之品。所繫甚大。維材之難。卿行足以厲朝。謀足以經國。代言二禁。而號令鼓舞。羣動賦政中畿。而神明照于宿姦。頃陪議於宰塗。旋冠謨於宥省。邦之維度。靡不舉。兵之紀律。靡不張。屬上台之進賢。宜右弼之膺寵。忽起舜庭之讓。未施鄴國之規。羣情鬱然。予心勞止。矧夫付安危之幾。則望豈云淺。當名器之分。則處之勿疑。所期廣猷慮以同寅。會精神而輔力。當抑謙風之固。往調大化之元。豈朕之獨跋太平。亦卿之與有令聞。

賜韓琦免明堂恩命不允批答

王珪

予臨路寢之上。曾覽八紘。邈然有通神明之志。迺季秋宗祈。既右上帝。亦右文考。始予齋精臨獻。而懼不勝。及觀夫簠樽在堂。鍾石在庭。至陟降上下之數。與夫九州四海美物之薦。罔不具飭。噫。何其禮之盛歟。非爾元宰之臣。孰總裁劃之。故已降之制。爲百辟先。亦皇天降休命于我家。非予之所敢專也。今書固辭。顧不廢予惠術之施庠。

賜郝質免恩命不允批答

王珪

國家提萬兵之勁。萃之畿中。謀元帥之良。護于巖下。矧卿嘗從征伐之事。加有宿衛之勤。宜授鉞於師壇。總環宮之夜柝。蓋旌勞者必異其寵。御衆者必予之權。毋爲過兢。其服重委。

賜宰臣富弼乞退不允批答

王珪

朕肇履邦圖。每恭天戒。屬初炎之在序。偶時澤之弗滋。且止于近畿。顧民災之未遠。然應不旋日。知人事之已修。卿遠來相予。居位未久。奚抗章而引咎。將援故而辭權。雖蹈夫聖賢遠覽之思。殆戾於君臣交儆之意。勉規弗及。終底于成。

賜歐陽修乞退不允批答

王珪

夫與政之途。蓋天下之責至者叢矣。顧雖智勇。不能以禦流訾之來。前日御史加非於卿。朕惟其辭甚悖。於義理之文。今讒者放而疑者釋。卿猶欲以去位。豈朕所望焉。傳不云乎。禮義不愆。何恤人之言。其起眎事。毋重朕之不敏也。

賜宰臣韓絳免恩命不允批答

元絳

卿方重淳深。清明端亮。閱文武之二枋。今上御名謀猷於百爲。屬者羌種跳邊。王師淹戍。往視方略。以宣威靈。嘉維爾忠。蔽自朕志。絕軼前比。延登冢司。扶世澤民。將倚調於元化。靖兵戡亂。猶佇建於膚公。況惟渙號之孚。已穆廣朝之聽。胡爲懇牘。欲避隆名。雖難進之風。自高冲尚。而仰成之屬。殊拂顧懷。趣宜欽承。毋重撝固。

賜宰臣韓絳已下上尊號不允批答

元絳

朕聞唐虞之世。君臣吁俞。相與敕戒。以康庶事。未聞其自耀功德。大爲名稱。以動天下之聽。朕以涼菲。獲承皇緒。固已極崇高之位。號矣。嚮者奉郊宗之祀。三事大夫。亦屢以徽冊來上。而愧不敢從。方且嘉與衆賢。夙寤晨興。以營極治之業。要之萬世。建無窮之基。亦有無窮之聞。不猶愈於虛名歟。臣之尊君。義則勤

至。朕守弗奪。毋煩數陳。

賜皇伯宗諤免恩命不允批答

元絳

卿爵齒兼尊。德名參劭。佑予郊廟之事。克有夙夜之勤。疇勞策勳。時乃舊典。往承成命。無用勤辭。

賜陳升之免恩命不允批答

元絳

卿久服樞筦。協成王功。屢陳誠辭。願解機政。方建將旄之重。且增台路之華。況輔成萬微。嘗宣左右之力。兼賦二枋。宜旌文武之謨。卽當欽承。安用冲挹。

賜宰臣王安石已下乞御正殿復常膳不允批答

元絳

垂象之變。咎在朕躬。內惟菲涼。敢不祇懼。避朝損膳。欽天之渝。神休震動。銷去大異。而三事庶尹。咸造在庭。願復舊常。至于再請。且星隆暑德。猶賴交修。況天畏棗忱。固當屢省。弭裁嚮福。其庶幾焉。

賜劉摯辭免恩命不允批答

蘇軾

政如農耕。以旣穫爲能事。言如藥石。以愈疾爲成功。若耕不穫。疾不愈。朕何望焉。所以用卿者。非以富貴卿也。勉卒成業。何以辭爲。

賜太師文彥博乞致仕不允批答

蘇軾

卿出入四世。師表萬民。無羨於功名。而有厭於富貴。其所以忘身徇國。捨逸就勞者。豈有求而然哉。凡以先帝之恩。生民之欲也。卿之在朝。如玉在山。如珠在淵。光景不陳。而草木自遂。去就之際。損益非輕。昔西伯善養老。而太公自致。魯穆公無人子思之側。而長者去之。卿自爲謀則善矣。獨不爲朝廷惜乎。藥餌有

閒時遊廟堂。家居之樂。何以異此。

再賜太師文彥博乞致仕不允批答

蘇軾

朕脩身以承六聖。虛己以聽四輔。而法度未定。陰陽未和。民未樂生。吏未稱職。中夜以思。方食而歎。雖不敢以事諉元老。實望其以身率百官。卿猶未卽於安。孰敢不盡其力。此聖母冲人之本意。而天下有識之所望也。昔唐太宗以干戈之事。尙能起李靖於既老。而穆宗文宗以燕安之際。不能用裴度於未病。治亂之效。於斯可見。朕意如此。卿其少安。

賜宰臣呂公著乞外任不允批答

蘇軾

夫以才御物。才有盡而物無窮。以道應物。道無窮而物有盡。凡今之患。所乏非才。以卿篤於愛君。必能建長久之策。澹然無我。可以寄枉直之權。二年于茲。百度惟正。事既就緒。民亦小康。至於微疾之屢攻。是亦高年之常理。卿其良食自輔。爲國少安。譬如止水之在盤。豈復勞心於鑒物。心且不勞。而況於力乎。

賜宰臣呂公著乞致仕不允批答

蘇軾

宰相不自用。人主不自爲。予欲識人物之忠邪。故以卿爲水鏡。予欲知利害之輕重。故以卿爲權衡。苟明此心。雖老猶壯。與其輕去軒冕。獨善其身。孰若優游廟堂。兼享其樂。益光宗嫌名此義。勿復有云。

賜司空呂公著免恩命不允批答

蘇軾

夫國以得人爲彊。如猛獸之衛藜藿。以積賢爲寶。如珠玉之茂山川。湛然無爲。物自蒙利。故崔公發議。則淄青慙服。知朝廷之有人。蜀使抗詞。則孫權回顧。歎張昭之不在。得失之效。豈可同日而語哉。朕之用卿。

意實在此。國計之重。可無復辭。

賜右僕射范純仁免恩命不允批答

蘇軾

自昔先帝之世。屢歎材難。及朕嗣位以來。專用德選。雖爵祿名器。出於獨斷。而長育成就。實在羣公。長短不遺。輔相之責。苟無爲國養人之意。必有臨事乏使之憂。朕用慨然。當食不御。思得英雋之老。共收文武之用。惟卿篤於憂國。明於知人。灼見朕心。宜在此位。往任天下之重。毋事匹夫之廉。

賜門下侍郎孫固乞致仕不許批答

蘇軾

吾不出帷幄。臨御家邦。實賴股肱之良。以持綱紀之要。於其進退。顧可輕聽之哉。卿頃自近藩。擢貳東省。本以年德之故。非有筋力之求。若夫正顏色。出詞氣。使人望之而忠誠可信。鄙倍自遠。斯可矣。豈以一病未能造朝。遂欲舍而去哉。誠請雖勤。於義未也。

賜劉昌祚免恩不許批答

蘇軾

卿國之虎臣。帥我爪士。總章大祀。宿衛有勞。宜爲六軍之先。以承大賚之慶。辭而不有。殊匪吾心。

宋文鑑卷第三十四

制

除趙普門下侍郎同中書門下平章事集賢殿大學士制

除呂蒙正中書侍郎兼戶部尚書平章事制

除文彥博判大名府制

除皇弟允初感德軍節度使制

封皇弟九女福安公主制

除皇兄允弼武康軍節度使制

除皇弟允迪安靜軍節度使制

立皇太子制

除皇兄宗諤保靜軍節度使制

除韓琦守司徒兼侍中鎮安武勝等軍節度使制

除呂公弼樞密使檢校太傅制

除李昭亮殿前副都指揮使寧武軍節度使制

除曾公亮檢校太傅充樞密使制

李沆

歐陽修

歐陽修

歐陽修

宋祁

宋祁

張方平

張方平

張方平

張方平

張方平

胡宿

除王德用樞密使制

胡宿

祁國長公主進封衛國長公主制

司馬光

立皇后高氏制

范鎮

曾公亮加恩制

范鎮

除富弼樞密使制

范鎮

兗國公主降沂國公主制

范鎮

韓琦加恩制

王安石

李璋加恩制

王安石

皇伯祖威德軍節度使榮國公承亮加恩制

王安石

李日尊加恩制

王安石

除趙普門下侍郎同中書門下平章事集賢殿大學士制

闕散同功。歸馬遂隆於周道。蕭張叶力。斷蛇因肇於漢基。必資佐命之臣。以輔興王之業。推忠協謀。佐理功臣。樞密使光祿大夫檢校太保兼御史大夫上柱國天水縣開國伯趙普。功參締造。業茂經綸。稟象緯之淳精。契風雲之良會。洎贊樞機之務。屢陳帷幄之謀。沃心方佇於嘉猷。調鼎宜膺於大用。俾踐台衡之位。仍兼書殿之榮。爾其罄乃一心。熙予庶績。君臣相正。勿忘獻納之規。夙夜在公。勉致隆平之化。往服休命。無愧前修。

除呂蒙正中書侍郎兼戶部尙書平章事制

李沆

天道無私。日月星辰助其照。皇王不宰。股肱輔弼代其工。所以端拱守成。垂衣制理。永建丕平之景運。遐追三代之令猷。其有業茂經綸。才推謹厚。參大政而已淹星歲。秉至公而無捨寅昏。宜頒出綍之殊恩。俾正持衡之重柄。爰擇剛日。特降命書。推忠佐理功臣。朝散大夫給事中。參知政事。柱國。東平郡開國男。呂蒙正。四氣均和。五行鍾秀。有濟時之略。輔之以溫恭。挺命世之才。守之以循默。爰覩舜旌之進善。遂指魏闕以來儀。臨軒覩敏。瞻之能射策。見縱橫之略。暨茲登用。益著謨明。公忠推社稷之臣。凝重見廟堂之器。眷茲大體。久鬱具瞻。屢宣作礪之功。克懋秉鈞之績。別錫褒功之美號。仍陞馭貴之崇階。勳籍增榮。井田加賦。預列侯之峻爵。同大利之計書。顧優恩之在茲。諒名器之無假。於戲。雲從龍而風從虎。今也其時。啓乃心而沃朕心。必求諸道。爾宜周旋庶政。佐佑眇躬。緩茲宵旰之憂。翊我隆平之運。同底于道。豈不美歟。

除文彥博判大名府制

歐陽修

朕惟將相之崇資。是爲文武之極選。隆其名器。所以重朝廷。列于蕃宣。所以屏王室。矧乃居留之任。必屬老成之人。爰擇剛辰。敷告有位。具官文彥博。器閎而厚。識粹而明。學得其方。通古今而知要。才周於物。適大小以惟宜。自奮發於聲猷。早更揚於中外。居則參裨乎國論。出則宣暢乎皇威。兩踐台司。首當柄用。賢愚式序。舉百職以咸修。綱紀甚明。贊萬幾而至悉。自懇避鈞衡之任。出司管鑰之嚴。逮此逾時。蔚然休問。眷言邦哲。實簡予衷。是用更其擁節之榮。委以別京之重。勁兵所宿。是資總制之權。雅俗惟淳。兼賴撫綏之政。於戲。與國同體。是謂股肱之良。惟民具瞻。方隆師尹之望。願我舊德。豈煩訓辭。往其欽哉。祇服休命。

除皇弟允初依前檢校尙書右僕射充感德軍節度使加食邑食實封餘如故制

歐陽修

爵賞當功。則爲善之勸。廣名器不假。則至公之道存。然而隆恩睦親。所以厚乎風俗。建侯作屏。所以扞于王家。非余敢私。乃國舊典。具官允初。質性純茂。稟乎天姿。學問發明。由於師訓。維我叔父。時爲賢王。緬懷遺烈之存。屬乃克家之善。自被蕃宣之寄。久參朝請之聯。宜從留務之繁。進委臨戎之重。節髦並建。井賦兼增。僉謀克諧。寵數惟渥。於戲。干戈衛社。內有宣勤夙夜之臣。甲冑在躬。外有奮力行伍之將。爾其念宴安之懷毒。知富貴之難居。戒損於滿。而罔敢自驕。勞身以謙。而克保其位。無忘勗勵。往服恩榮。

封皇弟九女福安公主制

歐陽修

朕稽有國之彝章。著皇女之稱。謂取其主以同姓。所以見王體之尊。必也錫之美名。所以彰禮命之寵。載涓吉日。敷告在廷。皇弟九女。岐嶷之姿。有生知之異稟。柔順之質。得天性之自然。方嚴保傅之規。以養肅雍之德。俾遵舊典。褒以徽章。嘉乃妙齡。盛哉儀服。考僉言而惟允。非予意之敢私。於戲。隆仁恩以厚親。茲惟教愛。習圖史而循法。繫乃夙成。祇若訓言。往膺渙渥。

除皇兄允弼武康軍節度使加食邑食實封制

宋祁

朕惟一二兄弟。屏扞吾家。每推骨肉之愛。以強本根之託。矧在邇屬。早休厥聲。適及剛辰。進膺異數。具官允弼。甚德而度。參仁以和。居貴而罔流心。訓恭而遠祇悔。間陪郊獻。佐庀宗司。抑抑攸儀。舉皆率履。綽綽斯裕。內無違言。成予敍親。時乃脩職。比者。雖疏王爵。未厭寵名。宜停後務之繁。俾領元戎之制。增食爰賦。

兼實幹封於戲盤石而宗寄莫重焉扞城於國義莫先焉可壯非猷可順非迪仍輟就藩之遠姑隆綏族之恩往惟懋哉顯對嘉命

除皇弟允迪安靜軍節度使加食邑實封制

宋 祁

朕聞立愛莫先於親繁支實庇其本每念攸訓匪伊異人用推光宗嫌名序之典期光夾輔之體具官允迪承
夙天祐衍慶宸莘舉動嚴方趨占閑敏思長富貴之守寢肄朝夕之虔向留使華允穆公路頃以王邸殂
謝予懷悼驚念其構堂眷深橋梓維城有寄墨經還朝載隆近屬之恩俾領中軍之節仍增邑食且實戶
封於戲乃考之忠勛四邦是式乃兄之光寵十乘有儀爾偕厥榮毋或茲忝欽卽殊獎祇勵遠猷

立皇太子制

張方平

維我祖宗繼天統業積有功德克享上帝之心肆其子孫永承百世之祀朕祇纂謨烈詳覽古今繫崇建
於元良實保安於國本上尊宗廟孝無大於奉先下庇生民教莫逾於居正式宣顯冊敷告萬邦皇長子
具官神宗廟諱英粹日躋中和自至仁義充涵之美言動惟時禮樂交錯之華威儀可象抑畏疏封之重敏修
典學之勤亦既多聞足當大受是宜誕膺徽命肇啓儲闈懋升明兩之輝益廣在三之道非余私於爾神宗廟諱
惟天祐於余家衍寶祚之靈長成寰區之慶賴往慎厥德以答揚我列聖之光訓不曰休哉可立爲皇
太子有司擇日備禮冊命施行

除皇兄宗諤保靜軍節度使制

張方平

朕惟前王懿德治古舊章必隆蕃屏之親以穆懷柔之體矧居邇屬夙著令名宜揆剛辰誕揚休命皇兄

具官宗諤甚德而度參仁以和近雅不流繹如鍾呂之正內明自照瑩若珪璋之溫率履無違在宗有裕特推恩典之異聿示表儀之光錫爾駢旒屬之瑞節時庸褒敘式昭寵嘉於戲祇畏者保身之永圖恭儉者有家之長業事近效遠罔或忽諸往惟欽哉尙克終譽

除韓琦守司徒兼侍中鎮安武勝等軍節度使制

張方平

朕光宅萬邦肇新駿命正權綱之遠御審名器之大方眷予宗臣特崇異數以表圖勳之重用昭報禮之隆爰揆剛辰誕揚贊冊具官韓琦宣昭賢業熙亮天工光翊三朝咸有一德材周五則之用體備四時之和社稷是經文武惟憲在成功而弗處實有大以能謙荐上奏封懇辭政柄顧倚毗之厚詔諭數頒而精懇之堅辭誠難奪增寵上階之峻特開兩鎮之崇蔽自朕心事非舊典當盛辰而均逸望故里以榮歸大業甚明休靈殊渥於戲臣行其志茲爲自得之全君篤於恩深惜老成之去無安帥節之樂猶待袞衣之還乃情本朝遐不謂矣

除呂公弼樞密使檢校太傅制

張方平

本朝之制地分二府之嚴執政之臣共幹庶邦之重文武承式兵民是圖屬在賢明總司使職誕敷明制敬告大廷具官呂公弼器縉純明機靈精遠瓌材任重中廣廈之棟梁雅音自和合清廟之琴瑟登貳樞機之密洽聞議慮之長屢陳憂國之言多發便時之策深明王體有簡朕心宜陞帝傅之崇以正本兵之任爰田增賦眞食衍封名器益隆典章允穆於戲信而能用嘗思明哲之難知無不爲期盡臣鄰之益祇若休命以贊大猷

除李昭亮殿前副都指揮使寧武軍節度使制

張方平

外擁節旄。方鎮元戎之重。內司禁衛。太微上將之雄。匪時英材。疇若嘉命。圖用親率。宜揚大庭。具官李昭亮。誠稟忠淳。風力敏給。世載其德。有狐趙之舊勳。文定厥祥。迺姜任之高姓。早階華顯。允蹈中和。入從法從之華。出領翰垣之要。屬以軍政。契於士心。訓撫有方。簡稽允肅。眷殿巖之離衛。悉王旅之選鋒。典茲中權。職在圻父。特賜節旄之命。爰將注意之隆。峻以等威。統諸環列。於戲。齋鉞所付。是爲王之爪牙。蘭錡之嚴。實曰予之心膂。勉旃誠報。茂對寵休。

除曾公亮檢校太尉充樞密使制

胡宿

經遠慮微。必慎制兵之術。折衝消難。亦資畫策之臣。是憲樞躔。聿崇使號。蓋政謨之攸寄。匪耆哲而莫居。適得其人。誕敷厥命。具官曾公亮。風業碩茂。志慮深純。學多貫於前言。性頗修於中道。有方重之德。可以扼躁而鎮浮。有明達之材。可以造幾而成務。嘗講勸於左右。亦召置於禁嚴。博我訓言。代予明命。聞請臨於襄輔。遄擢典於京師。咸有治功。遂聞政本。通明練於百物。參知穆於羣言。貳公之司。久陪於論道。內密之任。宜正於筦樞。仍加傳導之名。更益陪光宗嫌名之數。崇階馭貴。真食衍封。並示寵章。式旌殊禮。於戲。典機之任。莫慎乎微。擊柝之言。蓋取於豫。勿謂承平之久。益思備禦之深。祇服斯言。往踐乃位。

除王德用依前檢校太師同中書門下平章事兼羣牧制置使充樞密使河陽三城節度使加食邑

實封仍改賜功臣制

胡宿

內樞之地。上範於斗宮。前筭之籌。參寄於人傑。以經常武之事。是號本兵之司。圖冠厥名。疇總予務。乃眷

元侯之長。早崇右府之聯。爰擇剛辰。復還舊物。具官王德用。志懷果烈。風槩沉雄。通於奇正之謀。居然英傑之氣。春秋閱禮。韞義府以惟深。甲令書忠。載世家而有舊。比膺推轂。荐歷干城。先十乘以臨戎。長萬夫而觀政。德刑具舉。威惠參施。能名播於外夷。沉機隱於敵國。勳咨俊望。擢典繁機。翼濟事功。迪宣忠力。孚乃誠而匪懈。研諸慮以惟微。旋均基宥之勞。亟樹藩宣之治。蹈險夷而一致。服忠孝而兩全。簡在朕心。洽於朝聽。是用升鳳池之寵秩。聯虎節之榮章。倚殿輔邦。用陪京室。屬右樞之闕職。咨羣岳以擇材。僉曰汝賢。宜弼予治。蓋天子二老。出以居方伯之尊。寰內諸侯。入則處公卿之任。抑惟曩制。舉是隆名。用起壯猷。使纂舊服。仍峻雲臺之號。兼增井牧之封。式厚耆英。有加名數。於戲。樞機發令。制戎事以惟艱。樽俎折衝。經人謀而匪易。往慎乃位。益思其忠。

祁國長公主進封衛國長公主制

司馬光

帝妹中行。易象贊其元吉。王姬下嫁。召南美其肅雍。命服亞正后之尊。主禮用上公之貴。寵光之盛。誰昔釋訓誰昔昔也。而然矧同氣之至親。推異數而何愛。祁國長公主。席靈長之緒。承濬哲之祥。稟乾坤之粹和。鍾日月之明潤。淵懿可度。柔嘉有章。志女功而忘勞。承師教而不倦。今玉笋在首。厭翟戒塗。方結帨於皇家。將執筭音煩竹器於士族。宜疏沫土之邑。俾適富平之孫。庸展茂恩。誕孚醲化。於戲。琴瑟靜好。式昭和樂之音。雷風順承。是爲常久之道。勿以夫家之平素。有虧婦德之聽從。祇服訓詞。永綏福履。

立皇后高氏制

范鎮

天子之有后。如天之與地。惠養萬物。如日之與月。臨照四方。苟稱號之弗崇。則臣民之安仰。京兆郡君高

氏生閎閱之後。而不自矜大。處富貴之習。而能安素約。服在藩邸。宜于室家。肆朕纘承。嘉乃輔佐。惟長樂之奉養。左右不可不虔。惟六宮之表儀。晨夕不可不肅。爰正軒星之位。以爲國風之倡。舉是典冊。告于治朝。於戲。拜教所基。人倫茲重。塗山啓夏。太任興周。勤勞一時。焜燿萬世。乃其總筭櫛縱。日侍慈顏。衡統紘。綏時承宗祀。庶幾天下之俗。知我門中之私。

曾公亮加恩制

范鎮

朕觀前世之載。考宗祀之文。周漢舊章。殘缺無次。王鄭異說。雜互莫同。大抵奉親以嚴。率民以孝。交神明於合莫。厚風俗之本原。具官曾公亮。執禮蹈方。刺經援古。變均大化。固已治平。制定多儀。又皆節適。四時之氣。其和見于逗籩。九州之力。其精在于玉帛。使朕得昭升烈考。哀對上靈。誠意所通。顧饗如答。惟時顯相。宜有褒嘉。峻階級所以明等威。崇表號所以懋功賞。陪光宗。多賦。流衍真封。於乎。大典越熙。至恩胥暨。惟裁成輔相。以遂萬物之宜。惟同寅協恭。以收庶工之效。庸昭況施。永乂基圖。

除富弼樞密使制

范鎮

兵布于天下而至衆。故統之有本元。謀出於堂上而無窮。故資之於明哲。是以基于靜密。式暢遠猷。始乎幾微。能成大務。若時付畀。茲謂劇艱。前推忠協謀。同德守正。佐理功臣。特進行禮。部尙書同中書門下平章事。昭文館大學士。監修國史。兼譯經潤文使。上柱國。河南郡開國公。富弼。文武相資。柔剛並適。誠貫金石。材隆棟梁。往在先朝。嘗爲上宰。至言無隱。精慮有開。方國計之是毗。以親喪而遽去。況夫西漢而下。巨唐以還。訖于本朝。凡厥公相。率就起復。以爲權宜。而卿固執禮經。懇辭恩詔。三年始事。四海具瞻。再炳台

符之文。兼崇樞極之任。重陪多賦。庸示褒章。於戲。天命甚難。神器至重。始初纘紹。正賴經綸。幸元老之聿來。偕衆賢之同濟。庶幾涼德。罔累慶圖。

兗國公主降沂國公主制

范鎮

陳車服之等。所以見王姬之尊。啓脂澤之封。所以昭帝女之寵。茲惟親愛之攸屬。時乃化風之所關。苟不能安諧於厥家。則何以觀示於流俗。兗國公主。生而甚惠。朕所鍾憐。故於外家之近親。以求副車之善配。而保傳無狀。閨門失歡。歷年于茲。生事弗順。達於聞聽。深所駭驚。雖然。恩義之常人。所難斷。至於賞罰之際。朕安敢私。宜告大庭。降從下國。於戲。惟肅雍以成美德。惟柔順以輯令名。乃其恪思。庶永來福。

韓琦加恩制

王安石

朕祇率舊章。肇稱吉禮。對越天地。具獲靈明之歆。相維公卿。並膺休顯之賜。其孚大號。以寵元勳。推誠保德。崇仁守正。協恭贊治。亮節佐運。翊戴功臣。淮南節度揚州管內觀察處置營田等使開府儀同三司守司徒檢校太師兼侍中行揚州大都督府長史上柱國魏國公食邑一萬三千七百戶食實封五千戶韓琦。躬受偉材。出陪熙運。保茲天子。進無浮實之名。正是國人。退有願言之行。開朝廷之兩社。揉方域之萬邦。辰猷具臧。器寶加重。中辭機軸之要。外卽蕃屏之安。衡統紘綆。備三公服飾之盛。囊兜戟纛。兼大將威儀之多。序績旣崇。脩方彌謹。協成宗祀之禮。豫有顯助之勞。肆衍本封。申加美稱。於戲。恩典徽數。所以旌帝臣。明德茂功。所以獎王室。往惟勵翼。服此褒嘉。

李璋加恩制

王安石

若昔大猷。紹天明命。必有獻享之禮。作民恭先。必有褒嘉之恩。自國貴始。翊衛功臣。奉寧軍節度使鄭州管內觀察處置河隄等使光祿大夫檢校司空持節鄭州諸軍事鄭州刺史兼御史大夫上柱國平原郡開國公食邑四千三百戶食實封一千戶李璋。世載忠善。躬服儉勤。以后家之洪支。爲帝室之隆棟。入總營衛。則兵師無譁。出乘蕃維。則吏屬不怠。近付京都之籥。外更方鎮之旄。貢職惟脩。祀儀獲考。進加功號。申衍邑封。以疇服采之勤。以協勸勞之典。於戲。貴富有危。溢之可戒。祿位匪侈。驕之與期。圖惟慶譽之終。尙協龍光之施。

皇伯祖威德軍節度使榮國公承亮加恩制

王安石

朕裸獻廟室。燎禋郊丘。內蒙祖考之居歆。外獲神祇之顧饗。嘉我近屬。與有陪輔之勞。揚于大庭。使膺褒顯之福。具官承亮。德義自表。爵齒兼尊。魁然肅艾之材。尙矣神靈之胄。世承厥慶。有跗萼之芬華。朝賴以寧。若翰藩之嚴密。乃相肆祀。實綏思成。進加奠食之封。申賜詔功之號。於戲。孝恭可以儀宗室。信厚可以化邦人。匪時親賢。孰朕承翼。往肩寵獎。尙協榮懷。

李日尊加恩制

王安石

朕紹膺駿命。稽用上儀。祇事郊宮。並受三神之福。推恩方夏。外交四表之歡。告于有司。錫是在服。推誠保節。同德守正。順化翊戴。功臣靖海。軍節度觀察處置等使同中書門下平章事李日尊。躬懷德善。世濟忠勤。奠茲南邦。居有扞城之效。衛我中國。使無疆場之虞。賜之大將之旄。胙之真王之爵。往踐厥位。知欣戴於寵章。來獻其琛。用協成於熙事。陪光宗采邑。褒進文階。載加奠食之封。式允懋功之典。於戲。人之所助。

惟怙冒於王靈國以永存。顧循守於侯度。率時新命。保乃舊邦。

宋文鑑卷第三十五

制

封韓琦儀國公制

除韓琦門下侍郎兼兵部尚書進封衛國公制

除曾公亮門下侍郎兼吏部尚書進封英國公功臣制

除文彥博樞密使賜功臣制

除富弼判河南府制

除文彥博守司空依前樞密使制

除陳升之禮部尚書同中書門下平章事集賢殿大學士制

除程戡安武軍節度使再判延州制

除曹佾保平軍節度使加食邑實封制

除李璋殿前都副指揮使武康軍節度使制

除郝質殿前都指揮使安武軍節度使制

除皇伯祖承亮檢校工部尚書榮國公感德軍節度使制

賢妃苗氏進封德妃制

王珪

王珪

王珪

王珪

王珪

王珪

王珪

王珪

王珪

王珪

王珪

王珪

王珪

皇長女德寧公主進封徐國公主制

王珪

除富弼尚書左僕射充觀文殿大學士集禧觀使制

呂公著

除富弼依前尚書左僕射兼門下侍郎同中書門下平章事昭文館大學士制

鄭獬

邢氏進號賢妃制

孫洙

陳升之起復同中書門下平章事集賢殿大學士制

元絳

除皇弟顓保信保靜軍節度使進封嘉王制

元絳

除韓琦京兆尹再任判大名府

元絳

除韓絳觀文殿大學士知許州制

元絳

除燕達武康軍節度使充殿前副都指揮使制

李清臣

除韓琦依前同中書門下平章事進封儀國公加食邑實封制

王珪

朕按奉高之儀。思承上帝之福。詠我將之什。知配文王之功。詠辰季秋之良。盡志孝饗之事。應一郊之定。卜躬三歲之宗。祈于時陳物。采於國中。接神明於堂上。璧玉溫潔。黍盛令芳。靈光燭於大庭。休氣蒙于重。宇。疇相丕祀。於顯元臣。肆膺拜胙之釐。首布告廷之命。具官韓琦。命世發德。佐王矢謀。財萬化於物宜。熙百工於帝載。已任沈機之斷。力陳遠馭之圖。若歲爲霖。可以濟天下之旱。如易占筮。可以判天下之疑。責大而智愈深。事昭而情猶勉。迺先庚之詔。靡物備而不嚴。維自昔之文。或禮闕而不講。使朕得哀六天之

對款七廟之靈。輯于昭曠之儀。顧匪烈文之輔。茲庸錫之名壤。建爾上公。寢廣奉田之腴。復光宗嫌名。眞食之賦。汝爲汝聽。汝勞汝嘉。於戲。在福不敢康。蓋天有難忱之命。於德如弗及。蓋民無常懷之心。雖朝廷之甚休。益君臣之相勅。宜興盛治。允答靈歆。

除韓琦門下侍郎兼兵部尙書依前同中書門下平章事進封衛國公加食邑實封制

王珪

王者紹景炎之序。履皇極之尊。永惟置器之艱。屬在佐王之略。睠夫上宰。翼我先朝。適及委裘之辰。肆于奉瑁之始。定策宗社。貫心神明。逮躬丕務之咨。敢後元勳之獎。首敷邦渙。誕告朝倫。具官韓琦。器博而適時。道閎而濟物。稟星辰之精粹。會日月之休明。歷宣外勞。更倚二柄。蹈夷險之一節。寄安危之大機。仰文考之知賢。絕時髦而登用。維召公之託。嘗聞顧命之言。維漢相之謀。終應大橫之兆。蓋懷先見者。識之邃。決至慮者。材之英。天扶不拔之基。神贊非常之輔。是用進文昌之卿序。正黃闈之台符。隆以封爵之文。益之戶田之數。以蕃爾寵。以懋爾庸。於戲。天視靡私。居飭有邦之畏。民心曷戴。一歸厥后之仁。念先猷之弗敢康。顧成業之不可恃。益經茂烈。永佐昌圖。

除曾公亮門下侍郎兼吏部尙書依前同中書門下平章事進封英國公加食邑實封功臣制

王珪

大火基宋。實開五聖之符。六龍乘乾。遂繼中天之運。乃睠近弼。荐更三朝。元勳冠於百僚。利澤施于萬世。載蠲穀旦。敷告治廷。具官曾公亮。學通天地之微。謀合聖賢之舉。包剛柔於九德。固夷險之一心。蚤膺皇

祖之求。爰履公台之位。有臯夔之論。能變堯民於時雍。有丙魏之聲。不改漢家之故事。肆我文考。遺予冲人。咨顧命之老臣。輔初政于天下。重宣至策。終仰丕成。進首中臺之班。往顯東省之務。旣疏榮於公社。益躡數於爰田。功之所加。寵不敢後。於戲。恐德弗類。念高宗之未言。俾民不迷。繫尹氏之素力。共祇天監。永協邦休。

除文彥博樞密使賜功臣制

王珪

天極環樞。上通帝位之紀。神兵會府。內嚴師律之謀。朕方垂講丕平。進經常武。雖天下無事。思備禦之不敢忘。蓋王者有征。視安危之不敢忽。適登髦傑。資以輔予。具官文彥博。器閎而深。材敏以濟。早賁賢人之業。實膺聖考之知。以忠孝之名。形家國之盛節。以文武之略。輯將相之大猷。肆纂命於皇圖。迺離憂於喪紀。迨終哀戚。甫見儀刑。屬疆事之方興。煩師旄之載舉。折衝境外。方將出憺於王靈。收畫幄中。曷若坐圖於廟勝。宜長機廷之務。亶符巖石之瞻。於戲。過餌北戎。未厭貪驕之志。再盟西夏。猶苞狂忽之圖。終佇奇勳。用恢遠馭。

除文彥博守司空依前樞密使加食邑實封制

王珪

朕若稽先王。維御羣品。左謀金鉉之老。以經治於廟堂。右屬鴻樞之良。以定策於帷幄。厥有成績。可勿褒乎。具官文彥博。風力肅明。器資恢傑。臨至劇有轉圜之易。定大謀如執玉之堅。逮事神文之朝。已緝熙於鼎路。追言聖考之遇。又密勿於機廷。肆涼昧之丕承。會精神於羣慮。雖兵民之異本。亦文武之交脩。未隆贊冊之恩。曷懋圖庸之舉。其保宏父。允釐華陽。顧豈名分之私。終繫老成之助。於戲。有若閔天。尙迪文王。

之。舜罔俾阿衡。以專商家之美。往篤爾烈。永承于休。

除富弼依前同中書門下平章事充武寧軍節度使判河南府兼西京留守司事仍賜功臣制

王珪

三台處中。以裁萬物之化。四嶽總外。以收黎民之蕃。如山河之經九州。如股肱之衛一體。出處之際。朕無聞然。具官富弼。復貫有元。蹈中弗勉。學幾聖而獨至。識造物之未形。貴名起於三朝。盛德儀于百辟。鄉召從於列屏。俾進翊於冢司。爲日尙新。何恙靡已。未及經邦之務。遽陳避位之辭。詔雖屢而莫回。章甫卻而復至。朕憮然自念。嗟莫能勝。旣閱勞於政機。其聽遂於私佚。建彼徐節。以殿東郊。守茲洛符。以保西宅。仍位鴻鈞之貴。尙優黃髮之行。於戲。不處成功。專老氏榮名之畏。其旋元吉。要義經履道之終。雖弗從於吾遊。亦自保於而福。

除陳升之禮部尙書同中書門下平章事集賢殿大學士加食邑實封制

王珪

色齊三階。則風雨不失其序。聖如二帝。然股肱亦繫其人。朕上撫乾緯之明。下慎國鈞之寄。方審求於賢輔。俾參穆於政途。若時登庸。蓋出定命。具官陳升之。識幾聖蘊。謀合皇猷。學積于原。而心彌充。智酬于變。而力彌裕。早膺仁祖之擢。以遺文考之知。肆予冲人。克卽大任。問甲兵。則有鎮撫四夷之略。問衣食。則有運理羣物之心。朕方稽百王之謨。經一世之績。宜進躡於賢序。以延登於宰廷。夫知歷選之旣。藉體委用之寄重。則義莫得以愛己。道惟專於澤民。豈特無疆之休。亦有無窮之問。於戲。論金穀之計。其歸內史之司。作霖雨之滋。是應高宗之命。往熙帝載。庸代天工。

除程戡安武軍節度使加食邑實封再判延州制

王珪

周禮命卿司馬掌國征之事。漢儀遣帥將軍顯閫制之權。自非謀經帷幄之咨。名厭疆陲之難。則何以稽圖而受社。賜律以臨戎。茲疇舊政之良式。協師虞之望。具官程戡。體忠忱之度。蹈夷雅之風。進摹藝文之華。仕階名秩之膺。方先朝之籲峻。更三府之告猷。左右六年。夙夜一節。肆纂休於皇緒。適留寄於邊衝。空深寤寐之思。且重安危之倚。上金城之方略。猶知充國之彊。習闕里之弦歌。還見祭遵之佚。就付兩河之節。荐綏西土之封。既衍食於爰田。復陪輸於眞戶。風聲雖舊。寵數維新。於戲。制夷狄者。備不可遽忘。守方隅者。執不可數易。蓋威素申。則敵情懋。信久著。則士心懷。尙堅壯圖。往服渥命。

除曹偁保平軍節度使加食邑實封制

王珪

朕承景歷之昌。嗣丕基之重。渙敷大命。胥澤羣元。咨我方岳之良。時維屏翰之憲。念宣勞於劇委。稽渙獎於陟文。卜以剛辰。告于列序。具官曹偁。體冲韻邃。氣勁謀沉。傳圯上之神書。託西京之肺附。顯允祖烈。實爲宗臣。於皇母儀。克后先帝。濟忠純於奕世。履謙劫而保躬。鬯共武之威。迺踐元戎之貴。助守文之德。式繫外戚之賢。進導徽猷。參聯台路。肆纘膺於聖統。方倚輔於英藩。載疏冢位之榮。增視上公之峻。隆階表貴。衍食光宗嫌名封。萃爲寵休。以睦婣近。於戲。詔爵祿之柄。天官以馭夫羣臣。錫車馬之儀。大雅以褒夫元舅。蓋績美則報之厚。愛隆則禮亦蕃。往懋淑聲。永綏多福。

除李璋殿前副都指揮使武康軍節度使制

王珪

羽林神兵。北環天衛之象。黃帝李法。中嚴邦律之師。國家鬯武節於四遐。提禁屯於千列。進總凝嚴之護。

歷圖勁傑之資。稽衆得人。告廷孚命。具官李璋。氣沈而果。事性裕而知方。厲許國之單忠。達治兵之善志。緒服高華之望。名推親信之良。朕念長樂之慈。愴不及養。顧渭陽之族。聞蓋多賢。自擢領於戎昭。已積遷於留寄。屬巖除之缺帥。宜齋鉞之命才。六纛啓途。旣襲重侯之貴。萬兵留帳。方資緩帶之安。雖其素勞。不曰異寵。於戲。執干戈則有社稷之衛。常慎於假人。聽鼓鞞則有將帥之思。實深於注意。維蹈忠義者。急於報主。蓋喜功名者。要之逢時。勉規壯圖。尙率明訓。

除郝質殿前都指揮使安武軍節度使加勳食邑實封制

王珪

國家統御之勢。大維持之業。隆外倚四嶽。藩翰之臣。中謀萬夫。貔虎之帥。故奉委裘而羣情固。聞受璫而三靈趨。肇臨發政之辰。首下啟朝之命。具位郝質。性資莊厚。氣略沉雄。通玉帳之善經。體金行之正氣。自昔先帝。知爲勁臣。因其勤舊之名。立在親信之地。會綴衣之陳牖。提衛甲之環宮。曾無夜鑿之譁。自得剛牙之重。紹帝符於景祚。渙邦號於前彝。視秩冠于文昌。徙節臨乎安武。加以總正使範。光宗嫌名并封并旌巖陞之勞。以表師干之寵。於戲。天之壁壘。象在羽林。王之爪牙。職于圻父。蓋地嚴則必資拱扈之力。師衆則尤賴訓齊之方。往堅壯圖。思答殊遇。

除皇伯祖承亮檢校工部尙書榮國公感德軍節度使加食邑實封制

王珪

蓋聞周興建土。遂膺年歷之長。秦失罷侯。靡復藩維之援。此國家所以監用往制。封崇茂姻。以夾輔於王家。以懷柔於天下。肆膺皇緒。渙舉丕彝。皇伯祖具官承亮。躬耆德之英。被忠訓之厚。曾無車服珍寶之玩。固有詩書道術之明。稽帝堯之仁疇。先骨肉之愛顧。秦悼之後。不減祖宗之蕃。自居留務之榮。浸廣皇支。

之譽。按戊午之新澤。合南陽之近親。華鄂承跼。旌樂和於列邸。犬牙交壤。寄雄峻於師旄。旣行爰田之封。又陪眞食之入。助建大統。圖絜老成。於戲。積厚者流長。雖本神明之祚。德隆者爵重。況如宗族之賢。均履多祥。勉欽渥命。

賢妃苗氏進封德妃制

王珪

帝居六宮之制。率輔於皇猷。天極四星之華。實裨於壺事。朕嗣膺邦統。思穆人倫。褒臨妃掖之英。化始宸闈之順。命龜薦日。班綉布朝。賢妃苗氏。性資惠明。儀度閒肅。居蹈箴圖之戒。動循珩珮之飾。八月良家。早被後庭之選。平陽別館。爰開貴主之祥。而能進遠。驕華。舉思謙畏。綸衣奉祀。上以贊於后勤。彤史流徽。下以儀于嬪則。庸賁德言之茂。益隆位序之崇。名以副勞。議非能典。於戲。坐而論婦之禮。蓋視三公之尊。內有進賢之心。始安君子之佐。維正道然後式于外。顧私謁不可黷于中。往服訓辭。永綏寵命。

皇長女德寧公主進封徐國公主制

王珪

周美王姬之華。下王后之一等。漢推帝女之寵。主同姓之諸公。故至愛形而九族歡。內則正而四海順。乃睠公宮之懿。適從世閱之速。宜合丕彝。用孚羣聽。皇長女德寧公主。僊支襲慶。邦媛流徽。鍾天性之深慈。躬女圖之茂矩。幼而勤組訓之習。亦旣飭婦事之脩。長則有室家之歸。將以經人倫之始。維衿鞶之有命。維車馬之有行。卜仲冬之嘉辰。祉大易之元吉。瓊華在著。已戒齊風之醜。粉水疏園。莫如徐國之樂。侈燕謀於皇裔。充美化於民間。顯錫徽章。大旌柔度。於戲。前鑑唐家之制。盥饋不可以闕。供近稽仁廟之撫。冠服仍從於少損。蓋肅雍者賢之檢。儉約者古之師。其體至懷。自膺長譽。

除富弼尙書左僕射充觀文殿大學士集禧觀使制

呂公著

聖王賦祿。所以崇德而勸勞。賢者辭隆。所以激貪而厲俗。眷我外相。惟時宗工。願還重紱之榮。蓋露累章之請。既重違於悃。宜特示於褒優。載揆剛辰。式敷渙號。推誠保德。崇仁忠亮。佐運翊戴。功臣武寧軍節度徐州管內觀察處置等使開府儀同三司檢校太師同中書門下平章事徐州大都督府長史上柱國鄭國公富弼。體資忠亮。識蘊淵閎。炳嶽瀆之粹靈。挺棟莖之厚器。光輔仁祖。蔚爲文武之師。迨事先皇。實總機衡之要。引疾遽辭於大柄。均勞式殿於近邦。未移巖石之瞻。併及洪河之潤。肆予纘詔。尤渴儀刑。雖體力之未平。顧風猷之克壯。而乃過持冲守。深遜寵名。諡言已周。誠意彌確。朕惟安危所寄。雖賴老成之人。損益有規。宜伸大雅之志。俾進班於左揆。聽復節於中臺。仍總領於殊庭。竚論思於祕殿。用彰寵數。蓋示眷懷於戲。進止不膠。共扶於名義。幽明有相。終畀於壽域。風於四方。時汝之德。

除富弼依前尙書左僕射兼門下侍郎同中書門下平章事昭文館大學士兼譯經潤文使鄭國公

制

鄭獬

秉籙膺圖。將繼配天之大業。銓時論道。必資名世之元臣。以言乎體。貌則舊德之英。以言乎望。實則羣材之表。爰立作相。宜莫如公。丕昭寵數之殊。孚告治朝之聽。具官富弼。智資大雅。德懋碩膚。學足以造聖人之微。幾足以通天下之變。繇賢科之得雋。據遠業以奏功。在仁祖時。則首冠廟堂。有弼諧九德之美。在英考世。則再登樞府。有折衝萬里之謀。庶績已熙。太平將洽。屬留侯之多病。容表度以爲藩。愷悌所宜。神明自復。方王家之不造。固賢者之有爲。昔居吠晦。而志猶在於愛君。今處朝廷。而義豈忘於憂國。是用召從

方守進拜元台。仍左揆之舊班。兼東臺之茂秩。爰田衍賦。盟府易勳。茲實異恩。庸昭注意。於戲。上理乎天。工。則日月星辰以之順。下遂乎物宜。則山川草木以之蕃。近則諸夏仰德以承流。遠則四夷傾風以待命。凡予欲治。惟爾責成。勉盡嘉猷。用光丕訓。

邢氏進號賢妃制

孫洙

王宮六寢。崇建婦官。天極四星。垂著妃象。所以協宣陰教。助穆宸闈。矧視秩於上公。必數求於淑哲。朕厲精于治。選納尤希。嬪嬙靡充。位號多闕。茲延登於邦媛。用播告於路朝。婉儀邢氏。德稱後庭。體合法相。居念保阿之訓。動循環珮之音。授弓矢於媒祠。占熊羆於吉夢。是宜詳案舊典。升備列妃。進參榆狄之華。益昭彤管之煒。坐論婦禮。正始國風。品冠六儀。名超九御。於戲。周南之詠。卷耳無險。諛私謁之心。齊詩之美。雞鳴有警戒相成之道。寵靈烜赫。禮秩優隆。匪時婉孌之良。疇若褒嘉之命。佐后內治。爾尙勉哉。

陳升之起復同中書門下平章事集賢殿大學士制

元絳

閔子經而服政。先賢稱得事君之宜。晉侯墨而臨戎。前志謂達變禮之用。矧予丞弼。奄遘閔難。久虛席以思賢。宜敷朝而渙號。具官陳升之。蘊渾厚之量。挺高明之材。體備四氣之至和。智通萬方之遠略。發紆一德。感會三朝。經武斗樞之庭。則王靈震疊。贊元鼎鉉之府。則邦治協寧。端正百度之原。章明九敍之極。向鍾家疚。越解政均。稽之師言。厥有前憲。桓焉奪服。其惟詔使之從。趙熹離憂。未始宰司之去。盍來復於台路。以大熙於天工。於戲。斷恩從權。自昔弗踰於國制。移孝扶義。維時尙又於王家。勉一乃心。無替朕命。

除皇弟顏保信保靜軍節度使進封嘉王制

元絳

史謂建大宗之封。如安盤石之固。詩美得同氣之助。若敷常棣之華。朕紹五聖之休。昭九族之序。固已倚天屬於本根之重。措公姓於翰幹之彊。況於至親。宜有顯冊。播告羣位。厥維大公。具官顯燕翼發祥。溫恭迪哲。英姿茂而玉裕。盛氣粹而陽休。講藝服儒。多推道術之對。好禮樂善。雅有智思之文。臯稽立愛之經。屢衍建侯之寵。有華上公之衰。有淑元戎之旂。賢儀寔明。師論參穆。有用端筴。以審繇。按圖而定名。表爲眞王。奄爲樂國。畫岷峨之野。陪以爰田。易肥渙之塵。加之兩組。循典常而出閣。謹著定以奉朝。列第環宮。彌聳開元之觀。側門通禁。永承長樂之顏。備飭愛懷。布章慶譽。於戲。展親以誠信。我則友于天倫。秉德以輔陪。爾則蕃於王室。思長富貴之守。懋底忠孝之成。往其欽哉。以對猷訓。

除韓琦京兆尹再任判大名府制

元絳

分陝稱伯。召南當公。職之尊。啓魏就封。畢萬得國。名之大。況吾元老。爲世宗臣。久倚師垣之嚴。宜遷尹節之寵。飭宣典策。敷告搢紳。具官韓琦。道醇而深。器遠而博。渾渾忠孝之業。憲憲文武之姿。感通仁朝。亮衆采於台極。翼戴英考。捧大明於天衢。肆朕纘圖。厥初謀落。變諧四氣之序。熙輯百官之成。登昭公槐。奄洩國社。鎮定大事。妥如九鼎之安。承寧諸侯。端若元龜之信。歲勤再閱。師律旣和。重念郊圻之雄。旁據河山之險。徒得君重。以宣王靈。就更西雍之旄。留主北門之鑰。載光宗爰賦。并實幹封於戲。漢咨陳平安危。注於上意。唐用裴度。輕重繫乎厥身。維迺純誠。無愧前烈。懋服休命。往其欽哉。

除韓絳觀文殿大學士知許州制

元絳

國家登延弼疑。內以起功於庶事。圖畀藩翰。外以發政於四方。閱勞申恩。倚重均體。肆敷丕號。庸諗廣朝。

具官韓絳。躬莊厚之姿。函忠忱之度。濟世美以特立。告辰猷而具臧。婁陪國均。實輔台德。嚮自保釐之寄。再膺翼亮之咨。高平師師。總脩衆職之果。公孫斤斤。參聽百官之成。久宣于勤。閒愬以疾。確辭幾務之劇。祈卽燕申之休。感于朕聰。姑徇爾欲。宜還宰執。往建州麾。陟春官常伯之尊。兼禁殿隆儒之冠。載更功號。增衍井封於戲。乃眷臣鄰。雖爾身之在外。不忘壽考。豈茲心之謂遐。其服寵章。以將福履。

除燕達武康軍節度使充殿前副都指揮使勳封如故制

李清臣

祈父之官。司王爪士。上將之任。爲國虎臣。予得智勇之材。俾共左右之位。誕敷休命。播告大廷。具位燕達。拔迹戎行。厲躬武節。深明分數之守。兼識變通之權。捍外侮於西陲。佐濯征於南服。嘗鼓僂趨。阨以奮率。烝徒能降城艾旗。以盪定逋寇。夙付簡稽之籍。進督躡噉之軍。人知訓齊。衆不譁敕。是嚴師律。擢扈殿巖。越從廉車。遂總齋鉞。於戲。惟威愛足以臨下。惟忠義可以報君。勤懋乃心。欽迪朕意。

宋文鑑卷第三十六

制

除皇伯宗暉淮康軍節度使特封濮國公制

鄧潤甫

立皇太子制

鄧潤甫

封荆王顙太傅武寧鎮海軍節度使制

鄧潤甫

除皇弟偲武成軍節度使祁國公制

鄧潤甫

除司馬光左僕射制

鄧潤甫

除文彥博平章軍國重事制

鄧潤甫

除呂公著右僕射制

鄧潤甫

除呂公著守司空同平章軍國事制

蘇軾

除呂大防守尙書左僕射制

蘇軾

除范純仁尙書右僕射制

蘇軾

除苗授武泰軍節度使充殿前副都指揮使制

蘇軾

除皇伯祖宗晟特起復制

蘇軾

西蕃邈川首領阿里骨加食邑制

蘇頌

劉昌祚加恩制

蘇轍

除文彥博太師河東節度使致仕制

蘇轍

除文彥博司徒判河南制

曾布

除范純仁觀文殿大學士知穎昌府制

曾布

立皇后孟氏制

梁燾

徐王改封冀王制

范祖禹

除向宗良檢校司空充醴泉觀使昭信軍節度使制

范祖禹

除皇弟蔡王似保平鎮安軍節度使制

范祖禹

除曾布右僕射制

范祖禹

復元祐皇后制

蔡京

蔡京降太子少保致仕制

張闍

除皇伯宗暉依前檢校右散騎常侍充淮康軍節度使特封濮國公加食邑食實封餘如故制

鄧潤甫

禦侮尙親先王未之或改折衝授鉞天下所以久安眷惟尊屬之賢蚤有皇支之譽其敷褒律以告治廷皇伯邕州管内觀察使金紫光祿大夫檢校右散騎常侍持節邕州諸軍事邕州刺史兼御史大夫上柱國天水郡開國公宗暉器宇闔深履尙方重詩書自樂慕漢邸宗英之聞孝友夙成有濮園天性之愛爵

降而無負貴之累。祿富而懷約己之風。陞拜廉車之崇。益增公族之重。是用疇庸。躡等。辨域展圖。付名部之整軍。奉賢玉之明祀。維衰及繡。視上公之儀。錫山與田。壯元戎之寄。兼陪真賦。庸示寵章。於戲。親親主恩。非異數無以昭其意。繼繼在德。惟訓嗣可以孚于休。更恢遠猷。以稱茂渥。

立皇太子制

鄧潤甫

建儲非以私親。蓋明萬世之統。主器莫若長子。茲本百王之謀。朕荷天地之況臨。席祖宗之詒燕。迺瞻上嗣之貴。蚤應前星之祥。宜告大廷。誕揚孚號。皇子彰武軍節度使延州管內觀察處置等使檢校太尉開府儀同三司持節都督延州諸軍事延州刺史上柱國延安郡王哲宗廟諱溫文日就。睿智夙成。回馳道之車。能止班輪之駑。辨南陽之牘。允符東海之休。自疏錫於王封。益光華於德望。勝衣視膳。溫然孝友之姿。好禮受經。不煩師傅之誨。是用歷盛陽之嘉日。舉列聖之大章。肇正青宮。肆效顯冊。以協離明之吉。以係天下之心。於戲。立愛始親。商以成千歲之業。建嗣必子。漢以撫四海之民。斯爲永圖。往膺徽典。

封荆王顓太傅武寧鎮海節度使制

鄧潤甫

朕罹國大憂。紹天明命。黃陵玉座。永懷復土之深。清廟朱絃。序陟寧神之禮。哀恫罔極。感慕從中。念宗藩尊屬之賢。有文考同生之愛。圖功甚茂。送往良勤。敷告大廷。肆效顯冊。皇叔武昌武安等軍節度鄂州潭州管內觀察處置等使守太保開府儀同三司持節都督鄂州潭州諸軍事鄂州潭州刺史上柱國荆王賜贊拜不名。頤身端而行治。識遠而量夷。地則茂親。時惟名德。翼戴王室。雅有二南之風。表儀宗枝。獨包兩獻之學。協策廟社。乃心朝廷。昨朕承祧。疇勞錫命。屬緝裕陵之禮。遠護靈駕之行。事有感懷。義當褒異。

是用進以官班之等。寵以帝傅之崇。出節徐郊。建麾青社。以應采菽來朝之賜。以慰棠棣孔懷之情。於戲。詩美大宗。是爲四國之翰。禮尊叔父。固曰一人之嘉。往服龍光。益膺福祉。

除皇弟偲武成軍節度使祁國公制

鄧潤甫

朕奉承燕謀。獲紹大統。永懷先烈。曷勝哀疚之情。眷顧同生。宜厚褒封之典。予我明命。揚于治廷。皇弟偲。岐嶷得於自然。溫文見於異稟。挾天材之美質。應帝武之嘉祥。未臨射矢之辰。遽起號弓之慕。踰年於此。錫壤惟時。矧周人尙親。尤重本支之務。漢廷左戚。亦隆襁褓之封。規裁半楚之疆。載徹濱河之域。苴茅制社。授鉞殿邦。用建上公。尹茲北國。策勳加等。衍邑實租。於戲。西望裕陵。敢忘幼子之愛。東朝長信。進預諸孫之遊。往服恩輝。益延壽祉。

除司馬光左僕射制

鄧潤甫

帥羣臣宿道而嚮方。在慎取相。佐王者修政而美國。莫若求人。顧惟眇躬。獲嗣大統。儲思業業。不敢忘六聖之休。注意賢賢。將以總萬方之儉。褒進上宰。敷告外庭。正議大夫守門下侍郎司馬光。受材高明。履道醇固。智足以任天下之重。學足以知先王之言。逮事厚陵。徧儀侍從之列。被遇文考。擢總樞機之繁。有大臣特立之風。蹈君子難進之節。方予訪落之始。起應秉均之求。調娛萬幾。必先教化之意。辨察百職。不失禮義之中。是用諮諏僉言。褒加異數。越陞左揆之路。兼峻東臺之班。申衍爰田。陪光宗真食。於戲。上寅亮於天心。則陰陽風雨以之順。下遂字於物理。則山川草木以之寧。內阜安於兆民。外鎮撫於四裔。蓋輔相者爲之基杖。而老成者重於典刑。勉行所聞。以底極治。

除文彥博平章軍國重事制

鄧潤甫

師傳道之教訓。先王所以迪厥官。老成重以典刑。天下所以資其智。迺眷舊德。時謂元勳。謀合祖宗之心。名載鼎彝之器。申攸贊策。播告外朝。河東節度管內觀察處置等使守太師開府儀同三司太原尹致仕上柱國潞國公文彥博。光宗御名大而清明。方嚴而信厚。出則秉乎旄鉞。入則總我鈞衡。文武兼備其才。夷險能致其力。畢公之弼四世。三紀于茲。傳說之總百官。萬邦其父。爵隆無富溢之累。名遂有身退之榮。神明相其壽康。人心想其風采。是用還之論道。倚以經邦。以帝者之師臣。謀議廟堂之上。以天下之大老。制馭夷狄之情庶幾有爲。底于極治。光宗嫌名多井。申衍真封於戲。呂望惟賢。起佐文王之治。周公已老。留爲孺子之師。矧我耆英。無愧前哲。往宣一德。用格多盤。

除呂公著右僕射制

鄧潤甫

國莫難於置相。君莫重於知人。堯舜之隆。蓋以疇咨而熙載。商周之盛。至以夢卜而求賢。天降割于我家。予未堪於多難。思用耆德。交秉政鈞。其敷寵章。以詔羣辟。金紫光祿大夫門下侍郎上柱國東平郡開國公呂公著。行應儀表。學通本原。忠義得於天資。功名自其世美。被遇先帝。嘗入贊於樞庭。暨予冲人。遂同寅於政路。傳經意以謀國體。推上澤以紓民心。敍收雋賢。補苴法度。方重不倚。雅有大臣之風。調娛適中。遂通當時之務。是用陞之右揆。委以繁機。申衍爰田。光宗嫌名真賦。爾則代天而理物。予則羞者以惟君。於戲。丞相之位。未嘗無其人。儒者之效。久不自於世。孟軻言無有者。數百歲。揚雄稱自得者。二三臣。蓋迪遠業者。其功難循迹者。其力易勉行所學。以底丕平。

除呂公著守司空同平章軍國事制

蘇軾

仁莫大於求舊。智莫良於用衆。既得天下之大老。彼將安歸。以至國人皆曰賢。夫然後用。今朕一舉仁智。在焉。宜告治朝。以孚大號。金紫光祿大夫守尚書右僕射兼中書侍郎上柱國東平郡開國公呂公著。訐謨經遠。精識造微。非堯舜不談。昔聞其語。以社稷爲悅。今見其心。三年有成。百揆時敘。維乃烈考。相予昭陵。蓋清淨以寧民。亦勞謙而得士。凡我儀刑之老。多其賓客之餘。在武丁時。雖莫追於前烈。作召公考。固無異於象賢。而乃屢貢封章。力求退避。朕重失此三益之友。而閔勞以萬幾之煩。是用遷平土之司。釋文昌之任。毋廢議論。時遊廟堂。於戲。大事雖咨於房喬。非如晦。莫能果斷。重德無逾於郭令。而裴度亦寄安危。罔俾斯人。專美唐世。

除呂大防太中大夫守尚書左僕射兼門下侍郎制

蘇軾

朕聞天子有道。其德不可得而名。輔相有德。其才不可得而見。故漢之文景。紀無可書之事。唐之房杜。傳無可載之勳。當時安榮。後世稱頌。予欲清心而省事。不求智名與勇功。天維顯思。將啓承平之運。民亦勞止。願聞休息之期。眷予元臣。咸有一德。咨爾百辟。明聽朕言。中大夫守中書侍郎上柱國汲郡開國公。賜紫金魚袋。呂大防。造道淳深。受才宏毅。果藪以達。有孔門三子之風。直大而方。得坤爻六二之動。久踐右闕。蔚爲名臣。宜陞左輔之崇。兼綜東臺之務。加賦進秩。寵數益隆。得位與時。憂責彌重。於戲。若古有訓。無競維人。崔公建中之風。以除吏八百而致。裴垵元和之政。以薦士三十而能。惟公乃心。何遠之有。

除范純仁太中大夫守尚書右僕射兼中書侍郎制

蘇軾

朕惟朝廷之盛衰。常以輔相爲輕重。若根本疆固。則精神折衝。故薦呂臣奉己而不在民。則晉文無復憂色。汲長孺直諫而守死節。則淮南爲之寢謀。朕思得其人。付之以政。使天下聞風而心服。則人主無爲而日尊。咨爾在廷。咸聽朕命。中大夫同知樞密院事上柱國高平縣開國伯賜紫金魚袋范純仁。器遠任重。才周識明。進如孟子之敬王。退若蕭生之憂國。朕覽觀仁祖之遺迹。永懷慶曆之元臣。強諫不忘。喜臧孫之有後。戎公是似。命召虎以來宣。雖兵政之與聞。疑遠猷之未究。坐論西省。進武文昌。增秩益封。兼隆異數。於戲。時難得而易失。民難安而易危。予欲守在四夷。而汝爲偃兵之姚宋。予欲藏於百姓。以汝爲息民之蕭曹。勉思古人。以稱朕意。

除苗授武泰州軍節度使充殿前副都指揮使制

蘇軾

出總元戎。作先聲於士氣。入爲環尹。寓軍政於國容。將伸闔外之威。以迪師中之吉。咨于爾衆。朕得其人。侍衛親軍步軍副都指揮使威武軍節度觀察留後持節福州軍州事福州刺史上柱國濟南郡開國公苗授。早以異材。見稱武略。被服忠義。有烈丈夫之風。砥礪廉隅。得士君子之槩。荐揚邊圉。益著勞能。拔自衆人。旣蒙先帝之遇。遂拜大將。無復一軍之驚。祇扈殿巖。肅將齋鉞。予欲少長有禮。而兵可用。汝其夙夜在公。而令必行。於戲。愛克厥威。罔功。茲爲深戒。師衆以順爲武。古有成言。惟懋乃衷。毋忘朕訓。

除皇伯祖宗晟特起復制

蘇軾

曾閔之哀。喪不貳事。漢唐之舊。禮有奪情。矧予藩屏之親。實兼臣子之重。雖閨門之恩。掩義而公侯以國爲家。伯臣司宗。職不可曠。要經服事。古有成言。非予爾私。其聽朕命。皇伯祖彰化軍節度涇州管内觀察

處置等使檢校司空開府儀同三司持節涇州諸軍事涇州刺史判大宗正事上柱國高密郡王宗晟天資純茂德履方嚴襲餘慶於祖宗蹈格言於師保典司屬籍克有令名郢客卒業於浮丘辟疆受知於先帝允釐厥位毋愧昔人屬此閔凶纍然毀瘠嗟日月之逾邁重職業之久虛宜復寵名式從權制於戲出居官次非王事不談退適倚廬讀喪祭之禮則忠孝兩得人無閒言功名益隆親有顯譽勉服朕訓光昭前聞

西蕃邈川首領阿里骨加食邑制

蘇頌

祭有十倫之義施爵賞以爲先福者百順之名本忠孝之自出朕祇祓陽館崇嚴禰宮配神穹昊之尊流澤幅員之廣嘉與卿士同茲慶休便蕃優渥之恩固無內外之異告于朝采布乃言綸西蕃邈川首領河西軍節度涼州管內觀察處置押蕃落等使金紫光祿大夫檢校太保持節涼州諸軍事涼州刺史上柱國寧塞郡開國公阿里骨生有軼材少負偉略稟天地之義氣得秦豳之遺風奠塞外之封疆繼承列土擁河西之旄鉞坐護諸羌長雄一方作我西屏屬九筵之講禮盛四海之駿奔來獻其琛實相予祀是用加命王公之數視秩帝傅之崇增井賦於爰田廣國租於真食於戲爾有時享歲貢之恪史不絕書我有餽神觀政之方惠必及下既均承於純嘏宜益厲於忠規往服訓言克享天祿

劉昌祚加恩制

蘇轍

朕因路寢之正舉合宮之祠禮樂法商周之隆車服兼漢唐之盛出款原廟還享上穹職貢充庭工師履位兵衛如植旌旆不煩實惟有人以克成禮殿前副都指揮使武康軍節度洋州管內觀察處置等使持

節洋州諸軍事洋州刺史上柱國彭城郡開國侯劉昌祚天姿鷲勇性本忠良結髮征羌號馬上之飛將授鉞噏塞皆關中之要區方西鄙之須材會中軍之謀帥畀之旄節之重付之貔虎之師歸閱浹旬旋聞輯輦述此熙成之慶賴其宿衛之勤既增封爵之崇仍加眞食之厚於戲古之明主立賞以待有功古之賢將有功而恥自列服予霈澤之異勉爾勳名之思貴當益恭老當益壯

除文彥博太師河東節度使致仕制

蘇轍

周公未嘗之魯老亦居豐留侯晚雖彊飡終不任事蓋委寄之重初無間然而止足之風所不敢廢惟我耆舊歷事祖宗纘服之初復命以位雖師保之地優佚不煩而丘樊之心朝夕以請布告在位俾聞高風太師平章軍國重事上柱國潞國公文彥博克孝而忠允文且武其在師旅有方召之勳其在朝廷有崇環之業士民視其去就夷狄震其威名時更四朝躬蹈一節先皇帝愍勞以事既許其歸越予訪落之年凜有涉淵之志起之既老待以仰成出入五年終始全德進而論道日聞典訓之言倚以折衝卒靖邊防之警委成功而不處指莫景以求安勤請屢聞誠心莫奪顧瞻閭井近在洛師郭氏有永巷之嚴裴公有綠野之勝豈以簪紱之累久致形氣之勞貴極上公既無復加之爵秩分領全晉仍畀久還之節旄增廣舊封益衍眞食殫盡人臣之寵歸從父老之遊於戲音聲不遐尙有就問之禮几杖以俟復期親祀之陪勿以進退之殊而廢謀猷之告式燕且譽俾壽而康

文彥博司徒判河南制

曾布

秉國大均絕席廟堂之上經時常武運籌樽俎之間維吾老成多所更踐懇辭幾務往殿近藩敷告于廷

進疇厥位。推忠協謀。崇仁同德。經邦贊治。守正保運。亮節佐理。功臣樞密使劍南西川節度管內觀察使處置橋道等使開府儀同三司守司空檢校太師兼侍中兼羣牧制置使行成都尹上柱國潞國公文彥博。器資宏偉。智謨靖深。逮事祖宗。蚤登丞弼。周旋左右。當四海之具瞻。密勿樞機。實萬邦之爲憲。肆予續御。屬在倚毗。深惟注意之勤。勉徇均勞之請。眷言耆舊。宜所褒崇。增秩上公。衍封真賦。光華故里。揭全晉之旌旄。偃息名城。壯陪京之屏翰。出入中外。始終顯榮。於戲。進而論道經邦。則必告嘉猷于后。退而承流宣化。則必下膏澤於民。惟往欽哉。尙多受祉。

除范純仁觀文殿大學士知穎昌府制

曾布

謀謨廟堂。入則股肱於大政。偃息藩翰。出則師帥於一方。維時宗工。引疾辭位。均逸近輔。敷告大庭。通議大夫守尙書左僕射兼中書侍郎上柱國廣平郡開國公范純仁。端良稟於世資。樂易成於天性。有砥名厲行之志。有面折廷爭之風。越自累朝。寢更華選。暨冲人之嗣服。適文母之仰成。咨于臣鄰。付以宥密。一踐樞要。再秉國均。朕恭己紹庭。嚮明圖治。輯熙緒業。追遙先猷。方有望於弼諧。遽固辭於機務。重違爾志。姑卽厥安。增視秩之榮名。進陪封之寵數。式隆體貌。何吝眷私。於戲。論道經邦。常在倚毗之地。承流宣化。勿忘勵翼之心。祇服朕言。往共爾位。

立皇后孟氏制

梁燾

正家者義之先。天下從而定矣。大昏者禮之本。聖王所以重焉。朕繼體持盈。側身思永。方切基圖之固。敢娛宮室之安。太母以萬世爲心。命虔宗事之重。大臣以兩極陳義。請建坤儀之尊。謂王道之大。所由興。故

人倫之始不可緩。明揚德閱之懿。簡在慈闈之公。欽承溫詔之音。俾正中宮之位。載錫吉日。敷告大庭。故侍衛親軍馬軍都虞候眉州防禦使贈太師孟元孫女。忠孝令門。善慶奕世。幽閑專靜。藹聞和聲。婉睦惠慈。雅應柔則。天作之合。文定厥祥。人謀協從。龜告并吉。是宜入聽內職。輔宣外和。式瞻禕翟之章。上直軒龍之象。嘉典大備。並行今古之情文。盛德有開。增美國家之治理。於戲。惟恭儉爲富貴之守。惟憂勤爲康樂之資。如關雎之進賢。則可以基風化之成。如樛木之逮下。則可以將福履之盛。用久乃濟。匪初其難。勉爾欽修。以法三宮之端。一相予顯祀。以崇七廟之清明。垂光紫庭。襲譽彤管。可立爲皇后。

徐王改封冀王制

范祖禹

周尊公旦。倚爲四輔之師。漢重王蒼。位處二公之上。及我仁祖。加禮荆王。願惟冲人。敢後叔父。誕敷明命。播告治廷。皇叔永興鳳翔等軍節度管内觀察處置等使守太尉開府儀同三司雍州牧兼鳳翔牧上柱國徐王。賜詔書不名。顯稟訓英皇。同氣神考。仁義根于天性。孝友冠于人倫。昔在先朝。蚤膺異數。迨宣后九年之政。無愛子一毫之私。追惟崇慶之功。罔極昊天之報。方畢太宮之祔饗。莫先尊屬之褒嘉。是用登拜師垣。仍聯使節。徹彼徐土。受茲冀方。內獎皇家。外綏侯服。進陪多賦。衍食眞封。於戲。並建親賢。實爲社稷之衛。益彊藩屏。用承祖考之休。往膺典冊之光。永介壽祺之祉。式昭令德。無愧前人。

除向宗良檢校司空充醴泉觀使昭信軍節度使制

曾肇

昔周盛世。則有申伯之良翰。在漢懿親。則有少君之長者。眷吾仲舅。蚤著賢稱。登進寵名。誕敷詔號。醴泉觀使奉國軍節度明州管内觀察處置等使持節明州諸軍事明州刺史上護軍河內郡開國公向宗良。

席慶深厚。秉德粹溫。富貴無自滿之心。恭孝有夙成之質。肆朕承祚之始。首膺授鉞之榮。茲屬東朝。亟還大政。念崇德報功之誼。將錫異恩。守右賢左戚之規。莫回慈旨。換節瀕江之地。參華空土之名。增衍戶租。併申朕志。於戲。維我太母。有勞皇家。方其艱虞。則出任社稷之重。及底康靖。則還就宮闈之安。動靜必惟其時。進退靡失其正。而猶鑒觀前載。深抑外親。爾其念長樂之好謙。思文簡之垂裕。益堅素履。永保令名。

除皇弟似守太保依前開府儀同三司蔡王充保平鎮安等軍節度使制

曾肇

朔惟本朝之制。厚公族之恩。列第京師。不忍使之去國。兼榮將相。未嘗責以治民。豈惟致光宗欬之仁。抑亦隆夾輔之勢。矧吾寵弟。實位真王。念方屬於妙齡。將即安於外邸。雖云密邇。能不疚懷。肆舉徽章。用孚羣聽。皇弟武昌武成等軍節度鄂州滑州管內觀察處置等使守司徒開府儀同三司持節都督鄂州滑州諸軍事鄂州滑州刺史上柱國蔡王似。出神明之胄。鍾祿祝之祥。氣稟溫良。生知遜悌。雅愛圖書之習。夙堅忠孝之誠。桐葉疏封。已侈盤維之寄。棣華致好。每光宗和樂之私。比遵朝著之趨。尙處宮隅之邃。屢觀啓奏。祈避禁嚴。志雖莫回。情實未忍。思在宗之誼。豈忘原隰之哀。顧開府以時。難廢國家之典。迺獨穀旦。增峻官儀。更兩鎮之節旄。正三師之位敘。兼陪井賦。益壯宗藩。於戲。周誥孟侯。則曰無康好逸。漢詔諸子。亦云無邇宵人。蓋位不期驕者。人情之常。寵至益戒者。前哲所尙。往服休命。永綏令名。

除曾布右僕射制

曾肇

左右置相。以總吾喉舌之司。東西分臺。以幹我鈞衡之任。居中如鼎足之峙。承上若台符之聯。相須而成。闕一不可。迺登次輔。以告大廷。左光祿大夫知樞密院事上柱國魯郡開國公會布。敏識造微。懿文貫道。

器周小大之用。智適古今之宜。被神考特達之知。亟躋禁從。膺先朝倚注之重。久執事樞。而能悉心公家。宣力夙夜。忠以迪上。誼不辭難。髮勤百爲。壯老一節。肆朕纂臨之始。尤嘉翼戴之勞。參稽師言。圖任舊德。文昌端揆之列。紫微陪侍之班。合茲寵名。作我近弼。仍遷階品。增衍戶封。於戲。朕有休息百姓之心。汝則覲文而匿武。朕有綜覈庶工之志。汝則務實而去華。以至甄序材良。光宗嫌名獎正直。澄清風俗。振肅紀綱。使萬物各得其平。無一夫或失其所。汝之職也。尙往欽哉。

復元祐皇后制

蔡京

朕紹休列聖。承訓東朝。施惠行仁。旣誕孚於有衆。念今追往。用光宗嫌名敍於我家。廢后孟氏。頃自勳門。嬪于王室。得罪先帝。退處道宮。逮茲累年。克庸祗德。皇太后念仙遊之寢邈。撫前事以興悲。惻然深矜。示不終廢。申崇位敍。還復宮庭。乃詔輔臣。具依審議。雖元符建號。已位於中宮。而永泰上賓。無嫌於並后。於戲。原情起義。蓋示親親之恩。克己慎身。宜成婦婦之道。其率循於懿範。以上答於深仁。往服茂恩。永膺多福。

蔡京降太子少保致仕制

張閣

政事所寄。尤嚴誤國之誅。人臣之姦。莫重欺君之罪。我有常憲。揚于大庭。太師致仕。楚國公蔡京。頃以時才。久膺柄任。兩冠台衡之峻。三登公袞之崇。庶圖爾庸。以弼予治。而總秉機務。出入八年。事寢紊於將來。謀悉違於初議。擅作威福。妄興事功。輕爵祿以示私恩。濫錫予以蠹邦。用借助姻婭。密布要途。聚引兇邪。合成死黨。以至假利民以決興化之水。託祝聖以飾臨平之山。豈曰懷忠。殆將徼福。屢有告陳之迹。每連狂悖之嫌。雖僅上於印章。猶久留於里第。偃蹇弗避。傲睨罔悛。致帝意之未孚。昭星文而申譴。言章繼上。

公議靡容。固欲用恩。難以屈法。宜褫師臣之秩。俾參宮保之官。聊慰羣情。尙爲寬典。於戲。天事尙象。明罰所以弭災。人道惡盈。省躬所以引咎。往欽善貸。無重後愆。

